

فلا تدر

عبدالمحمّد عبّود السّحر



أم العروسة

مطبعة خان بكية ملهز

أم العروسة

تأليف

عبد الحميد جوده الشمار

الناشر : مكتبة مصر

٣ شارع كاتوليكى ٢٢٢٢٢

سعيد جوده السحار وشركاه

منار مصر للطباعة

٣٧ شارع كاتوليكى

الفصل الأول

تردد رنين الجرس الخارجى فى أرجاء الشقة . ففتح حسين عينيه فوقعتا على زوجته زينب ، الراقدة الى جواره تغط فى نومها ، وتتابع الرنين فأزاح الغطاء بعيدا عنه وهو ينهض ، فرأى ابنته هالة تتمطى فى سريرها الصغير ، الملتصق بسريرهما من جانب زينب ، فخشى أن يوقظها ذلك الرنين المتواصل ، فهب مسرعا وانطلق حافى القدمين الى المطبخ والتقط وعاء اللبن واتجه الى باب الشقة وهو يهرول .

انفرج الباب عن فتحة تكاد تسمح بمرور الوعاء ، ومد يده به ، وهو يخفى وجهه عن بائع اللبن ، فقد أحس أن شعره منفوش ، وعينيه ما زالتا منتفختين من أثر النوم ، وأن البيجاما التى يرتديها كانت من قطعتين مختلفتين !

وشعر بثقل اللبن فى الوعاء ، فسحب ذراعه ، وأغلق الباب فى حذر ، حتى لا يرتفع صريه ويوقظ النائمين ، وسار على أطراف أصابعه الى المطبخ ، ثم عاد الى غرفة نومه ، واندس فى السرير ، وسحب الغطاء ، وأغمض عينيه ليستأنف النوم اللذيذ . وتقلب هالة فى سريرها ، وبكت بصوت بدأ منخفضا ثم

أخذ فى الارتفاع ، فمد ذراعه من فوق زوجته ، وراح يتحسس الحلمة المطاط المشبوكة فى صدر هالة ، حتى عثر عليها ووضعها فى فمها ، ولكن هالة لم تكف عن البكاء ، بل انقلب صياحا ، فنحى الغطاء عنه فى غيظ ، فانكشف ذراع زينب ، وقام ليغادر الغرفة حافى القدمين الى المطبخ ، وهو ينظر الى زوجته وابنته التى عكر عويلها صفو السكون ، فالفى زوجته تمد يدها وتسحب الغطاء عليها دون أن تفتح عينيهما ، وتروح فى سبات وقد ارتسم على وجهها هدوء عجيب .

ووصل الى المطبخ ، وبكاء ابنته يصك أذنيه ، فتناول علبه الكبريت ، وأخرج منها عودا فى عجلة ، وحاول أن يشعله ، ولكن العود انكسر ، فأخرج آخر وأشعله فى لهفة ، ثم أوقد « وابور السبرتو » ووضع فوقه وعاء اللبن .

ولم يشأ أن يضيع وقتا ، فأخرج من النملية زجاجة ركبت فوق فوهتها حلمة من المطاط ، وذهب الى الحوض ، وأخذ يغسلها فى عناية ، ثم وضع فيها قمعا ، وعاد الى وعاء اللبن الموضوع فوق « وابور السبرتو » .

واستمرت هالة فى بكائها ، فجعل يتململ فى وقفته ، وينظر الى النار فى توصل يتعجلها .. وأخيرا رفع الوعاء وصب اللبن فى الزجاجة ثم ألقى القمع فى الحوض ، وراح يركب الحلمة المطاط .

وفتح صنبور الماء ، ومد يده بالزجاجة ليبرد اللبن ، واستقر الماء يجرى فوق الزجاجة ، حتى اذا حسب أن حرارة اللبن أصبحت مناسبة ، رفع الزجاجة الى فمه ، ومص من الحلمة مصّة فاذا باللبن يلسعه ، فعاود وضع الزجاجة تحت الماء فى ضيق ، فبكاء هالة كان يدوى فى المطبخ •

وأغلق صنبور الماء ، وعاود مص الحلمة مرة أخرى ، وهو فى اندلاقه الى هالة ، ليطمئن الى مناسبة درجة حرارة اللبن ، ورفع بصره الى انساعة المتواضعة المعلقة فى الردهة ، فاذا بها تشير الى السادسة ، وأخرج الحلمة من فمه ، ومسحها بيده ، ثم هرول الى غرفة النوم •

وألقم هالة الحلمة ، فكفت عن البكاء ، وأخذت الزجاجة بين يديها فوقف ينظر اليها برهة ، وقد تفجرت ينباع الحنان فى جوفه ، وانبسطت أساريره ، ثم دار حول السرير ليأخذ مكانه الى جوار زينب ، ولكنه ما ان هم بالرقاد ، حتى عاود القيام ، فقد تذكر شبيثا هاما •

خرج من الغرفة ، وسار فى ردهة طويلة ، حتى بلغ غرفة مغلقة ، ففتح بابها فى حرص ونظر • كان فى الغرفة ثلاثة أسرة ، رقدت فيها بناته الثلاث ، أحلام ونبيلة وسوسن •

كانت أحلام فى الثامنة عشرة ، مكتملة النمو ، بيضاء البشرة ، تبعثر شعرها الأسود الفاحم على الوسادة ،

وارتسمت على شفيتها بسمه ، ودارت فى فراشها نصف دورة ،
فارتفع صدرها الناهد ، وامتدت احدى ساقىها العاريتين
وتقلصت الأخرى ، كانت فى حلم لذيذ من أحلام الشباب •

وكانت نبيلة فى السابعة عشرة ، منقوشة الشعر ، مزججة
الحاجبين ، رقيقة الشفتين ، وكانتا تتمتمان ، فهى لا تكف عن
الكلام حتى فى نومها ، كانت ترتدى بيجاما ضيقة ، تكشف
تفاصيل جسمها الرياضى •

وكانت سوسن فى الثامنة : دقيقة الملامح ، وردية اللون ،
سبطة الشعر ، تبدو فى نومها كملاك ، قد رفع ثوبها أثناء
تقلبها ، فبدأ بطنها عاريا •

وتقدم بسترى الخطأ ، وتناول أطراف الغطاء المكور تحت
أقدام أحلام وسحبته فى رفق فوقها ، ثم اتجه الى نبيلة والتقط
الغطاء من على الأرض ، وغطاها وهو ينظر الى شفيتها
الدائبتى الحركة ، فأشرق وجهه وبدأ على فمه مولد ابتسامة •

وذهب الى سوسن ، ورفعها فى رفق بين يديه ليعيد رأسها
على الوسادة ثم أحكم غطاءها ، وراح يمرر يده على شعرها
الكستائى فى حب وحنان •

وانسحت من الغرفة ، وجذب الباب خلفه ، وقبل أن
يغلقه ، وقف برهة وقد لمعت عيناه •

واتجه الى الغرفة المجاورة ، وفتح بابها ونظر ، فاذا بثلاثة
أسرة رقد فيها أبناءه الثلاثة ، سامى ومراد وعلف .

كان سامى فى الرابعة عشرة ، معتزاً بشبابه ، ينام عارياً ،
لا يرتدى الا بنطلونا قصيراً من قماش أبيض ، وكان وجهه
أشبه بوجه نبيلة ، كانت ملامحه توحى بطفولة ، ولكنه كان
راضياً عن شكله كل الرضا ، وما كان يضايقه الا تأخر نمو
شاربه !

كان مراد فى الثانية عشرة ، تبدو فى رقدته شقاوة ، فآثار
الحبر فى أصابعه وفى خده ، وقد أدخل زرار البيجاما الأول فى
العروة الثانية ، ونام فى عرض السرير ، رأسه مدلى ورجلاه
مرفوعتان على الحائط .

كان عاطف فى الثالثة ، نام وقد وضع يده تحت خده ،
وكور جسمه فدننت ركبته من ذقنه ، كان يرتدى قميصه
وبنطلونه المخمل الأحمر ، وفردة حذاء وجوربا أبيض فى رجل ،
ورجله الثانية عارية !

واتجه حسين الى عاطف ، وخلع له الحذاء والجورب ،
ثم أبعد خصلة الشعر الأصفر المتهدلة على وجهه عن عينيه ،
وجذب يده من تحت خده فى رفق ، فاذا به يتقلب فى فراشه ،
فخشى أبوه أن يستيقظ ، فوضع الغطاء فوقه ، وانسل من
جواره فى حذر وهو يتلفت .

وذهب الى مراد ، وحمله بين يديه ، ووضع رأسه على الوسادة ، ثم غطاه ، وقبل أن يتحرك رفس مراد الغطاء ، ودار نصف دورة ، فاذا برأسه يتدلى فى الهواء ، واذا برجليه ترتفعان وتستندان الى الحائط ، عائدا الى وضعه الأول .
فتناول الأب الغطاء وغطى به ابنه ، وهو فى وضعه ذاك ، دون أن يحاول اعادة رأسه الى الوسادة .

ويمم صوب سامى ، وسحب عليه الغطاء ، فاذا بسامى يهب من نومه مفزوعا ، وينكمش فى الزاوية البعيدة من السرير ، وقد فتح عينيه المحمرتين من أثر النوم ، وعلا رأسه شعره الذى كان أشبه بعرف الديك ، فبدا كأنما قد وقف من الخوف ، وراح يغمغم :

— هو .. هو .. هو . فى ايه ؟ فى ايه ؟

فقال أبوه وهو يجذبه فى رفق :

— نام .. ما فيش حاجة ..

نام سامى ، وسرعان ما أغلق عينيه ، فأسدل أبوه عليه الغطاء ، وتحرك عاطف فى سريره وتمطى ، فغادر الأب الغرفة هاربا .

ودخل غرفة نومه ، وفى طريقه الى السرير مر بمرآة ، فتفرس فى وجهه لحظة ، ومرر يده على شعره ، ثم هبط بها يتحسس التجمعات التى بدت فى صفحة وجهه ، ولاح فى عينيه

الأسى ، فقد مشت اليه الشيفوخة ولما يتجاوز الخامسة والأربعين !

وألقي بجسمه فى السرير ، وأغمض عينيه ، ولكنه أحس حركة فى الغرفة ، ففتح عينا واحدة ونظر فلمح عاطف قد أقبل ، فأغمض عينيه وتظاهر بالنوم .

وراح عاطف يتسنىق السرير ، ثم أراد أن يتخطى أباه النائمين ، فداس فوقه وغاصت رجله فى بطنه وحسين صامت لا يتكلم ، وان تحرك قليلا ليفسح له مكانا بينه وبين زوجته ، واندس عاطف بين والديه ، ووضع رأسه على الوسادة ، ثم وضع ساقا على أخرى وهو راقد .

وظل ساكنا لحظة ، وسرعان ما ضاق بذلك الصمت المسيطر على الغرفة ، فالتفت الى أمه فألفاها مغمضة العينين ، فمد يده يفتح لها عينها ، فتعلمت الأم فى نومها وأزاحت يده بعيدا ، فلم يرتدع ، بل استمرأ فعلته ، فاعتدل فى جلسته ليكون أمر فتح عيني أمه بيدبه ميسورا .

وضاقت أمه بالحاحه ، فأولته ظهرها لتبعد عينيها عن يديه ، فإذا به ينهض ويمططها ، فدفعته بمرسقا فسقط على أبيه الذى تلقاه بين يديه ، وحمله ووضع على الأرض ، وقال له :

— روح صحى نبيلة .

— ادينى قرش قبله .

— دلوقت لما أصحى •

— ما انت صاحى أهو • ادينى قرش بقى •

ونفض حسين واتجه الى حيث علق ثيابه ليعطيه قرشا ،
ويريح رأسه ، كان واثقا من أن عاطف لن يكف عن طلبه حتى
يأخذ ما يريد •

ومدت زينب يدها الى هالة تتحسسها ، وهى مغمضة
العينين حتى لا يفر النوم منهما ، وراحت يدها تتجول على
جسمها ، حتى اذا بلغت نهاية ظهرها ، تقلص وجهها تقززا ،
وفتحت عينيها وأزاحت الغطاء عنها ، ونهضت لتحمل ابنتها
وتغادر الغرفة •

وأخذ عاطف القرش ونظر اليه مليا ، ثم أعاده الى أبيه
وهو يقول :

— لأ ما اخدش ده ، عايز قرش مخروق •

وكانت الأم قد دنت منهما وهى تحمل هالة بين يديها ،
فقال لزوجها :

— ايه الدلع ده ؟ ما حد ح يتلف أمله غيرك •

فقال حسين لابنه فى زجر :

— ما فيش غير ده •

فراح عاطف يصيح فى بكاء :

— أنا مالى عايز قرش مخروق •• عايز قرش مخروق •

وكانت زينب قد غادرت الغرفة ، فاذا بها تصيح من
الحمام :

— عندك قرش مخروق تحت المخذة .

فابتسم حسين وقال :

— حنيئا !

وأخذ عاطف القرش وذهب الى حيث يرقد اخوته ، واقترب
من مراد وقال له وهو يمد يده بالقرش :

— خذ .. ادينى حاجه ..

فتح مراد عينيه فرأى القرش ، فرفع رأسه المتدلى وأنزل
رجليه من علي الحائط ، ونهض مسرعا ، وقبل أن يغادر فرائشه
كان قد التقط القرش بين أصابعه . وغادر الغرفة وعاطف فى
أثره ، واتجه الى صوان صغير فى الردهة ، وفتحه وأخرج منه
صندوقا من الورق .

بدأت الحركة تدب فى الشقة ، فقد استيقظت نبيلة ووقفت
على باب غرفتها ، واستيقظ سامى وظهر عند باب غرفته وقد
وضع فوطه فوق كتفيه ، ولمحته نبيلة فانطلقت مسرعة على
أطراف أصابعها كراقصة الباليه لتبلغ دورة المياه قبله ، فقال
لها سامى فى غيظ :

— آدى الى انت فالحه فيه .

فقالت له .

— أحسن منك ، مش فالح فى حاجه أبدا •
 وارتفع صوت الأم من الحمام :
 — اصطبحننا !
 فقال سامى فى عناد :
 — تعالى شو فى صابحه ترقص ازاي !
 وارتفع صوت نبيلة من بعيد :
 — باقول لك ما لكش دعوه بيه •
 واذا بصوت الأم يدوى :
 — وبعدين معاكو •
 وصمت سامى ونبيلة ، وصاح عاطف وهو يعيد قطعة
 السمسمة الى مراد :
 — مش عايز دى •• أنا أنقى ••
 وقدم مراد الصندوق الى عاطف ، وهو يقول :
 — خذ اللى انت عايزه •
 ومد عاطف يده ينتقى ما يريد ، وقال سامى وهو يضم
 الفوطه الى صدره :
 — مش ح تبطل التجارة دى يا مراد ؟
 فقال له مراد بصوته الخارج من كل حنجرته ، وقد نفرت
 عروق رقبته :
 — وأنت مالك •

وخرجت سوسن من غرفة أبيها وفي يدها قرش ، واتجهت
الى مرآد تشتري منه قطعة حلوى ، فقال سامى :

— الهف قلوس العيال •

فصاح مراد :

— يا ماما حوشى سامى •

فصاح سامى :

— يا ماما ح يعبى الأولاد بيحب حلاوة زى الزفت •

— مش أحسن م الحلاوة اللي بتحبها ؟

فقال سامى وهو يحاول أن يأخذ الحلاوة من يد سوسن :

— دى وساخه ••

فقالت له سوسن وهو تبعد يدها عنه :

— وانت مالك ؟

والتفت سامى الى مراد وقال :

— فيه خمسة صاغ تكسب خمسة وعشرين قرش ؟ •

دا نصب •

وارتفع صوت الأم :

— ما بس بقى يا سامى •• لازم تسموا حسنا للجيران

ع الصبح ؟

واستمر سامى فى هجومه ؟

— ح يعمل ايه بالفلوس دى كلها ؟ أهو بكره يركب بيها
عجل ويقطع هدومه •

وهتفت الأم فى ضيق :

— ما تقوم لولادك دول •• دى حاجه تقصر العمر •

وخرج الأب من غرفته ، وقال فى هدوء :

— ما بس بقى • يالا البس أنت وهو ما فيش وقت •

وسار سامى الى دورة المياه ، وسرعان ما ترددت أصوات
طرقاته على الباب ، وذهب عاطف الى الصوان يعبث فى
محتوياته ، وخلع مراد جاكته البيجاما وألقاها على الأريكة
الموضوعة فى الردهة ، وراح يخلع بنطلونها وهى فى سيره ، ثم
القاه على كرسي وغاب فى غرفته قليلا ، ثم عاد يصيح :

— مش لاقى فردة الجزمة •

وراح مراد يزحف على الأرض وينظر تحت المقاعد منقباً
عن حذائه ، ودخلت سوسن غرفة أمها وقالت :

— مش لاقية المشط •

وصاح مراد :

— المشط أهه تحت الكتبة ، آمال الجزمة فين ؟

فقالت سوسن :

— شفتها ع الترابيزه فى الأوضه المفروشه •

وأقبلت نبيلة على أطراف أصابعها ، ومرت فى حركة راقصة

بعاطف دون أن تلتفت اليه ، ثم انسلت الى غرفتها كالطيف
وقد بدأت فى خلع جاكته البيجاما •

وخرجت سوسن الى حيث كان مراد ، وأخذت المشط
الذى أخرجته من تحت الأريكة ووضعه فوقها ، وراحت تمشط
شعرها وهى فى طريقها الى المرأة ، ومرت بعاطف ، وراحت
ما يفعله ، فانطلقت الى أمها بسرعة ، وهى تصيح :

— ماما .. ماما .. الحقى عاطف •

— ماله ؟ !

— بدر علبة الخيط •

فأسرعت الأم اليه فاذا بخيوط حمراء وصفراء وسوداء قد
التفت على يده ، وامتدت منها الى البكر المبعثر على الأرض ،
فضربته على ظهره ، وهى تقول :

— هو انتو قرود !

وراحت تلتقط البكر وتلف كل خيط على بكرته •

وقامت أحلام من نومها تتمطى ، ولحمتها نبيلة فى المرأة
وهى ترتدى ثياب المدرسة وتصف شعرها ، فوجدت الفرصة
ساحة ليتحدث ، فاندفعت تحدثها عن المدرسة والمدرسات
والمدرسين ، وكانت تتكلم بحاجبيها وعينيها ويديها ، وتطول
وتقصّر وتمثل ، وتلفتت أحلام فى العُرفة فألقت ثياب نبيلة
المنزلية مبعثرة هنا وهناك ، فقالت وهى تنهض :

- ما تعلقى هدومك •
- فتلفتت نبيلة فى الغرفة ، ثم قالت وهى تسرع بالهرب :
- تأخرت قوى ••
- فقال أحلام وهى تاتقط بنطلون بيجامة نبيلة من الأرض .
- طول عمرك زواغه •
- وذهبت نبيلة الى حيث كان أبوها ، وقالت له :
- عايزه خمسة وعشرين قرش •
- ليه كمان ؟
- ح نروح رحله لسقاره •
- وبلغ ذلك الحديث مسامع سامى ، فخرج من غرفته مسرعا ، وهو يرتدى القميص ويدس رجله فى البنطلون ، وصاح :
- ما تديهاش يا بابا •
- فالتفتت اليه نبيلة فى غضب ، وقالت له مزمجرة :
- وانت ايش حشرك ؟
- ولم يأبه لاعتراضها ، بل استمر فى وسوسته :
- عايزه تجرى على حل شعرها مع البنات المايمة •
- وقالت نبيلة فى صوت خنقته العبرات :
- عاجبك يا بابا قلة الأدب دى ؟
- واستمر سامى فى هجومه :
- لو سمعت كل واحد فيهم وهى بتطق الضحكه ••

وصاحت الأم فى حدة :

— وبمدين مماكوا ؟ ! دا ما بقاش بيت .. دى سراية
مجانين •

ولم يزدجر سامى ، بل ازداد عنادا ، ورأى أبوه أن
يهاجمه حتى يسكت ، فمد يده الى الكرافة التى فى عنقه وقال
وهو يعبث فيها :

— هو نت مش ح تطفى لى حاجه ألبسها أبدا ؟ ! الشرابات
وقطعتهم ، والمناديل وضيعتهم ، ح تندار ع الكرافات ؟
فقال سامى فى هدوء :

— ما عنديش كرفات .. هات خمسين قرش اشتري
كرفاته •

فصاح أبوه فى وجهه ليبيعه ، حتى لا يلح فى طلب النقود :
— طب غور من وشى •

وانسحب سامى فى هدوء : وهو يسوى الكرافات ، ودنت
بسوسن من أبيها ترقبه ، فلما رأته يمد يده فى جيبه ويعطى
نبيلة خمسة وعشرين قرشا تشجعت وقالت :

— وأنا عايزه عشرة صاغ •

— علشان آيه ؟

— اشتري مسطره وكراسه وعلبة ألوان •

فصاحت الأم وهى تضع الحلمة المطاط فى فم هالة :

— هو كل يوم علبة ألوان ! فین العلبه الای جبتها أول
امبارح ؟

— كسرھا عاطف •

فقال الأب فی هدوء :

— العصر أجيب لك الكراسه والمسطرة وعلبة الألوان •

فقال فی بكاء تمثيلي :

— وانا مالى ... عندنا رسم أول حصه .. الأبله

تضرينى •

وناولها الأب عشرة قروش ، ورأى مراد سهولة دفع
النقود فأقبل وهو يصيح من حنجرتة :

— وانا عايز فلوس المجموعه ، الأستاذ طلبها امبارح قلت

له بكره •

فقال الأب :

— والنهارده قل له بكره •

فقال مراد وهو يلوح بيده فى ضيق :

— ايه ده ؟

ونظرت أمه الى حذائه الأصفر الذى ذهب لونه ، وقالت

له :

— دى جزمه تخرج بيها ؟

— ما قلت لكم عابز جزمه ما رضيتوش •

غالبت له الأم فى ضيق :

— حرام عليك دى ما بقلهاش شهر ، روح امسحها •

— ما فيش ورنيش •

— وللعلمه اللي اشتريتها امبارح ؟

— خلصت •

ولم ينتظر فى الغرفة ، بل انسحب يائسا ، ونظرت الأم
خلال الباب ، فلمحت أحلام تلتقط ملابس اخوتها المبعثرة فى
الردهة ، وتعيد تنسيق الأثاث فنادت :

— أحلام ، املئ !القل واعملئ الشاى •

وأقبلت نبيلة من غرفتها ، وقد وضعت حافظة كتبها على
عجزها ، وأسندتها بذراعها ، ودنت من أحلام وقالت لها :

— اشتغلى ما دام قعدتى فى البيت •

فالتفت إليها أحلام وقالت :

— بكرة تقعدى فى البيت انت رخره •

فقالت نبيلة فى تمثيل ، وهى تسير فى خطوات راقصة :

— لا .. دا مستحيل .. أنا ح ادخل الجامعة •

وخرج سامى من غرفته وقد أتم ارتداء ملابسه ، فقال وقد
!تخذ هيئة رجل :

— دا بعدك •

غصاحت نبيلة :

— يا ماما • خلى ائشيخ أبو العيون ده يسكت •

فقالت الأم :

— هو لولا العربيه اللي بتيجي تاخذك من باب البيت
وتجيبك لباب البيت كنت وديتك المدرسه ؟

وقال الأب لينهى هذه المناقشة قبل أن تحتدم :

— آمال عاطف فين ؟

فقالت سوسن :

— نزل الشارع •

فقالت لها الأم :

— انزلى هاتيه •

— أنا اتأخرت ، راحة المدرسه •

— ما تنزليش قبل ما تفطرى •• عندك جبنه رومى فى

النمليه ، اعملى يا نبيله لأختك سندويتش •

وتحركت نبيلة الى المطبخ تتبعها سوسن ، وسرعان ما لحق
بهما سامى ومراد ، وامتدت الأيدي الى وعاء الخبز ، ثم
امتدت فى تسابق الى الصحيفة التى وضع فيها الجبن ، فكانما
جراد نزل بحقل ولم يغادره الا بعد أن أصبح بيابا قفرا !

وارتفع صوت بوق سيارة ، فصاحت نبيلة وهى تجرى :

— عربيتى •

وراح سامى ومراد وسوسن ينسلون من المطبخ فى طريقهم

الى الباب الخارجى ، وصاحت سوسن قبل أن تخرج :

— ماما .. الجقى ، خلصوا الجبنه .

فأسرعت الأم الى المطبخ وهى تقول :

— يبقى جنان .. وأنا لسه مشتريهاها أمبارح .

ونظرت فوق بصرها على آثار المعركة ، فتأت من الخبز
تتأثرت على المنضدة القريبة من النملية ، وصحفة خالية وورقة
كانت الدليل الوحيد على أنه كان ملفوفا بها شيء به دسم ،
وضربت كفا بكف وعادت الى حيث كان زوجها وقالت :

— خلصوا الجبنه .

فقال فى هدوء :

— خايهم ياكلوا .

فقال فى استنكار :

— ياكلوا ! مش ناقص الا ياكلونا .

وكان الزوج قد أتم ارتداء ملابسه ، فنظر فى ساعته
وتحرك خارجا من الغرفة ، فصاحت الأم :

— أحلام ! هاتى الشاى لماما واقلى له بيضتين يفطر .

فقال الأب وهو سائر وزوجته خلفه :

— وانتو مش ح تفطروا ؟

— لسه بدري . لما نخلص مرار الشقه .

. وجلس على الأريكة الموضوعة فى الردهة ، وأسرت
 الزوجة ووضعت أمامه منضدة صغيرة .
 وجاءت أحلام تحمل كوبا من الشاي ، وجلست الزوجة
 بالقرب من زوجها ، وقالت :
 — ح تتغذوا ايه النهارده ؟
 — أى حاجه .
 وبدأ يرتشف الشاي ، فقالت :
 — ما تدوخوناش .. شوفوا تاكلوا ايه ؟
 وارتفع صوت أحلام من المطبخ :
 — فاصوليا بيضه .
 فقالت الأم فى استنكار :
 — ما احنا لسه طبخينا أول امبارح .
 فقال الأب :
 — اعملوا صينية بطاطس .
 فقالت الزوجة معترضة :
 — هو ما فيش الا الفاصوليا والبطاطس ؟
 فقال الزوج :
 — اطبخى الللى على نفسك .
 — لا ماتحIRONيش .. قولوا تاكلوا ايه ؟
 وأقبلت أحلام تحمل صينية صغيرة ، عليها رغيف وصحفة

من الألونيوم قلى فيها بيضتان ، وغطاء علبة بلاستيك وضع
فيه الملح ، وطبق فنجان شأى فيه قطعة صغيرة من الجبن
الأبيض ، ووضعت الصينية أمام أبيها •

ومد الأب يده الى الرغيف ، وإذا بصوت ارتطام حذاء
صغير بالبواب الخارجى يتتابع ، فقالت الأم لأحلام :
— افتحى •• عاطف طلع •

وأسرعت أحلام الى الباب وفتحته ، فدخل عاطف ، وجرى
الى حيث كان أبوه ، ونظر فى الصينية وقال :
— بتاكل ايه ؟

— بيض •• تعالى كل •

فقال عاطف وهو يهز أكتافه :

— لأ •• أنا عايز بيضه صحبه لوحدى •

فقالت الأم لابنتها :

— عندك بيض ؟

— أبدا •

فالتفتت الى عاطف وقالت له :

— اطلع شوف بيضه عند الفراخ •

وتحرك عاطف ، وقالت له أحلام :

— وإذا ما لقيتش بيضه ، استنى فوق لما الفرخه تبيض •

فقالت الأم فى حنان :

— ليه كده يا بنتى .. دى الشمس تقوره •
— لسه الشمس ما جتش فى السطح ، خلىنا نستريح
شويه •

وبكت هاله ، فأسرعت الأم الى حيث ترقد وهى تقول :
— والله ما ح نستريح أبدا •
ودخل عاطف المطبخ ، وأخذ كرسى مطبخ صغير ، وحمله
على كتفه ، ثم سار منطلقا نحو السطح •
كانت عشة الدجاج مصنوعة من سلك وخشب قابعة فى
ركن من السطح ، فذهب مهرولا اليها ، ونظر من خلال السلك ،
وأدار عينيه فى العشة ، فلم يجد بيضا ، فوضع كرسى المطبخ
بالقرب من العشة ، وجلس وقد أسند خده بكفه ، ينتظر أن
تجود عليه دجاجة بيضة !

وانتهى الأب من تناول الافطار ، وتأهب للخروج ، وإذا
بزوجته تقترب منه ، وقد حملت هالة على ذراعها ، وتقول له :
— ما قلتش ح تتعدوا ايه النهارده •
وأسرع هاربا وهو يقول :
— أى حاجه •

وأغلق الباب الخارجى خلفه ، فقالت الزوجة فى ضيق :
— والله بطننا دى محيرانا •

الفصل الثاني

أخذت الشمس فى الارتفاع ، وأرسلت أشعتها الحامية ،
وعاطف جالس على كرسى المطبخ بالقرب من عشة الدجاج ،
بتململ فى جلسته ، ويجفف عرقه بيده ، دون أن يتطرق اليأس
الى قلبه .

وارتفع صياح دجاجة ، فاذا بعاطف يقوم مسرورا ،
ويذهب الى العشة ينظر من خلال السلك ، فيرى الدجاجة
تبيض ، وراح يغدو ويروح أمام العشة فى قلق الوالد الذى
ينتظر وليده الأول !

وراح صوت الدجاجة يخفت ، فتيقن من أن البيضة تم
وضعها ، اكتسب خبرة من ممارسته الانتظار الطويل بالقرب
من العشة ..

وفتح باب العشة ، ودخل فاذا بالدجاج يفر منه مذعورا ،
واذا بصيحات الفزع ترتفع متتابعة ، فلم يلتفت الى ما يجرى
حوله ، بل سار الى هدفه والتقط البيضة وخرج .
وهبط فى الدرج مسرعا ، حتى اذا وصل الى باب الشقة ،

أخذ يركله بقدمه ، فأسرعت أمه تفتح له الباب وفي يدها مغرفة
بها أثر اللبن •

ونظرت اليه فألقت الدم يكاد يفر من وجهه • فمالته
تضمه الى صدرها بيدها الخالية تقول في حنان :

— يا حبيبي ! كنت في السطح في النفره دى ؟

فقال في فرح وهو يرفع يده بالبيضة :

— جيت بيضه •

— طب روح لأحلام تسلقهاك •

وأسرع الى المطبخ ، وعادت الى حيث كانت ، راحت تغرفه
من حلة نحاس لبنا تضعه في أوعية بلورية ، وعاد عاطف اليه
ورفع رأسه وسأل :

— بتعلمي ايه با ماما ؟

— مهلبية •

ولم ينتظر طويلا ، بل سحب كرسيا ، ووضع به بالقرب من
« البوفيه » الذي صفت فوقه أوعية البلور ، وراح يتسلقه ،
فقال له أمه في زجر :

— أبعد .. الحله تقع عليك •

— أشوف •

ووقف فوق الكرسي ينظر ، ولم يطق صبرا ، فمد يده
بحاول أن يأخذ المغرفة من أمه ، فقالت :

— عايز ايه بس ؟

— هاتى اعرف انا .

فصاحت الام :

— أحلام . تعالى خدى أخوكى ادى له البيضة بتاعته .
وأقبلت أحلام ، ترتدى ثوبا بسيطا ، فوقه « فوطه » من
البلاستيك ، وبقطر الماء من يديها ، وأرادت أن تجفف يديها فى
« الفوطه » ، ولكنها أخفقت لما كان البلاستيك ليمتص الماء ،
فجففتها فى طرف ثوبها ، ثم لفت ذراعها حول وسطه . وحملته
بين ذراعيها وعجزها ، وسارت به وهو يهز رجله سرورا .
انطلقت به الى المطبخ ، ووضعت على كرسى أمام المنضدة ،
وأحضرت له البيضة ، وهمت بتقشيرها ، واذا به يمد يده
ويأخذها منها ويقول :

— أنا اللي أقشرها .

وراح بقشرها ويرمى بالقشر على الأرض ، وأحلام غافلة
عنه ، فقد تحركت تحضر له كسرة خبز ، وعادت بالكسرة ،
ورأت القشر على الأرض ، فقالت فى زجر :

— وبعدين معاك .. هو احنا مش ح ننصف أبدا !

ووضعت كسرة الخبز أمامه ، وانحنى تلتقط القشر من
الأرض .

ولاحظت تساقط فتات صفار البيضة ، فرفعت رأسها تنظر

اليه ، فألفت عاطفا قد وضع البيضة كلها فى فمه ، وأخفق
حلقومه فى ابتلاعها !

وأسرعت تملأ كوب ماء ، ثم عادت اليه مهرولة وهى تقول :
— أشرب .. ح تموت نفسك •

وشرب ، واختلط الماء بصفار البيضة فى الكوب ، فقالت
أحلام فى تقزز :

— أنا عارفه ايه القرف ده ! ؟

فقالت أمها وهى عائدة الى المطبخ تحمل الحلة الفارغة
والمفرقة :

— آهو كلكم اتربيتوا بالمرار ده •

وغادر عاطف المطبخ ، وذهب الى الكرسي الذى وضعه
بالقرب من « البوفيه » وتسلقه ، وراح ينظر فوجد أن أمه قد
وضعت زيبيا وفستقا على سطح المهلبية ، فأخذ يلتقط الزبيب
والفستق ويلقى بهما فى فمه ، ولم يكتف بذلك بل راح يعبث
بأصبعه فى المهلبية •

وجاءت أمه ، ورأت فعلته فحملته بين ذراعيها فى غضب ،
ووضعت على الأرض فى شدة ، وهى تصيح فيه ،

— غور من وشى قبل ما اقطم رقبتك •

وراحت تصلح ما أفسد ، وسرعان ما تجاوب رنين الجرس ،

فهرعت الى الباب وفتحته : فاذا بسوسن قد عادت من مدرستها ، فقالت لها أمها زاجرة :

— مش ح تبطلى تحطلى صباك ع الجرس على طول ، والله لو صحيت هاله ما حد ح يشيلها غيرك •

فحركت كتفيها فى عدم اكتراث ، واتجهت الى غرفتها لتبدل ثيابها • وفيما هى فى سيرها لمحت عاطفا يعبث فى « التواليت » فعادت الى أمها مهولة وهى تصيح :

— ماما •• ماما •• الحقى عاطف دلِق البودره ، وحط الفيزلين فى رأسه •

— ابعديه •

— مش عايز •

وأسرعت الأم الى عاطف ، تبعده عن التواليت ، وتجمع البودرة المندلقة ، فاذا بهالة تستيقظ ، وتبدأ فى البكاء ، فقالت الأم :

— سوسن •• سكتى أخذك •

فذهبت سوسن الى هالة وحملتها ، ورفعت الأم عاطف بين يديها ، وذهبت به الى الحمام ، ولمحت سوسن فيلا من الجلد على ظهر الصوان ، فخطر لها أن تحضره لتلاعب أختها به ، فوضعت هالة على حافة السرير ، وجاعت بكبرى ووضعت بجوار الصوان ، ووقفت فوقه ولكنها لم تصل الى الفيل ،

فجاعت بصفيحة بها « قراقيش » وبسكويت ووضعتها فوق الكرسى وتسلفت حافة الكرسى فى حذر ، وهمت بالوقوف فوق الصفيحة ، فاذا بها تسقط على الأرض ، وقد أحدثت دويا ، وتناثر البسكويت والقراقيش ، ففزعت سوسن ، وهرولت فرارا من أمها الى السطح • وتركت الأم عاطفا ، وأسرعت ترى ماذا جرى ، وهى تصيح :

— يا شياطين •• يا ملاعين •• يا قرود •

وصاح عاطف من الحمام فى بكاء :

— الصابون بيحرقنى فى عينيه •

فنادت الأم وهى فى عودتها اليه :

— أحلام •• تعالى لى القراقيش والبسكويت •

وقالت أحلام فى صوت عال :

— ولما الحله اللى ع النار تشيط !

وذهب الى الحمام ، وراحت تغسل لعاطف وجهه ويديه •

واذا بهالة تضج بالبكاء فارفع صوت الأم :

— بس •• بس •• أنا جايه أهو •• أنا عارفه يارب ليه

دوختنى ••

وذهب الى هالة وحملتها ، ثم راحت تجمع ما انتثر من

البسكويت والقراقيش ، وجاء عاطف خلفها ، فقالت له :

— لم معايا •

فانحنى عاطف ، والتقط بسكويته ووضعها فى فمه ، فقالت له فى حنان :

— باقول لك حظ البسكوييت فى الصفيحه مش فى بطنك • .
وتهللت أسارير عاطف ، وعكف على التقاط ما انتثر ووضعها فى الصفيحة •

وأطمأنت سوسن الى أن نورة أمها قد خمدت ، فعادت الى المطبخ ، وراحت تعبت بالقرب من النار ، فقالت لها أحلام :

— ابعدى قبل الفار ما تمسك فى شعرك •

فتأخرت خطوات ، وما لبثت أن تقدمت الى النار ، وفى يدها عود من قش المقشنة تدنيه منها ، فصاحت أحلام بها :

— اخرجى من هنا •

وخرجت سوسن مطأطئة الرأس ، وجلست على الأريكة ، ولم تطق الصمت طويلا ، فتلفتت فوق بصرها على المقص ، ففتاولته وأحضرت صحيفة ، وراحت تقصها « عرائس » وما انقضى طويل وقت حتى كان المكان قد غطى كله بقصاصات الورق •

وخرجت الأم من غرفتها تحمل هالة ، ويسير خلفها عاطف وقد أمسك بملابسها ، فرأت قصاصات الورق تغطى الأرض ، فصاحت :

— يا مقصوفة الرقبه ، والله لانا عدماكى •

فتركت سوسن المقص ، وأطلقت ساقها للريح ، وراحت
تعدو نحو السطح ، وأخذت الأم تجمع القصاصات ، ولمح
عاطف المقص فتناوله ، وحاول قص غطاء الأريكة ، ولمحته أمه ،
فأسرعت تنتزع منه المقص وهي تصيح :

— هو انتو عفاريت ، اخلصى يا أحلام ، وخدى هاله
شويه •

— ح أنزل الحله وجايه •

وجاعت أحلام وحملت هالة ، وذهبت الأم تلقى قصاصات
الورق ثم عادت وقللت لأحلام :

— خدى اخوانك فى أودتكم لما أريح شويه •

وأخذت أحلام هالة وعاطف ، وذهبت الى حجرتها بينما
تمددت الأم على الأريكة ، ولفت ذراعها فوق وجهها ، وما كادت
تنعم بالاسترخاء حتى أقبلت سوسن صائحة :

— ماما •• ماما •• الحقى مراد بيتخانق مع ثلاث اولاد
•• ح يموت فى ايديهم •

وهبت الأم من رقدتها ، وخفت الى الشرفة فاذا بها ترى
ابنها بين ثلاثة اولاد ، قد ضربوا حوله نطاقا ، اذا دفع
أحدهم ليشق طريقه بينهم ، دفعوه الثلاثة مرة واحدة ، فيختل
توازنه ويترنح ، فلم تطق صبيرا بل صاحت فى الأولاد :

— ما تسويه يا واد انت وهو •

فقال أحدهم وهو يرفع رأسه إليها :
 — خليه يديننا البرايه بتاعتنا •
 — ما تديهم البرايه يا مراد •
 فقال مراد متشجعا لما سمع صوت أمه :
 — مش ح اديها لهم الا لما يدونى المسطره والقلم
 الرصاص •
 ولحت سامى مقبلا ، فهتفت :
 — سامى • هات اخوك واطلع •
 ودنا سامى منهم ، فقال له مراد :
 — واخدين منى المسطره والقلم •
 فقال الثلاثة معا :
 — وهو واخذ مننا البرايه •
 فقال سامى :
 — هات البرايه •• هاتوا القلم والمسطره •
 وناولهم المبراة ، وأخذ منهم المسطرة والقلم ، ودفع أخاه
 أمامه وهو يقول له :
 — ياللا يا خايب •
 فصاح فيه مراد :
 — ايه •• ما لكش دعوه بيه •
 وقالت الأم لهما من الشرفة :

— اطلع انت وهو ، والا عايزين تفرجوا الناس علينا !
وعادت الى الأريكة ، وتمددت فيها ، وداعب الوسن عينيها ،
واستشعرت طعم الراحة ، واذا بأصوات مراد وسامى
وسوسن تمترج وتصك أذنيها صكا فتصيح دون أن تفتح
عينيها :

— ما بس بقى .. هو ما فيش فى البيت ده راحه ؟
واستأنفت نومها ، ولكن سرعان ما أقبلت سوسن ، تقول :
— ماما .. ماما .. أكل .

ودفعتها بيدها لتبعدها عنها ، واذا بعاطف يقبل هاتفا :
— ماما .. جعنا .

فنادت الأم :

— أحلام ، تعالى أكلى اخراكتك .
وأقبلت أحلام ، ودفعت بهالة الى مراد ، وانسلت الأم
الى غرفة نومها ، وارتمت فى سريرها .

ووضعت أحلام لعاطف قليلا من الأرز فى صحفة صغيرة ،
ورشت فوقه ملوخية ، وأرادت أن تطعمه ، ولكنه أمر على أن
يأكل وحده ، فتناول الملعقة وجعل يعبث فى الأرز ، وطلبت
سوسن أن يغرف لها الأرز وحده ، والملوخية وحدها ، ثم
قالت :

— وحطى لى حته لحمه سمينه .

فقال أحلام فى زجر :

— وطى صوتك بلاش قلة أدب •

ونظرت سوسن إليها فى دهش ، فما كانت تدرى ما الخطأ
الذى ارتكبته • وتتأثر الأرز على صدر عاطف ، وعلى المنضدة :
وعلى الأرض ، ولما امتلأ راح يقرع الصحيفة بالملقعة •

ونادت أحلام :

— مراد •• سامى •• أغرف لكم ؟

فقالا معا :

— لا •• لما ييجى بابا •

والتفت سامى الى مراد وقال له :

— ح تاكل معنا بنيدك الزيت دى ؟ • روح اغسلهم •

— طب خد هاله •

— وانا مالى •

فوضع مراد هالة على الأريكة ، وذهب يغسل يديه ويحاوله
أن يزيل الحبر منهما دون جدوى ! وارتفع بكاء هالة ، فتململت
الأم فى رقدتها ، وخرجت أحلام من المطبخ تحمل عاطفا وقد
تلوث وجهه وثيابه بالمنوخية ، وقالت لسامى ، الذى خلع ثيابه
ووقف بفانلة سبور وينظرون البيجاما :

— سكت هاله •

— وانا مالى •

— طُلب خذ عاطف شطفه •
 — أmaal انتم بتعملوا ايه فى البيت ؟
 — طُلب اسكت بلاش غلبه •
 وارتفع صوت مراد وهو يغسل يديه مشتركاً فى الحديث :
 — كفايه عليه يعمل ريس فى البيت •
 وصاحت الأم من غرفتها :
 — والله يا سامى ان ما شلت أختك لقايمه ومخليه نهارك
 ترى وشك •
 وخرجت سوسن من المطبخ ، وحملت هالة ، فصاحت أحلام
 غيبها :
 — بتشيلها بايديكى الوسخه ؟
 فوضعتها سوسن على الأريكة ثانية وهى تقول :
 — أنا مالى • الحق على •
 كان مراد قد يئس من تنظيف يديه ، فمسحهما تحت ابطينه
 وأسرع يحمل هالة •
 وسارت أحلام الى الحوض ، وهى تبعد وجهها عن يدي
 عاطف ، فقد كان يحاول أن يعبث بشعرها بيديه الملوثتين
 بالملوخية •
 ورن جرس الباب الخارجى ، فذهب سامى اليه فى تودة

وفتحه فاندفعت نبيلة داخله ، وهى تطوح حافظة كتبها فى
يدها ، ورأحت تتحدث :

— يا سلام لو شفتم اللي عملناه النهارده فى أبو الأسود
الدولى ، دخل الفصل وقال لنا : « العواف » قلنا له : « الله
يعافيك يا افندى » قال : « درس النهارده فى المفعول لأجله »
قلنا له : « ما تحكى لنا الروايه اللي شفتها فى السينما امبارح
أحسن يا افندى » قال : « ايش عرفكم انى كنت فى السينما ؟ »
قلنا له : « أمانى شافتك يا افندى ، وبالأماره كنت قاعد قدام
خالص يا افندى » قام قال : « أنا باقعد قدام علشان نظرى
ضعيف » قلنا له : « بقى مش علشان آخر الشهر يا افندى ؟ »
وكانت نبيلة قد وصلت الى باب غرفتها ، فقال لها سامى :

— ما كفايه بقى ، اقفلى الراديو ده .

فالتفتت اليه نبيلة وقالت فى حركة تمثيلية :

— وانت مالك يا بايخ ! هو أنا باحكى لك ؟

— آمال بتحكى مين ؟

— باحكى لأحلام .

ورن جرس الباب الخارجى ، فصاحت سوسن وهى تهزول
نحو الباب :

— بابا جه .

وتخلص عاطف من يدى أحلام وراح يجرى خلف سوسن ،
وهو يصيح :

— أنا اللى ح افتح له •

واستبقنا الى الباب ، وفتحته سوسن قبله ، فراح عاطف
يسبها :

— يا قليلة الأدب •• يا سافله •

وقبل أن يستمر فى سبابه ، لمح أباه يحمل كيسا ، فأسرع
تاليه وقال له :

— ايه الى معاك ده ؟

— حاجة حلوه •

— طب ورينى •

— لما أدخل •

— طب هات أشيلها •

فقال سوسن :

— لا أنا اللى أشيلها •

وأسرع سلمى ومراد وهو يحمل هالة ليريا ما الذى أحضره
أبوهما • ودخل الأب الى غرفته ، وأبناؤه خلفه حتى أحلام
ونبيلة لحقتا به ، واعتدلت الأم فى السرير ، وقالت :

— ايه ده ؟

فقال الأب فى نشوة :

— تفاح •

فقالَت الأم وهي تغادر الفراش ، وتمد يدها إلى الكيس
لتستولى عليه :

— ما لو ش لازمہ النهارده • عندنا مهليه •

فصاح عاطف وسوسن ومراد وسامى :

— احنا مالنا عايزين تفاح •• تفاح •

وقالت الأم فى استسلام :

— أحلام هاتى السكينه • •

وذهبت أحلام وعادت بالسكينه ، وأخذت الأم تشق كل
تفاحة نصفين ، وتدفع إلى كل من أبنائها نصف تفاحة ، فعضب
عاطف وقال :

— ما اخدش نص ، أنا عايز تفاحة بحالها •

فصاحت الأم فى غضب :

— ما فيش الا كده •

وغضب عاطف وخرج من الغرفة يبكى وأبوه يتبعه بعينيه
فى أسى ، كان يريد أن يدخل البهجة على قلوب أبنائه ، فاذا
به لا يجلب معه الا النكد •

وأخذ كل منهم نصف تفاحته وهو صامت ، وان كانت
وجوههم تنطق بعدم الرضا ، وقالت الأم :

— خلوه لبعد ما تاكلوا حلوا بيه •

ولكن مراد وضع نصف التفاحة في فمه ، وراح يلوكها ،
وقالت الأم :

— أحلام .. نبيلة وضبوا السفرّة •

وخرجت أحلام ونبيلة يتبعهما سامى ومراد ، وجاء عاطف
يتمسح ثم قال وهو يمد يده :

— طب هاتى •

ودفعت اليه نصف تفاحته ، وهى تربت على كتفه ، فقال
لها :

— مش أنا حلو بقى ؟

فقالت فى حنان :

— قمر •

وراح الأب يخلع ثيابه ، ودنت منه وقالت له :

— يا راجل اعقل • بلاش تبخير •

فقال فى هدوء :

— دى الحكايه كلها وقه •

— أوعى لنفسك • طالع لك بنات ، ح يعوزوا تقلمهم •

— ربنا هو اللى بيرزق •

— والله ما انا عارفه لو واحده فيهم اتخطبت ح تعمل فيها

ليه ؟

— يبقى وقتها يعين الله •

— أنا عارفه ما بيعجبكش كلامى • كل واحد ما بيعجبوش
الا عقله ، قال على رأى المثل •

وصممت الأم وتحركت لتغادر الغرفة ، فقال الأب وهو
يرتدى جاكته بيجامته التى تختلف فى لونها عن البنطلون :

— ما تكلمى المثل : لو جابوا للمجنون ألف عقل على عقله
ما يعجبوش الا عقله •

فقالت وهى تخرج :

— أنا ما قلتش انت اللى قلت •

وارتفع صوت أحلام :

— اتفضلوا الأكل جهز •

ونادى مراد :

— سوسن تعالى خدى هاله خلىنى أكل •

وأقبلت سوسن وحملت هالة ، وإذا بعاطف يقبل ويجذبه
سوسن من ثوبها :

— هاتيه أنا اللى ح اشيها •

وصاحت سوسن :

— ماما •• ماما •• الحقى •• عاطف ح يوقع هاله •

وقالت الأم :

— ادخلوا أودتكم ولعبوها سوا •

وجلس الأب والأم وأحلام ونبيلة وسامى ومراد حول

المائدة ، وامتدت الأيدي فى تؤدة ، ثم أخذت سرعتها فى
الازدياد ، فبدأ أنها كانت فى سباق ، وان هى الا لحظات حتى
كانت الصحاف نظيفة كأنما قد غسلت •

ونهمضوا يتسابقون الى الحوض ، غسلت نبيلة يديها ومراد
وسامى خلفها يتربعان ، ودلفت الى غرفتها ، فصاح سامى :
— أيوه زوجى •
— وأنت مالك ؟

وبلغ ذلك الحوار مسامع الأم ، فنادت :
— نبيلة ، تعالى اغسلى الأطباق دول ، أختك اتهد حيلها
م الصبح •

فقالت نبيلة وهى تختفى فى حجرتها :
— يا ماما ورايا مذكركه كثير •

وراحت أحلام تحمل الصحاف الفارغة الى المطبخ ، والأم
تهدر :

— ايه الكلام الفارغ ده : خشى نامى وسيبى الخدامين
يخدموكى ، طب والله العظيم ما ح تغسل أحلام الأطباق دى ،
ولو دودوا ، ذا ظلم دا كفر •

ونهمض الزوج ، ودخل الى المطبخ ، وشمر عن أكمامه ،
وراح يغسل الصحاف ليحسم الموقف ويريح رأسه !
ودخل كل الى غرفته ليستريح بعد الغداء ، ودخل الزوجان

ونفض الزوج : ودخل الى المطبخ



حجرتها ، وأغلقت بابها وتمددا في الفراش ، وأسلمت الأم جنبها للرقاد . وما أن بدأت الراحة تمسح بيدها الحنون تعبها حتى أقبل عاطف يدق باب الحجرة بيديه في قوة ، فنهضت وفتحت الباب ، وحملته ثم عادت به وأنامته الى جوارها ، فسكن قليلا ، وما لبث أن تقلب في الفراش ، وأخذ ينظر في وجهها ، فضايقه أنها مغمضة العينين : فمد يده يفتحهما ، فدفعت يده تبعدها عن عينيها ولكنه كان كالذباب اللحوي ، كلما أبعدت يده عن وجهها ، عادت تمبث بعينيها أو شعرها أو أنفها .

ومد أضبعه وأدخله في أذنها ، فنفد صبرها ، فحملته وانطلقت به الى حيث كان مراد وسامي وسوسن ، وقالت لهم :

— فمين كرتة ؟ العبوا معاه .

وقالت سوسن :

— ماما .. خدى هاله .

وقالت الأم وهي تسرع الى غرفتها :

— ادبها لنبيله .

وأغلقت الباب خلفها وارتمت في الفراش ، وانقضت دقائق من الهدوء واذا باب الغرفة يفتح ، وصوت سوسن يرن فيها :

— ماما .. ماما .. الحقى .. مراد شاط الكوره طارت

ع الشارع .

وكان النوم أغلى من الكرة فلم تتبس الأم بكلمة ، وتقلب

الأب متبرما ، ثم سحب الغطاء وأخفى وجهه وأذنيه ، حتى لا يسمع •

وانسحبت سوسن ، وكأنها عز عليها أن تعود مهزومة ، فقالت لمрад :

— ماما جايه لك •

ومرت لحظات هنيئة كلها هدوء وصفاء ، تبعها صوت باب يصفق فى قوة ، ثم انهيار زجاج ، فقفزت الأم من نومها مفزوعة ، وانطلقت مرعوبة ، فاذا بها تجد عاطفا واقفا وهو مدهول وقد تنثر حونه زجاج الباب ، وارتفع صوت الأب مستفسرا :

— جرى ايه ؟

— عاطف كسر قزاز الباب •

فقال الأب فى ضيق :

— هو كل يوم لوح قزاز ؟

وقالت الأم فى راحة :

— الحمد لله ربنا ستر ، لو وقع عليه كان قتله •

وبكت هالة ، فذهبت سوسن اليها وأخذتها من جوار

نبيلة ، ثم انطلقت الى أمها وقالت :

— ماما .. ماما .. بخدى هاله •

فقالت الأم فى زجر :

- ابعدي دلوكت .. انتى عميتى ؟
 — بتعيط •
 — اديها لابوكى •
 وعكفت الأم على النقاط الزجاج المتناثر ، وهى تبعد عاطفا عنه ، وانسلت سوسن ائى غرفة أبيها ، وقالت :
 — بابا .. خد هاله •
 واستيقظ الأب ، وحمل ابنته ، ثم خرج بها الى المطبخ ، يعد لها زجاجة لبن •
 وعاد الأب مسرعا ووضع هالة فى سريرها ، وألقمها الحلمة المطاط ، وطفق ينظر اليها وهى تمتص اللبن فى حنان •
 ودلفت الأم الى الحجرة ، وأغلقت الباب خلفها ، ووقفت ترمق زوجها وابنتها برهة ، ثم تقدمت منهما وقالت :
 — قول لى : بتحب البننت دى قوى كده ليه ؟ •
 فقال وهو يبتسم :
 — بنت الشيبه •
 جلست على طرف السرير وقالت :
 — الا الواحد بيحب آخر ولاده ليه ؟
 فاعتدل وقال وهو يفكر :
 — يمكن عشان بيقى هاسس انه ح يتحرم من عطفه بدرى •
 ومرر يده بحنان على جسم هالة وقال :

— يا ترى مين اللي ح يربيكى ؟

فقالت الأم فى سرعة :

— ما ح يربيهها ويجوزها غيرك •

فقال الأب وقد شرد ببصره :

— مش باين •

فقالت الأم وهى تجذبه من طرف بيجامته :

— طيب نام بقى والنبي ما تمغصش بطننا •

وتمددا فى السرير ، ولزم الزوج الصمت ، وظهر القلق فى وجه الزوجة ، وأرادت أن تنزل الطمأنينة بصدرها ، فقالت :

— هو انت مش زى ابويا ، أبويا عاش لما جوزنا كلنا ••
عندك ٤٥ سنة وكمان ستاشر سنة لما تتجوز هاله يبقى عندك
٦١ سنة ، مش ح تعيش ٦١ سنة ؟ !

— الأعمار بيد الله •

— لما يبقى عند هاله ستاشر سنة ح اجوزها على طول ،
مش ح استنى ولا يوم •

— ما تقولش الخطاب واقفين على الباب !

فمدت يدها ومررتها على شعره ، ثم رفعت صدرها
وانحنى فوقه ، وقبلته قبلة على خده أودعتها كل حبها •

وأغمضا عيونهما ، وراحا فى سبات •

ونهضت أحلام ووقفت أمام المراة تصفف شعرها ، ثم
فتحت درجا وأخرجت حلقتها ، ثم صاحت :
— ايه القرف ده ! مين اللي كسر الحلق ؟
فقالت سوسن :
— عاطف كان بيلعب بيه •
وراحت تعبث فى الأدرج ثم قالت :
— فين السيكوتين ؟
فقالت نبيلة ، وهى ترتدى ثيابها ، وتقرب وجهها من المراة
وتتحرك فى خطوات راقصة :
— كان مع سامى •
وأقبل سامى متحديا :
— كنتى شوفتيني خدته ؟
— مش كان فى ايدك الصبح !
— ما تبطللى الكذب بأه •
— ما حد كذاب غيرك •
ونظر اليها مليا وقال :
— وبتروقي وراحه على فين ؟
— مش شغلك •
واستيقظ الأب والأم على صياحهما ، ولكنهما ظلا فى
الفراش ينصتان ، وقالت أحلام :

- نبيلة جايه معايا ، رايعين نزور فايزه صاحبتى •
- فاتخذ سامى هيئة رجل وقال :
- ما عندناش بنات يفرجوا لوحدهم •
- فقال نبيلة فى ضيق :
- وأنت مالك يا بايخ ؟
- فقال سامى فى اصرار :
- اذا كانت أحلام ح تروح لفائزه أنا ح اروح معاها •
- وهز الأب رأسه معجبا ، ورفعت على فمه بسمه رضا ،
- وتحركت الأم فى فراشها وجلست متحفزة ، وارتفع صوت
- نبيلة متحديا :
- ج.أروح غصبت عنك ••
- مش راحه •
- وصاحت نبيلة :
- هو أنت أبويا ؟ !
- وقال الأب لزوجته :
- ما تخرجى لأولادك دول •
- زقنى وخليك بعيد ، لما العيال كرهتقى •
- وصاحت نبيلة :
- يا ماما ، ما تحوشى الشيخ أبو العيون ده !
- وقالت الأم وهو تفتح الباب :

— دانتو بنتين ، ترجموا فى الضلمه لوحدكو ازاي ؟
 فقالت نبيلة فى ثورة :
 — وفيها ايه يعنى ما دام أنا واثقه من نفسى ؟ !
 وقال سامى ساخرآ :
 — واثقه من نفسى ! •
 ودارت نبيلة على عقيبتها ، والتفتت اليه متحدية وقالت :
 — آه واثقه من نفسى ، آمال زيك •• ح تسكت والا اتكلم
 انسفك ؟
 فقال سامى فى تخاذل :
 — ح تقولى ايه يعنى ؟
 ونهض الأب ووقف بالقرب من الباب يصغى •
 — ح اقول ع السجاير الى بتشريها •
 وخرج الأب من غرفته ليشترك فى المعركة ، وقال :
 — سجاير ؟ والله عال مش فاضل الا السجاير !
 وصاحت الأم :
 — اياك نكفيكو عيش ، قال سجاير قال •
 وأحس سامى أنه وقع فى المصيدة ، فقال صارخا •
 — كدابه •• والله كدابه ••
 فقالت نسله ، وهى تدنى وجهها منه فى حركة تمثيلية :
 — والسيجاره اللى كنت بتشريها بالليل ؟

— دی سیجاره حلاوه اشتریتها من مراد ، مش كده
يا مراد ؟

فقال مراد فى بساطة :

— أبدا .. ما حصلشى •

فثار سامى وقال :

— يا كذاب .. بتتكر عشان تبقى تشتري منك !

فقال مراد وهو يهز كتفيه :

— ما خلاص التجارة فلسـت •

فقالت 'ه أمه فى زجر :

— قول الحق •

فقال مراد وهو يبتسم :

— الحق .. الحق .. أنا اللي اديته السيجاره •

فلطمته أمه على وجهه وقالت :

— آمال بتكدب ليه ؟

فقال مراد وهو يتحسس وجهه بيده •

— الحق على اللي قلت الحق •

وقالت الأم :

— اذا كانت أحلام خارجه ما حدش ح يخرج معاها

الا سامى •

فقالت نبيلة فى غيظ :

— يا سلام ! عشان ما هو ولد ؟
فقال لها سامى وهو يخرج لها لسانه :
— راجل •

واتجهت نبيلة الى أحلام وقالت لها :
— طب هاتى بلوزتى بقى •
فقالَت الأم :

— وبعدين معاكى يا نبيلة ؟
— مش عايزه حد يلبس هدومى •
فقال سامى وهو يرتدى ملابسه ، ويسرح شعره :
— لو كتنى ح تروحى معاها كتنى أديتها لها •
— ما لكش دعوه يا بايخ •

خلعت أحلام « البلوزة » وألقت بها فى وجه نبيلة ،
وراحت ترتدى بلوزة أخرى ، وأنتهى سامى من ارتداء
ملابسه • ودخل غرفة أحلام فرآها تمرر أصابعها على شفتيها
فقال لها :

— ان حطيتى أحمر فى شفايفك مش ح امشى معاكى •
فقالَت له نبيلة :
— جتك انقرف فى شكلك •
فأخرج لها لسانه ، فتركت له الغرفة وانصرفت •

وتحرك سامى وأحلام ، وسار عاطف خلفهما ، حتى اذا
ما فتح الباب تقدم عاطف ليخرج ، فصاحت سوسن :
— ماما .. ماما الحقى • عاطف خازل الشارع •
— سيبيه يتهوى •

واغتاضت سوسن ، فقالت :
— أنا مالى .. أهو دلوقت يوسخ هدومه •
وذهبت الى حافظة كتبها القماش وحملتها واتجهت الى
حيث ذهبت تبيلة • ولمحت مراد يعبث فى الصوان ، فقالت له :
— مش ح تذاكر ؟

فقال لها بصوته المنبعث من حنجرتة ، وقد نفرت عروق
رقبتة :

— ايه ! ما ادينى بدور على كراس فاضى أهو •
وعثر مراد على الكراس ، وانطلق خلف سوسن •
وتحرك الأب ليغادر غرفته ، وقبل أن يخرج التفت الى
زوجته وقال لها :

— وراكى ايه النهارده ؟
— المرار اللى ما بيخلصش ، ح اخيط شرابات العيال ،
واركب لهم الزراير •

وبدأت تحمل كومة من القمصان ، وعلبة رصت فيها
الجوارب الممزقة ، وقال الزوج :

— أنا ح أقرا الجرنال •

— لا • وراك شغل كثير •

— ورايا ايه ؟

— جزم وصنادل العيال عايزين يصلحوا أهم عندك ورا

الباب :

ونظر خلف الباب ، فرأى صندوقا من الورق المقوى ،
تكدست فيه أحذية الأولاد وصنادلهم ، فحمل الصندوق ،
وانطلق الى الردهة الخارجية ، ووضع الصندوق على الأرض ،
ثم اتجه الى المطبخ ، وأحضر كرسيا قصيرا صنع من الخشب ،
وعلبه صفيح بها خيط وسكينة أحذية وابر ومسامير وقدم ،
وحمل سندانا مما يستعمله من يقومون بإصلاح الأحذية وذهب
الى الردهة •

وجلس على الكرسي ، وقد وضع السندان أمامه ، ومد يده
فى الصندوق وأخرج حذاء سوسن وراح يقلبه فإلفاه مفتوقا ،
فوضعه على فخذه ، ومد يده فى العلبة الصفيح يأخذ الابرة •
وأقبلت الأم ووضعت كوم القمصان على الأريكة ، ثم
جلست ترفو الجوارب وهى تنتظر الى زوجها بين لحظة وأخرى ،
وهو منهمك فى خصف نعال أبنائه ، والتقت عيونهما مرة ،
فابتسم الزوج وهو يغمز بعينه :

— صنعه فى اليد •

الفصل الثالث

أتى المساء • وانتهى حسين من اصلاح أحذية أبنائه ، وأتمت زينب تثبيت الأزرار واصلاح الرتوق وورغو الجوارب ، فقامت تحمل البنطلونات والقمصان على رأسها ، وعلبة الخيط والجوارب فى يديها ، وسارت قليلا ثم توقفت والتفتت خلفها وقالت :

— والنبي يا حسين تكوى للأولاد قمصانهم •

ووضعت علبة الخيط تحت ابطها ، ومدت يدها تسحب القمصان من فوق رأسها ، وتدفع بها الى زوجها •

تناول حسين منها القمصان ، وأخرج من الصوان مكواة كهربية ، ومفارش وأغطية راح يفرشها فوق المنضدة ، وجاء بكوب ماء ، وأخذ يملأ فمه بالماء ويرشه على القمصان ثم يكوها ويضعها على المنضدة •

وبدا فى الكى ، واذا بصوت سوسن يرن فى الردهة :-
— بسم الله الرحمن الرحيم • قل أعوذ برب الناس ، ملك

الناس ، آله الناس ، من شر الوسواس الكناس •

فصاح الأب وهو مستمر فى عمله :

— الخناس يا سوسن •

فأصلحت سوسن خطأها واستمرت فى القراءة :

— من شر الوسواس الخناس ، الذى يوسوس فى صدور

الناس •

وكانت الأم قد انتهت من وضع البنطلونات والجوارب فى

أماكنها وأقبلت ، فقالت لزوجها :

— الخناس يعنى آيه ؟

فشرد حسين وقال :

— الخناس ؟ .. الخناس ؟ .. هاتى مختار الصحاح نشوف

معناها بالضبط آيه ، وهمت بالتحرك • وإذا بزوجها يقول :

— ولا مالوش لزمه •

— ليه عرفت معناها ؟

— أبدا ، بس ح نتعب نفسنا من غير لزمه • • ما فيش كلمه

دورت عليها فيه الا لقيت مكتوب الشئ الفلانى « معروف » •

— يعنى آيه معروف ؟

— يعنى سهل قوى ، مش محتاج لشرح ، الناس كلها

عارفاه •

— طب والنبى لما اروح اثوف شارح « الخناس » بايه •

واتجهت الى غرفة الاستفكار ، انها غرفة بسيطة ، بها مكتب واحد متواضع ، وصوان صفت فيه الكتب ، لا ضلف له . أسدلت عليه ستارة ، وقد جلست نبيلة خلف المكتب ، بينما انبطح مرآد على وجهه على الأرض ، وقد بسط أمامه كتاب الحساب وكراسة ، وجلست سوسن على كرسى من القش ، ترتل القرآن وتهز رجلها .

ونظرت الأم ، فألفت عاطف قد نام فى كرسیه ، وقد تكور فيه ، بينما نامت هالة على الأرض ، فقالت لنبيلة :

— حرام عليكى .. هو انتى ما فيش فى قلبك رحمه ؟

فقالت نبيلة فى دهش :

— فى ايه ؟

— مش شايفه اخوانك نايمين ازاي ؟

— دول لسه نايمين دلوقت .

— ناموا يا كبدى من غير عشا .

— ما كلوا العصر .

وذهبت الى هالة وحملتها فى رفق ، ثم التفتت الى نبيلة ، وقالت :

— هاتى أخوكى .

فرمت نبيلة الكتاب من يدها فى تبرم وهى تقول :

— أف .. الواحد ما يعرفش يذاكر فى البيت ده .

— يعنى المذاكره حليت دلوقت ، لما كنتى ح تخرجى مع
أحلام ما فكرتيش فى المذاكرة ؟

وحملت نبيلة عاطفا ، وسارت الأم وبين يديها هالة ،
وخلفها نبيلة ، وعلى كتفها عاطف ، واتجهت الأم الى غرفتها
وذهبت نبيلة الى غرفة البنين •

وضعت الأم هالة فى فراشها فى حنان ، وراحت تخلع لها
حذاءها فى رفق ، ثم مالت ووضعت على خدها قبلة •
ودخل الأب الغرفة وهو يحمل القمصان ، فالتفتت اليه
زوجته ، وقالت :

— ايد ما نعدمها •

ثم دنت منه وقبلته فى خده ، فأشرق وجهه ، ورفعت على
فمه بسمه رضا •

ووضعت نبيلة عاطف على فراشه وخلعت له فردة حذاء •
ثم غطته فى عجلة ، وفى رجله الأخرى « فردة » •
عاد الأب والزوجة الى غرفة الاستذكار ، وإذا بسوسن
تريد القينيم ، وهى واقفة :

— أقسم بالله ، أن أكون مخلصه لمصر ••

ورفع مراد رأسه والتفت : فلما رأى أباه نهض وفى يده
كتاب الحساب ، وذهب اليه وهو يقول :
— مش فاهم المساله دى •

فقال الأب وهو يبتسم :

— ح تفهمها ازاي وسوسن عماله تذيع قرآن وأناشيد ؟

فقالت سوسن ورأسها مرفوع :

— يعنى ماذاكرش ؟ ! أطلع خاييه زيهم ؟

فقالت أمها وهي تربت على ظهرها :

— كفايه النهارده • أكلك فى النمليه كليه وخشى نامى •

— حاضر يا ماما •

وأقبلت نبيلة ونظرت ، فلما رأت أباهما فى الغرفة مدت يدها

وتناولت الكتاب وخرجت لتستذكر دروسها فى غرفة أخرى •

وتناول الأب الكتاب من مراد ، وقرأ المسألة ، ثم قال :

— شوف يا مراد ، عندك حوض على شكل متوازى

مستطيلات أبعاده من الداخل ١٢٠ سنتى و ١٠٠ سنتى و ٨٠

سنتى متر ، ركب عليه حنفيه تنزل ٦٠ لتر فى الدقيقه وفيه بلاعه

تفرغ ٤٠ لتر فى الدقيقه ، فاذا فتحنا الحنفيه والبلاعه مع

بعض ، بعد أد ايه يتملى الحوض ؟

فقالت الأم فى حماسة :

— كلام ايه الفارغ ده ، اللي عايز يملا الحوض يسد

البلاعه ، انما يفتح الحنفيه ويسيب البلاعه مفتوحه يبقى

• جنان •

— المساله بتقول كده •

— يعلموا الحيال حاجه معقوله •
ومد مراد يده ، وأخذ الكتاب من أبيه وأغلقه ، فقال له
أبوه :

— بتعمل ايه يا مراد ؟

فقال مراد وهو يضع الكتاب على المكتب :

— ما دام حاجه مش معقوله أفهمها ليه !

وتحرك ليغادر الغرفة ، فقال له أبوه :

— تعال ، رايح فين ؟

— رايح أكل وانام •

ودق جرس الباب الخارجى ، فذهب مراد وفتح ، فاندفعت

أحلام فى مرح يتبعها سامى فى تؤدة ، وسارت حتى بلغت

غرفة الاستذكار ، فأطلت برأسها وقالت متهلة الأسارير :

— السلام عليكم •

ثم صارت تصفر : وكل خالجة فيها تنطق بسرورها ،

وراحت الأم تتبعها بنظرها برهة ، ثم قالت :

— ايه الى جرى الليله دى ! أحلام مش زى عوايدها •

— مزقطة ومش على بعضها •

وارتفع صوت أحلام فى غناء :

— مال هوا يا امه •

فالتفتت الأم الى زوجها ، وقد اتسعت عيناها دهشة :

— سامع .. بتغنى • وما سمعتهاش بتغنى قبل اللييله
أبدا •

وانصت الزوج مليا ، ثم التفت الى زوجته وقال :

— غريب • صوتها طالع من قلبها •

ثم قالت بصوت خافت :

— تكونشى بتحب ؟ !

فهبت الأم كمن لدغتها أفعى :

— بتايه ؟ هو أنا عندى بنات يعرفوا الكلام ده !

وانطلقت خافقة القلب الى غرفة ابنتها ، فألفتها قد خلعت

ثيابها ، ووقفت أمام المراة تتفرس فى مفاتها التى عجز

القميمص الشفاف عن سترها ، وأخذت الأم تنتظر الى ابنتها

مليا ، فرأتها لأول مرة فتاة نامية ، أكتملت أنوثتها ، فاشتد

وجيب قلبها وتقدمت اليها فى قلق ، وقالت :

— شفتى مين عند فايزه ؟ كان مين اللى قاعد معاكو ؟ .

فقالت أحلام فى بساطة :

— ما كانش فيه حد غريب .. كانت فايزه وامها وابوها

وجلال •

فقالت الأم فى اضطراب :

— وجلال كان قاعد معاكو !

— أيوه يا ماما •

فقالت الأم فى صوت فيه رنة غضب :

— وازاى يقعد معاكم ؟

— وفيها ايه يا ماما ؟ لقي سامى قاعد قعد •

— لكن سامى لسه صغير : انما جلال بقى راجل •

سمع سامى الحوار الدائر بين أمه وأحلام ، فخرج من غرفته ، وأنسل الى الغرفة الثانية حتى يشترك فى الحديث ، وقال :

— أنا كنت قاعد فى أدبى مش زى جلال •

فقالت أحلام فى ثورة وقد توردت وجنتاها ، فازدادت

جمالا :

— ما كان قاعد فى أدبه راخر ، قول لى عمل ايه كده ؟

فالتفت سامى الى أمه وقال :

— لو شفتيه وهو بيص لها ح ياكلها •

فتقدمت أحلام نحوه صائحة :

— خللى عندك أدب •

ولم يأبه لها ، بل استمر يقص على أمه ما حدث :

— طول ما هو قاعد بيص لرجليها •

واتسمت عينا الأم ، ونظرت برغمها الى ساقى ابنتها العاريتين ، فامتلات خنقا ، واحتقن وجه أحلام بالدم ، وصاحت :

- ما بس بلاش كلام فارغ •
- وهز سامى رأسه فى عدم اكتراث بها ، وقال :
- ولو شفتى اللى عمله أبو فايزة •
- فقالت الأم فى فزع :
- وعمل ايه راخر ؟
- فتقدم وهو يقلد الرجل فى حركاته وفى نبرات صوته :
- طبطب على خد أحلام وقال لها : « أهلا مرات ابنى » •
- فقالت الأم وهى تشفق :
- مرات ابنه .. مرات أبنه ازاي ! ؟
- وخرجت كالعاصفة ، وانطلقت الى غرفة الاستذكار ، فاذا
- بزوجها قد اضطجع وراح يقرأ الجريدة فى هدوء ، فصاحت
- فيه :
- يا بختك بروقان بالك •
- فنحى الجريدة ، واعتدل وقال :
- حصل ايه ؟
- قال الرجل يططب على خدها ويقول لها : أهلا مرات
- ابنى •
- بيهزر معاها •
- هزار ايه البايخ ده الى يفتح عنين الأولاد ؟
- وجاء سامى خلف أمه يسمى ، ودخل الغرفة وقال :

— نسيت أقول لك •

— نسيت ايه كمان ؟

فأمسك الباب بيده ، ووضع ساقا على ساق ، ومال قليلا ناحية ذراعه التي أمسك بها الباب وقال :

— أبو فايزه وأمها وجلال ييقولوا لكم انهم ح ييجوا يزوروكم يوم الخميس الجاي •

فقالت الأم فى دهشة :

— ايش عجب ! لا يعرفونا ولا نعرفهم •

وشردت ببصرها ، وراحت الأفكار تتزاحم فى رأسها ، وصمت الأب يفكر ، ونظر سامى الى أمه والى أبيه ، فألفاهما شاردين ، فهز كتفيه وقال قاطعا حبل تفكيرهما :

— مش ح تتعشوا ؟

فقالت الأم فى سرعة للتخلص منه :

— احنا شبعانين ، روحوا اتعشوا انتم •

وانسحب سامى ، وجلست الأم على أقرب مقعد ، وقد حملت رأسها بكفها ، وأرادت أن تطمئن الى الأفكار التى نمت فى رأسها فقالت :

— تفكر يا حسين ييجوا يزورونا ليه ؟

ولم يشأ أن يعبر عن الخواطر التى طفت على سطح ذهنه ، حتى لا يسبب لها ألما اذا ما خاب حدسه ، فقال :

— ايش عرفنى •
وساد الصمت بينهما ثانية ، وانفرد كل منهما بأفكاره ،
حتى أفاق حسين على صوت كرسي يسحب من الخارج ، فالتفت
الى زوجته وقال :

— يللا يا زينب ننام •
فنهضت وهى تقول :
— يللا •

— ودخلا غرفتهما ، وتمددا فى السرير ، وراحت زينب
تقلب قلقة ، فقال لها زوجها :

— ما تنامى •
— مش جاى لى نوم •
وخيم الهدوء على الغرفة ، ثم تنهدت زينب بصوت
مسموع ، فقال لها زوجها :

— بتفكرى فى ايه ؟
— يا ترى الناس دول شكلهم ايه ؟

— ناس زينا ، لهم عين وودان وبق ومنخير •
— مش قصدى •

— آمال قصدك ايه ؟
— يا ترى دول ناس طيبين واللا جنسهم ايه ؟

فقال لها وهو يربت على ذراعاها العارية :
— نامى نامى .. بكره نعرف كل حاجه •

الفصل الرابع

جلست زينب أمام « التواليت » وراحت تصفف شعرها ،
ولحت زوجها مقبلا في المرأة ، وهو يرتدى بيجامته ، فقالت
له :

- ج ننزل نشترى للولاد جزم •
- فقال لها الزوج وهو يعبث بذقنه :
- ما صلحناهم أول امبارح •
- جزمهم بقت عره ، والناس ح ييجوا بكره ، يقولوا علينا
ايه ؟

- دول ما بقالهمش شهر •
- أنا عارفه بيعملوا فيهم ايه ؟
- وصمتت قليلا ثم قالت :
- خد مقاسهم ويالا •
- طب البسي انتى وما تأخريناش •
- فقالت وهي ترفع حاجبها عجبا :

— بقى أنا باغيب فى اللبس ، والله ما ظلم على الحكايع
دى غيرك •

فقال وهو يغادر الغرفة :

— لما نشوف •

وفادى وهو فى طريقه الى الردهة :

— سامى ، هات ورقة بيضه وقلم رصاص •

وأقبل سامى ومراد وعاطف وسوسن ، ووقفت نبيلة على
باب غرفتها تنتظر • قدم سامى الى أبيه الورقة والقلم ، فوضع
الأب الورقة على الأرض ، وقال لعاطف :

— حط رجلك •

فوضع عاطف قدمه عارية فوق الورقة ، وأخذ الأب يمرر
القلم الرصاص حول القدم ، ليحدده على الورقة ، وقال سامى :

— مقاس رجلى ٣٩ •

وقال مراد بصوته المنبعث من حنجرتة :

— وأنا مقاسى ٣٦ •

ورفع عاطف قدمه ، ووضعت سوسن قدمها ، وراح الأب
يرسمها على الورق ، وقالت نبيلة :

— أنا عايزه جزمه « سبور » ٣٧ •

والتفتت نبيلة خلفها ثم قالت :

— وأحلام عايزه جزمه بكعب عالى ٣٦ •

واذا سوسن تربت على خد أبيها وتقول :

— وأنا يا بابا عايزه جزمه بكعب على •

ودنا عاطف وقال :

— وانا كمان •

وقال الأب وهو يتجه الى غرفته :

— حاضر •

ودخل يرتدى ثيابه ، فالتفت الى زوجته فألفاها لا تزال

تصفف شعرها ، فقال :

— لسه !

فقالت له :

— والنبي البس انت وما تلخمينش •

وارتدى قميصه وينطلونه ، وجلس يدس قدمه فى

الجورب ، واذا بسوسن مقبلة تصيح :

— ماما .. ماما .. الحقى سامى بيطلق دقنه •

وقام الأب وقد لبس « فردة » جورب وقدمه الأخرى

حافية ، وذهب الى الحمام ، فوجد الصابون الغزير يغطى

ذقن سامى : فقال له الأب فى زجر :

— ايه اللعب ده ؟ تهيج دقنك •

فقال سامى فى مكابرة :

— هو أنا عملت حاجه ! أنا باغسل وشى •

وأقبلت نبيلة وقالت:

— مستعجل قوى ، عايز تبقى راجل •

فقال لها سامى :

— وانتى ايش حشرك ؟

وقالت سوسن :

— شفت يا بابا هو اللى بياخد أمواسك ويقول ان انا اللى

بأخذهم أبرى بيهم الأقالم •

ومد سامى يده وقبض على ذراع سوسن ، وهزها فى

غيظ :

— يا بت انتى بطلى الكذب والتأويم •

وصرخت سوسن وفالت وهى تبكى :

— آه با دراعى •

فقال الأب فى غيظ :

— انت بتضربها ليه ؟

فقال نبيلة :

— ما حدش مالى عينه •

وصاحت الأم :

— ما بس بقى ، والله لو صحيت هاله ما حد ح يشيلها

غيركم •

وانسلت نبيلة الى حجرتها ، وخرجت سوسن وهى تمسح

دموعا متوهمة ، وعاد الأب الى الغرفة يستأنف لبسه ، فوجد
الجورب قد ابتل بالماء ، فخلعه وقام يحضر جوربا آخر •
وأتم ارتداء ثيابه ، وزوجته جالسة لا تزال بقميص النوم
أمام التواليت ، وفي يدها أصبع الأحمر تمرره على شففتيها ،
فقال لها :

— أنا بدى أعرف بتزوقى لمن بس ؟

فقالته فى دلال وهى تنتظر فى المرأة :

— لك يا راجل •

— ما انتى قاعده كل يوم فى البيت من غير زواق ، اشمعنا

الأبيض والأحمر ما يحلاش الا ساعة الخروج •

— عايزنى أمشى جنبك عره ؟ !

— اذا كان على أنا عاجبنى من غير زواق ، بس شهلى ،

والله ما حد ح يخطبك ، اتجوزتى وخلاص •

— آهو انت اللى بتعطلى وترجع تقول باغيب فى اللبس •

فقال وهو يهم بمخادرة الغرفة :

— مافيش فايدة ، كل الستات يحبوا ان الرجاله يصفروا

لهم •

— مش كلهم •

— كلهم ، وانتى أولهم ، فاكروه يوم ما جيتى فرحانه وقلت

لى انك كنتى ماشيه بين اتنتين صحابك وواحد قال لك : أحلاهم
اللى فى الوسط !

— طب اخرج بقى خلىنى ألبس ، الحق على اللى بقول لك
كل حاجه •

وخرج من الغرفة ، وراح يغدو ويروح فى الشقة وقد لاح
فى وجهه الضيق ، ووقع بصره على الراديو ، فذهب اليه ليديره
لعل النغمات المنبعثة تنزل الراحة بصدرة ، وتعينه على الصبر •
ونظر الى الراديو فانتسعت عيناه دهشة ، كان زجاجه
محطما ، وعقاربها منزوعة ، والأزرار التى تدير العقارب
مفكوكة ، فقال :

— راديو ايه ده ؟ بتدوروه ازاي ؟ !

فأسرعت سوسن اليه وقالت :

— عايز آنى محطه ؟ مصر واللا صوت العرب ؟

فقال الأب :

— أى محطه •

فمدت يدها تدير ذلك المسمار العارى الذى كان مركبا عليه
زرار العقارب ثم توقفت وقالت :

— آهى دى محطة القاهرة •

فالتفت أبيها اليها وقال :

— يعنى ما نطقش •

فقالَت سوسن فى بساطة :

— ده ما بيمشيش الا بالضرب ، ادى له على نافوخه •
فنظر اليها وهو لا يفهم مما تقول شيئًا ، فأسرعت الى
الراديو وضربت سقفه بقبضة يدها الصغيرة ، فانبعث صوت
الراديو مجلجلا فى الشقة •

وجلس الأب يصنى برهة ثم نهض واتجه الى غرفة النوم
ونظر ، فالتفى زوجته لا تزال تقوم بارتداء ملابسها ، فعاد الى
الراديو ضيق الصدر ، وضرب سقفه فى غيظ بقبضة يده ، فاذا
بالراديو يسكت عن الكلام •

وعاد ثانية الى حيث كانت زوجته ، وقال :

— ما تिला بقى •

فراحت تمرر زجاجة العطر خلف أذنيها فى هدوء ، ثم مدت
اليه يدها بالزجاجة وهى تقول :

— خد ، اثريح •

فانقشع غضبه سريعا وقال :

— بعدين الستات تجرى ورايا •

— مش أحسن ما تجرى منك ؟

ومد يده وجذبها من يدها وهو يقول :

— اتأخرنا خالص ح نخرج فى الظلمه •

وجذبت يدها منه وقالت :

— طب لما أقفل الدولاب •

وأغلقت الدولاب ، ووقفت أمام مرآة « التواليت » تنظر الى ظهرها ، فمد يده وجذبها فانقادت له •
وخرجا من الغرفة وسارا فى الردهة ، واذا بها تقف فجأة وتقول :

— والله ما حد بيلخمنى غيرك ، نسيت آخذ مقاس رجل هاله •

وعادت الى الغرفة ، ووقفت فى الردهة يصرف أنياه ، وغابت قليلا ثم عادت ، وانطلقا حتى اذا بلغا باب الشقة الخارجى قالت :

— أوه ، نستنى الجوانتى •

وتركته وعادت لتحضر قفازها ، ووقف يدق الباب بقبضة يده دقائق مكتومة تتم عن ضيقه ونفاد صبره •
وعادت اليه تعبت بقفازها ، وعلى فمها ابتسامة هادئة ، ففتح الباب وقال :

— اتفضلى ، على الله ما تكونيش نسيتى حاجه ثانيه •
وانطلقا ، حتى اذا بلغا شارع ٢٣ يوليو ، راحا يتقرسان واجهات المحال ، وقال لها :

— مش ح نخش نشترى بقى ؟

— مش لما نتفرج قبله •

وساراً ، وأذا بشاب يصفر ، فالتفت الى زوجته وقال :

— ما تفرحيش ، مش بيصفر لك ، بيصفر للى ورانا •

والتفتت خلفها ، وأذا بفتاة قد ارتدت ثوبا ضيقا مثيرا ،
 يبرز منه نهذاها ، وتعلو وجهها طبقة من المساحيق ، وقد ركبت
 رموشا طويلة ، وصبغت شعرها بلون الذهب ، فقالت :

— انت بتبص للفتارين ولا للماشيين ؟

فقال فى بساطة :

— بتفرج •

ووقفا أمام محل يبيع أقمشة ، وقالت :

— ما بقاش عندى فساتين أخرج بيهم ، تعال لما أقطع لى
 هساتين •

فقال فى صوت مضطرب :

— لكن احنا نازلين نشترى جزم للأولاد •

— دلوقت نشترىهم •

ودخلت الى المحل ودخل خلفها ، وانسابت مسرعة الى
 قسم الحراير وهو فى أثرها ، وقالت للعامل •

— عايزه قماشه بيعج وردتها صغيره •

وراح الرجل يعرض عليها القماش ، وهى ترفض :

— لأ دى وردتها صغيره قوى •• لأ دى وردتها كبيره

قوى .. عايزه ورده أكبر من دى شويه ، ورينى ورده أصفر
من دى سنه •

وتكدست أثواب القماش أمام العامل ، حتى كادت تخفيه ،
ونفد صبر الزوج ، فتقدم من العامل وقال له :

— لو كانت الفابريكه تتصف ، كانت تبعت لكم القماش
ساده ، وتبعت معاه الألوان والفرش ، وكل زيونه ترسم
الورده اللى على مزاجها •

وأحست الزوجة أن ضيق زوجها بلغ منتهاه ، فاختارت
القطعتين وتناولت من العامل القسيمة ، ودفعت بها الى زوجها
ليدفعها •

وذهبا الى محل أحذية ، واشترى ما يحتاجان اليه بعد أخذ
ورد طويلين بين الزوجة وصاحب المحل فى الأثمان ، وخرجا من
المحل ، الزوج يضع لفة القماش تحت ابطه وتتدلى فى كل يد
بطة أحذية ، بينما سارت الزوجة الى جواره تبعت بقفازاها !

ووقفت الزوجة عند واجهة محل ، وراحت تتفرس فى
حقائب اليد المعروضة ، ووقف الزوج بعيدا ، فاذا بها تلقت
اليه وتناديه ، فلما يدنو منها : تقول له وهى تشير بأصبعها
من الزجاج :

— ايه رأيك فى الشنطه دى ؟ شنطتى بقت عره •

— اعقلى بلاش تبخير ، طالع لنا بنات •

— هو انا جينا حاجه زياده ؟ حتى تحت الشنط
مستخسرها فيه ! ما استلهاش ؟
— اذا كانت عاجباكي خديها •
وهمت بالدخول ، فقال لها :

— اسمعى قبل ما تخشى ، مكتوب عليها ثلاثه جنيه ، نخش.
ندفع الفلوس ونخرج ، مش عايز فصال ووجع دماغ ، ان
فاصلتى ح اسبيك واخرج على طول •
— طيب •

ودخل خلفها وهو لا يدري كيف يوفق بين لومها له
واتهامها اياه بالتبذير يوم اشترى أقة تفاح ، وبين ما تفعله
اليوم !

وجعلت تقلب الحقيية بين يديها ، وتجرب قفلها ، وتتفرس
فى محتوياتها ، ولما اطمأنت اليها ، سألت :

— تمناها كام ؟

فقال الرجل :

— ثلاثه جنيه •

— كثير ، ميه وخمسين قرش بس •

واربد وجه الزوج ، ونظر الى زوجه فى غيظ ، ثم غادر
المحل وتركها وحدها ، ووقف أمام المحل يدق الأرض بقدمه فى

ضيق ، وتتقضى بعض الوقت ، ثم أقبلت الزوجة وفى يدها
الحقيقية •

— خدتها بكام ؟

• فقالت فى هدوء :

• — بميه وخمسين قرش •

فالتفت الى المحل وهو يجز على أسنانه ، فمدت الزوجة

يدها اليه وقالت وهى تجذبه :

— يلا •• أصل فلوسك كثير •

الفصل الخامس

جاء يوم الخميس ، وكان ميماد الزيارة المرتقبة ، فدبت حياة عاصفة صاخبة في الشقة ، كان الأبناء جميعهم يرتدون أفخر ما عندهم حتى الأب راح يرتدى بذلته الرمادية التي كان يدخرها للمناسبات ، وارتفعت الأصوات واختلطت فكانت أشبه بالضجة المنبعثة من مشاهدي مباراة حامية في كرة القدم .

وصاح سامي في عصبية :

— المشطفين ؟ مين خده من قدامي ؟

فقال نبيلة وقد خلعت جاكete البيجاما ، ووقفت أمام المرأة تلف شعرها دوائر :

— أنا اللي خدته ، ما بقى لك ساعه بتشسب .

وصاح الأب :

— من الى خد الكرافته من هنا ؟

فصاحت نبيلة :

— مع سامى •

وخرج الأب من غرفته ، وهو عارى الساقين ، يرتدى قميصاً أبيض ، واتجه الى حيث كان سامى ، ووقع بصره على الكرافة ، فانقض عليها وأخذها وهو يقول :

— حتى الكرافة دى ح تأخذها ؟ دانا بقى لى خمس سنين مش عارف أشتري غيرها •

ونادت أحلام :

— نبيله نبيله ، والنبي تتاولينى البنس •

فاتجهت نبيلة الى الحمام ، ودفعت الى أحلام بالبنس •
وصاح عاطف فى بكاء :

— لأ ما البشش البنطلون ده ، عايز البنطلون الأحمر •
وقال مراد وهو يدس قميصه فى البنطلون فى اهمال بحيث أصبح القميص من أمام داخل البنطلون ، بينما كان طرفه الخلفى خارجة :

— ما تدى له البنطلون اللى هو عايزه •

وجاءت سوسن تهول ، وهى ترتدى فستانا قصيرا كشف عن ركبتها ، وهى تقول :

— ماما .. ماما .. لبسينى الفستان •

وأولت ظررها لأمها ، فهمت الأم بمد يدها لتصلح هدام ابنتها ، وإذا بعاطف يصيح :

— أنا مالى عايز البنطلون الأحمر •
وارتفع بكاء هالة ، فصاحت الأم :
— يا نبيله ، أنا مش عارفه بتعملى ايه عندك ، تعالى شوفى
أختك •

وقال سامى وقد ارتدى ثيابه :
— لما تخلص زواق •
— أنا قتلت لك ميت مره ما لكشى دعوه بيه •
وقالت الأم لسامى :
— فوت انت بقى روق لنا الشقه شويه •
فقال سامى :

— هاتوا ثمن تذكرة السينما •
فقالت الأم بصوت عال :
— ادى له يا حسين •
فقال الزوج فى ضيق :
— ما كانوا قعدوا فى الشقه !
فقالت الأم فى حدة :

— أنا واحده عيانه وما تجبوليش الأوى ، حرام عليكو
كفايه قرف بقى !

فقال الأب وهو يدفع لسامى ثمن التذكرة فى صوت أقرب
لصوت المعدة :

— ليه العواذل حاسدينى ، دول حقهم ييكو على •
ورأى مراد أن سامى حصل على ثمن تذكرة السينما ،
فتشجع واقترب من أبيه وقال :
— وأنا ؟

فقالت الأم وهى تصفف شعر عاطف :
— خد اخوك معاك يا سامى •
فقال مراد بصوته المنبعث من حنجرتة :
— لا ما امشيئش مع سامى ، بيزغدى فى السكه •
فقال سامى وهو ينصرف :
— ومين يمشى معاك ؟

وأخذ مراد نقوده ، وانطلق مهرولا وأمه تصيح خلفه :
— تعرف تركب بيهم عجل ح اعطم رقبتك •
وخرجت أحلام من الحمام : وهى فى قميص وردى ، تضع
على كتفها منشفة ، غطت بها ظهرها وصدرها ، وان ظال
الأخدود الغائر بين ثدييها عاريا ، واتجهت فى تودة الى غرفتها ،
كانت فى قرارة نفسها تحس أن اليوم يومها •

ونظر الزوج الى زوجته وقال :
— لسه ها لبستيئش ؟ الناس زمنهم جابين •
— ح البس أهو •

ووضعت يد عاطف فى يد سوسن وقالت :

— ألقى باخوكى ع الباب •

فقال سوسن :

— طب هاتوا نضيج •

وأعطاها أبوها قرشاً ، فرفضت أن تأخذه وقالت :

— أنا شفتك أديت لسامى ومراد ايه ، عايز تضحك على ،

واللا يعنى عشان ما هم ولاد ؟

وأعطاها أبوها حتى رضيت ، وأقبلت نبيلة تحمل هالة

وتقول فى ملل :

— كان على ذنب أتعبس معاها النهارده •• ما كنت خرجت

أنا رخره •

فقال لها أبوها :

— كنت تروحي على فين ؟

فقال نبيلة وهى تلف بهالة فى حركة راقصة ؟

— أى حته •

فقالت الأم وهى تخلع ثوبها :

— ماهى الدنيا ساليه •

ودخلت نبيلة غرفتها وانبعثت من الراديو أنغام راقصة ،

فراحت ترقص وهى ترفع هالة بيدها ، وأخذت تدور ، فقامت

لها أحلام :

— كفايه بقى زغللتى عنه •

ولم تكف نبيلة عن الدوران ، بل قالت :
— قولى لى الناس دول جايبين النهارده ليه ؟
فقال أحلام وهى تزرر فستانها :
— أنا عارفه ! •

— كل حاجة فيكى بتقول انك عارفه ، تسريحتك ،
فستانك ، لمعان عنيكى ، الفرحة اللى •
قالت أحلام مقاطعة :

— بس بلاش غلبه ، هو انتى ما بتتمبيش م الكلام !
وظلت نبيلة فى دورانها وحديثها :

— الكلام ده نعمه •• يمكن انتى ما تحسبش بيها ، لأن
حواليكى ناس كتير بيكلموكى ، زى الشبعان اللى ما يعرفش
قسوة الجوع ، ياما ناس يتعنوا يلاقوا اللى يكلموهم •
وارتفع صوت الأم ينادى :
— نبيله •• نبيله •

فقال نبيلة وهى تتحرك فى خطوات راقصة :
— مؤكد ماما لمست الشراب •

وانطلقت الى حيث كانت أمها ، فألفتها قد ارتدت ثوبها
وجوربها وقد لفت بجذعها تنظر الى بطن ساقها ، ولما رأت
نبيلة ، قالت لها :

— شوفى خط الشراب معدول ؟

فنظرت نبيلة ثم قالت :

— معدول خالص : وان ما كانش معدول ح يحصل ايه
فى الدنيا ؟

فقالت الأم فى ايمان :

— ازاي ؟ دى قيمة الست فى شرابها •

وقالت نبيلة فى خبث :

— طب واللى من غير شراب ؟

فقالت الأم فى بساطة :

— ما لهاش قيمه •

وضحكت نبيلة ضحكة طليقة ، فهذا الحديث يدور بينها
وبين أمها كلما لبست الأم جوربها •

وأقبل الأب وهو غى كامل هيئته ، ولحته نبيلة فقالت فى

مرح :

— اش • ايه الشياكه دى كلها ؟

فقالت الأم وهى تبتسم :

— يا بت خللى عندك أدب •

وقال الأب وهو يهز رأسه :

— الشياكه راحت من يوم أنتم ما جيتوا •

ودق جرس الباب الخارجى ، فالتفت الأب الى الأم فى
اضطراب ، وقال :

— أهم جم • افتح لي الباب •
وقالت الأم في قلق :
— أنا ما اعرفهمش • روح قابلهم أنت •
وقالت نبيلة :
— انتو ج تسيبوا الناس واقفين ع الباب ! أروح أفتح
لهم أنا ؟
وقال الأب في سرعة :
— لا .. لا .. أحلام اللي تفتح لهم •
وخرجت أحلام من غرفتها : وسارت صوب الباب الخارجى
فى حيوية ، واذا بالأب يقول :
— دخلى الستات فى الأوده المفروشه والرجال فى المكتب •
ووصلت الى الباب ، فوقفت برهة تصلح هندامها ، ثم
مررت يدها على شعرها لتتأكد من أن الهواء لم يعيث به ،
وفتحت الباب فآلفت جلالا وأباه وأمه ، فرفت على فمها بسمة ،
وتأخرت خطوة ، لتفصح الطريق ، وقالت :
— تفضلوا •
والتقت عيناها بعيني جلال ، فأحست كأن تيارا كرهبيا
سرى فى بدنهما ، واستشعرت نشوة وسارت فى خفة ، وأشارت
الى أم جلال أن تتفضل الى غرفة الاستقبال وانطلقت أمام
جلال وأبيه تقودهما الى غرفة المكتب •

وجلس جلال وأبوه يقلبان عيونهما فى المكان فاحصين ،
كان جلال شابا فى الثالثة والعشرين ، أسمر الوجه ، أسود
العينين ، يميل أنفه الى الكبر ، غزير الشعر ، متوسط القامة •
وكان أبوه ربعة ، بارز الكرش : مستدير الوجه ، أصلح الرأس
على الرغم من غزارة شعر حاجبيه ، سقطت بعض أسنانه ولم
يفكر فى أن يضع مكانها أسنانا صناعية •

وأقبل حسين وزوجته فى الردهة ، حتى اذا بلنسا غرفة
المكتب وقف حسين متمهلا كأنما يستجمع شجاعته ، ثم دلف
الى الغرفة ، بينما انطلقت زوجته الى غرفة الاستقبال ، ولحه
جلال وهو مقبل ، فقد كان مقعده مواجه للباب ، فنهض
لاستقباله ونهض أبوه •

ومد حسين يده مصافحا ضيوفه ، فقال أبو جلال، معرفا
بنفسه :

— أنا مصطفى علوان •• ابنى جلال •

فقال حسين :

— تشرفنا •• أنا حسين عبد المتعال •• أهلا وسهلا ••
أهلا وسهلا • اتفضلوا •

ومر بعض الوقت فى ترحيب ، وجاءت نبيلة وهى تحمل
هالة واقتربت من الغرفة تصفى ، وخطر لها أن تتخلص من
هالة ، فعادت الى غرفتها ، ووضعتها فى السرير لتقيمها وتعددت

الى جوارها ، واذا بنبيلة تنسام ، بينا راحت هالة-تعبث في شعرها .

وغادرت أحلام غرفة الاستقبال ، ومرت بالمكتب وتمهلت قليلا ، فرأت جلالا ينظر اليها مبتسما ، ثم يغمز لها بعينه في غفلة من الأبوين الفسارقين في حديث تافه ، فأشرق وجهها وانتمت عيناها سرورا ، وانسلت في خفة الغزال .

وغابت أحلام قليلا ثم عادت تحمل صينية عليها ثلاث صحاف في احداها موز وفي الثانية « جاتوه » وفي الثالثة يرتقال من الحجم الكبير ، ودقت باب الغرفة بطرف الصينية وجلال يرقبها ، وقد هم أن يخف اليها يحمل عنها الصينية ، ولكنه تاب الى رشد ، وبقي في مكانه ، وأحس أن والده بدأ ينظر اليه لما نهض حسين ليقناول من ابنته الصينية ، فتظاهر أنه يخض من بصره في حياء متكلف ، فابتسم أبوه ابتسامة عريضة فضحت فمه الخرب ، ورماه بنظرة لو ترجمت الى الفاظ ، لكانت « لا داعي للنفاق ، انى أعرفك جيدا » .

ووضع حسين الصينية على منصدة صغيرة ، ثم حمل المنضدة وما عليها ووضعها أمام مصطفى علوان ، حتى كادت تلمس كرشه ، واختفت أحلام من عيني جلال ، ولكن سرعان ما عادت تحمل صينية أخرى وانطلقت صوب غرفة الاستقبال .

واعتدل مصطفى في مقعده ، وتأهب للخوض في الحديث

الذى جاؤا من أجله ، فنظر الى جلال وهو يخفى موزة فى
فمه ، وقال :

— اتكلم انا واللا تتكلم انت .. ما هو شبان اليوم عندهم
مفتحه ؟

وضحك ضحكة طليقة ، ثم قال لحسين :

— أنا فاكرو يوم ما رحى مع أبويا يوم كتب كتابى بقت
سنانى تتكلى وركبى تخبط فى بعضها •

وابتسم حسين ابتسامة باهتة ، حزر ما جاؤا من أجله ،
فراح يجمع شتات نفسه التى ذهبت شعاعا ، كان يخمن الدافع
لهذه الزيارة المفاجئة ، وكان يعد نفسه لها ، ولكن ما ان سمع
كلمة « كتب الكتاب » حتى اضطرب وانقشع أمه ، وسرت فى
صدره رهبة •

ومال مصطفى علوان نحو حسين وقال :

— جلال ده ابنى ، أنا اللى رببته ، قدامى طيب هستقيم ،
لكن من ورايا ما أعرفش ، مش عايز أغشك ، اذا وافقت على
طلبه اسأل عليه .. طالب ايد أحلام .. أحلام دى بنتنا ،
بنحبها كلنا ، بس اياك جلال يعجبكم ويكون له قسمة ..

فقال حسين فى صوت خافت مضطرب :

— ده شرف كبير لنا •

— أستغفر الله .. الجواز قسمة ونصيب •

وسمع وقع أقدام فى الخارج ، فالتفت حسين فآلفى
زوجته منطلقة فى تأثر ، فالتفت الى مصطفى وقال :

— عن اذنك •

— اتفضل •

وذهبت الزوجة الى غرفتها ، وانطلق حسين خلفها مهرولا ،
ودلفا الى الغرفة واذا بحسين يرى فى المرأة زوجته مطرقة وفى
عينها الدموع ، وما ان أحست به حتى قالت فى صوت تخفقه
العبرات :

— عارف جاين ليه ؟

— عارف ، جاين يخطبوا أحلام •

وانفجرت الزوجة بالبكاء ، فدنا منها يربت على كتفها
ويقول :

— مسير البنت تكبر وتسيب بيت أبوها •• أنا عارف انها

ح توحشك •

فقالت وهى تشرق بدموعها :

— أنا مش بعيط على كده •

— آمال بتعطى على ايه ؟

فقالت وقد استدارت وأخفت وجهها فى صدره :

— بعيط على ان بقى لى بنت تتجوز

وضمها اليه فى حنان وقال :

— اطمنى ، مش ح تعجزى أبداً •
ومد يده ورفع ذقنها ، والتقت عيناه بعينيها ، وقال :
— ح تفضلى طول عمرك حلوه •
ثم قبلها قبلة هادئة وقال :
— امسحى دموعك وروحي للناس •
فقالته وهى تجفف دموعها بيديها :
— وح تقول لهم ايه ؟
— ح اقول لهم : ادونى مهله أفكر •
وسارت زينب وهى تقول فى أسى :
— هيه •• كلها سنه والا اتنين وابقى جده •
وذهب حسين الى غرفة المكتب ، وانسلت زينب الى غرفة
الاستقبال ، وما أن استقرت فى مقعدها حتى دوى صوت
« بمب » أطفال ، وصوت زمازة •
واستيقظت نبيلة على الدوى ، وبكت هالة ، فنهضت نبيلة
وحملتها ، وذهبت ناللة الى غرفة الاستقبال وهى تقول :
— كده خضيتوا البننت •
وتظاهرت بأنها فوجئت بوجود أم جلال ، فتأخرت خطوة ،
واذا بأم جلال تقول :
— خشى يا بنتى •• ما فيش حد غريب •
وتناولت الأم هالة ، وضمتها الى صدرها ، وجلست نبيلة

وتأهبت لتطلق لسانها من عقاله ، واذا بصوت ارتطام حذاء صغير بالبواب يتتابع ، واذا برنين الجرس يدوى متصلا ، فقالت الأم :

— نبيله .. شوغى مين .

وقالت أحلام فى سذاجة :

— ما فيش الا سوسن وعاطف .. هى اللي تحط صباعها ع الجرس ما تشيلوش الا لما يتفتح الباب ، وهو يفضل يضرب الباب بجزمته .

وفتحت نبيلة الباب ، فدخلت سوسن ترتدى قناعا على وجهها يتبعها عاطف ينفخ فى زماره وقد تمددت مئانتها حتى بلغت نهاية تمدها ، فقالت له نبيلة :

— بس بقى .. ح تطق .

فقال لها عاطف وهو ينفخ :

— مالكيش دعوه .

وضربت سوسن « بمبة » .

وأرادت نبيلة أن تبعدهما ، واذا بسوسن تفلت منها ، وتذهب الى غرفة الاستقبال .

رأتها أم جلال ، فقالت :

— أهلا .. أهلا .. ما تشيلي الوش ده وورينا حلاوتك .
وهزت سوسن كتفها ، وقد ثبتت عينيها على الموز والبرتقال

والجائتوه ، وأرادت أمها أن تخرجها من الغرفة ، فقالت لها :

— سوسن .. بره •

وقبل أن تتحرك سوسن ، دخل عاطف وصوت زمارته يسبقه ونبيلة فى أثره ، فقالت الأم فى غيظ مكتوم :

— نبيله .. خدى اخواتك من هنا •

فقالت أم جلال :

— سيبيهم .. كلنا عندنا عيال •

ورأى عاطف الصينية وما عليها ، فقال :

— موزه .. موزه ..

ودفعته أمه ، وإذا بمثانة الزمارة تنفجر ، فقال عاطف لأمه وهو ييكنى :

— أنا مالى • انتى اللى طققتيها .. ما حدش ح يدفع تمنها غيرك ..

وارتفع صوته بالمويل ، فأقبل أبوه وقال وهو بعيد عن الغرفة :

— عاطف .. تعال .. تعال أجيب لك واحد تانيه •

وحملته نبيلة ، وذهبت به ائى أبيه وهو يتلوى بين يديها ، وأخذة أبوه فى رفق وراح يربت على ظهره ويقول له :

— بس • ح أجيب لك عروسة كبيره •

فقال عاطف وهو يمسح دموعه •

- سيبهم •• كذا: عندنا عيال •



— لا .. أنا عايز أتومبيل •
 وراحت الأم تنتظر الى نبيلة نظرات زجر لتتسحب ، ولكن
 نبيلة أعرضت عن نظراتها •
 وقالت أم جلال :
 — آمال سامى فين ؟
 فقالت أحلام :
 — راح السينما •
 وقالت أم جلال :
 — عقبال ما يروج مع عروسته •
 فقالت زينب :
 — تسلمى •
 ونهضت أم جلال ، فقالت زينب :
 — ما بدرى •
 — بدرى من عمرك • ابقوا شرفونا •
 وسلمت على الأم وعلى نبيلة ، وعلى سوسن ، ثم طبعت
 قبلة على خد أحلام •
 وأسرعت أحلام تفتح الباب ، وسارت زينب وأم جلال
 وخلفهما نبيلة وسوسن •
 ونهض جلال وأبوه وحسين ، وانطلقوا ضوب الباب ، وإذا



ورائى عاشف الحبينه وما عدي شغال : موزة .. موزة ..

(م العروسة)

بالجميع يتقابلون عند الباب لأول مرة ، وانتهزت أحلام هذه الفرصة ، فراحت ترنو الى جلال فى حب وهو ينظر اليها مشرق الوجه مبتسما •

وجاء مراد ، وفى وجهه أثر شحم ، وقد اتسخت يداه ، وفى ساقه أثر تراب امتزج بمرقه ، وما ان رأته أمه حتى اربد وجهها ، وقالت فى ثورة :

— مش قلت لك ما تركبش عجل •

فقال فى بساطة :

— ما ركبش عجل •

— أمال ايه الوساخه دى !

— ركبت موتوسيكل •

وشق طريقه بينهم وانطلق •

وانصرف الضيوف ، بعد أن تصافح الجميع ، وضغط جلال على يد أحلام ضغطة خفيفة أحست أثرها فى قلبها الذى اشتد وجيبه ، وفى وجنتيها اللتين اشتعلتا نارا •

واتجهت نبيلة الى غرفة الاستقبال وحملت الصينية ، وانطلقت أحلام الى غرفة المكتب وعادت بالصينية الثانية ، ووضعت الصينيتان على نضد بالمطبخ ، واذاً بالأيدى تتخاطف ما بهما ، وقالت نبيلة ، وهى تمد يدها تأخذ قطعة جاتوه :

— غوله عملت فرج قالوا ايله سعيدة عليها وعلى أولادها •

— غلبه عمات غمرح قاتلوا : ابنه سمعه غلبه و غنى اولاده



الفصل السادس

أتى المساء ، فنام عاطف تعادته على الأريكة فى الردهة ،
وفى قدمه فردة حذاء ، وقدمه الأخرى عارية ، وأقبلت سوسن
تتمطى ودنت من أمها وقالت :

— ماما .. ماما .. عايزه أنام •

— روى نامى •

— حد يفرش لى السرير •

فقالت أحلام :

— تعالى .. أنا داخلة أنام •

والتفتت أحلام الى أمها وأبيها وقالت :

— اتمسوا بالخير •

وسارت حتى اذا بلغت الردهة ، حملت عاطفا لتضعه فى
سريره • وانطلقت الى غرفة نوم الأولاد ، فاذا بمراد قد نلم
ورجله مستندتان الى الحائط : ورأسه مدلى عند منتصف
السرير فلم تلتفت اليه ، وتقدمت الى سرير عاطف ، ووضعت

حملها فيه في رفق ، ثم ذهبت الى غرفتها وسوسن في أثرها
تردد في صوت ممدود كله تكاسل :

— عايزه أناام •

وتقدمت أحلام من سرير سوسن وأصلحت وضعت
وسادته ، ورفعت الأغطية ، فأسرعت اليه سوسن وقبل أن
تتمدد فيه قالت :

— غطيني •

وأحكمت أحلام وضع الأغطية حول سوسن ، ثم خلعت
ثيابها واندست في سريرها وقد أغمضت عينيها لتري بعين
خيالها أحلامها البهيجة وأمانيتها العذاب •

كان الزوجان يترقبان انصراف الأولاد ليتحدثا في نجوى ،
ويتشاورا في أمر خطبة جلال لأحلام ، ولكن بقاء سامي ونبيلة
في الغرفة جعل صبر الأب ينفد ويقول لهما :

— انتوا مش داخلين تتاموا ؟

فقال سامي :

— لا • أنا ح اذاكر •

وقالت نبيلة وهي تنهض :

— اذا كنت ح تذاكر هنا ح اسيب لك الأوده واروح اقرا
في أودحتنا •

فقال لها سامي :

— تعملى طيب •
وغادرت نبيلة الغرفة ، والتفت الزوج الى زوجته وقال
— الواحد وخمان النهارء ، ياللا نحش ننام •
ونهض ونهضت زوجته وسارا الى غرفة نومهما •
ووصلت نبيلة الى غرفتها ، فأضاعت النور ، وقطعت على
أحلام حبل أحلامها اللذيذة ، فقالت فى عصبية ، دون أن تفتح
عينها حتى لا تفر الرؤى العذابت :
— اطفى النور • خلىنا ننام •
وراحت نبيلة تخلع ثيابها وترتدى بيجامتها ، وقالت فى
هدوء :

— ما تنامى •
فقالت أحلام وهى تتقلب فى غضب :
— ما اعرفش أنام فى النور •
— وانا ما اعرفش اقرا فى الضلمه •
— هو الواحد ما يعرفش يستريح فى البيت ده !
فقالت نبيلة وهى تتمدد فى السرير وفى يدها كتاب :
— هانت •• بكره تسيبيه وتستريحى منه على طول •
وتقلبت أحلام مرة ثانية فى حنق ، ثم جذبت غطاءها وأخفت
به وجهها ، لتعيش فى الظلام تهيم فى دنيا جميلة من نسج
خيالها •

ودخل الزوجان غرفتهما ، وأغلقا بابها عليهما ، واتجهت الزوجة الى هالة ، وأحكمت الغطاء حولها وهي تقول لزوجها :

— عرفت ماهية جلال كام ؟

— قالوا خمسة وعشرين جنيه .

— وتفتكر خمسة وعشرين جنيه تفتح بيت اليومين دول ؟

ح يسكن بكام ويكسى بكام وياكل بكام ؟

وهز الزوج كتفيه ، ولم ينبس بكلمة ، وقالت الزوجة :

— قل لى : أبو جلال قال لك ايه ؟

— قال لى : اذا حصلت قسمه يجيبوا الشبكه ، ويقروا

الفاتحه ويأخروا الكتاب للدخله .

— اسمع أنا بنتى لازم يتعمل لها فرح ، أنا مش بقى لى

تمنتاشر سنه متجوزه لكن مش قادره أنسى انى دخلت

ع السكت ، الحكاياه دى عملت لى قرخه فى قلبى ، كل ما افكرها

انقبض وعينه ترغرغ بالدموع . ايه اللى خلانا عملنا كده ؟

ازاى قبلت انك تيجي لوحدهك تاخذنى زى اللى نكون عملنا

عمله .. دخلنا شقتنا نتسحب زى الحراميه ، لا طقت زغروته

ولا انقادت شممه .

واقترب منها وقال وهو يلف ذراعه حولها :

— ياما ناس اتعمل لهم افراح ولا عمروش .

— لكن برضه الفرحة حلوة .

وقال لها وهو يضمها اليه :

— السر والتمويه أحسن •

وابتعدت عنه في دلال وهي تقول :

— افكرنا نفسنا وح نفسي البنيت ، قول لي ما عرفت
إذا كان ح يسكن لوحده واللاح يسكن مع أبوه ؟ • أنا بنتي
ما تسكنش مع حد أبدا •

— دي تفاصيل ما تكلمناش فيها ، مش لا نوافق ع الجواز
قبله ؟

أتما خلع ثيابهما ، واتجها الى السرير وتمددا فيه ، وقال
الزوج وهو يضع رأسه على ذراعه وينام على جنبه ، ووجهه في
وجه زوجته :

— قبل ما نقول آه أولا لازم ناخذ رأى أحلام •

— ناخذ رأيها في ايه ؟

— في جلال • يمكن ما بتستظرفوش •

— أحلام لسه صغيره ايش عرفها بالكلام ده •

— أنا لا جيت أتجوزك مش خدوا رأيك ؟

— قالوا لي انك جاي تخطبني ، قمت وديت وشي الناحيه
التانيه ، قال ايه مكسوفه ، والحقيقه اني كنت فرجانه •• كل
بنت بتفرح لا تتخطب ، بتحصن ان بقي لها قيمه ، وان فيه راجل

بيطلبها • فرحت خالص مع انك كنت غريب عني ، ما كنتش
أعرفك خالص ، كنت بالنسبة لى زى سر جميل •

— وعرفتى السر ده امتى ؟

— بعد ما اتجوزنا • الحب ما يجيش الام العشره •

— آمال اللى بيحبوا بعض قبل ما يجوزوا ؟

— ده حب شيطانى • ما بيعمرش •

وقربت وجهها منه وقالت :

— قول لى بتحب فينا ايه ؟

— باحب فيكم كل حاجه فيكم • كدبكم ، وزيطتكم
ووجع الدماغ اللى بتسببوه لى ، تعرفى آخر مره سافرت فيها ،
لما جه الليل ودخلت أودتى أنام حسيت انى وحيد ، ما ليش
حد فى الدنيا ، بقيت أتلقت وأنا مقبوض ورغرت عيني
بالدموع ، اشتقت ساعتها لعياط هاله ، وسألة سامى ، ولت
نبيلة •

وشرد قليلا ثم قال :

— الله احنا مالنا الليله دى بنفكر نفسنا وننسى البنات •
الصبح لازم تسألى أحلام عن رأيها فى جلال •

— ح أسألكم وان كنت واثقه انها ح تودى وشها الناحيه
التانيه وتطاطى راسها •• يا ترى عيلة جلال شكلها ايه ؟

— مى ح تتجوز جلال واللا ح تتجوز عيلته ، الرّك عليه
هو •

— الرّك ع الأصل برضه ، الأصيل ما يعبش •
ثم تتهدت وقالت :

— بقى انا اللى كنت بالعب أول امبارح فى الحاره بقى لى
بنت تتجوز !

— ما شفتكيش وانتى بتلعبي فى الحاره ، شفتك شابيه
حلوه •

— هو انت لحقت تشوفنى . كنت مستعجل قوى ، ما لحقت
خطبتنى ما لحقت دخلت عليه •

— فاكراه ليله الدخله لما لقبنا نفسنا فى الشقه لوحدنا ؟
ومدت يدها تطفىء النور ، وهى تضحك ضحكة خافتة
وتقول :

— والنبي ما تفكرنيش ، دا احنا كنا عبطه قوى •
وامترجت ضحكاتها الخافتة ، ونسيا ابنتهما وراها يفكران
فى نفسيهما بكل حواسهما •

وانقضى الليل بأسراره ، ودبت الحياة فى الشقة ، فاذا
بملايس النوم تلقى هنا وهناك ، واذا بشجار وصياح وعويل
وبكاء ، واذا بأقدام تسرع الى المطبخ ، واذا بأياد تمتد الى
المصاف ولا ترتفع الا بعد أن تصبح خاوية •

وخرج الأب والأولاد ولم يبق فى الشقة إلا أحلام وهالة
وأمهما •

راحت أحلام تلتقط الثياب المبعثرة ، وتملأ القل ، وتعيد
تنسيق المكان ، بينما كانت الأم تغسل ثياب هالة وجوارب
الأولاد ومناديلهم •
ونادت الأم :

— أحلام • تعالى خدى الخسيل ده انشريه عندك •
وذهبت أحلام الى الحمام ، ودنت من أمها ، فاذا بالأم
تقول لها وهى تتظاهر بالانهماك فى عصر ثوب من ثياب هالة :
— عارفه ان جلال جه يخطبك أمبارح ؟
ونظرت الى ابنتها من طرف عينيها لتراها وهى تشيح
بوجهها خجلا ، ولكن أحلام قالت فى هدوء :
— عارفه •

ولم تجد الأم مبررا لانتظارها بالانشغال عن ابنتها لتخفف
من حدة خجلها ، فما عادت البنات يخجلن من ذكر الزواج
والخوض فى أحاديثه فوضعت الثوب على الصنبور ، وأسندت
كفها على الحوض وقالت

— وعارفه انه بياخذ خمسة وعشرين جنيه ؟
— عارفه •

— وتفتكرى الخمسة وعشرين جنيه يكتوكو ؟

فقلت أحلام في حماسة :

— يا ماما. احنا لازم نبتدى من أول السلم ، نكافح سوا ،
ويكون لنا هدف واحد ، نبتدى صغيرين ونكبر مع بعض ،
عشان لما نعمل تكون لنا ذكريات مشتركة نعيش عليها ، انتى
نسيقتى يا ماما بابا كانت ماهيته كم لما اتجوزتو ؟ .

— كانت ماهيته انتاشر جنيه ، لكن كانت أيام غير دى ،
كانت أجره الشقه اتنين جنيه ، ورطل الحمة الضانى كان بتلاته
ونص .

— يا ماما احنا اتنين ، ح ناكل ايه ولا ح نشرب ايه ؟

— النهارده اتنين بكره ح تريدوا .

— وكمان ماهيتنا ح تزيد ، ومش ح نعمل زيكو ، ح نخلف
واحد أو اتنين بالكثير .

— كان غيركم أخطر .

واقتربت أحلام من أمها وقالت :

— قولى لى : ايه هى أسعد أيامكم ؟ مش أيام جوازكم
الأولى والأيام اللى اتولدت فيها واللى اتولدت فيها نبيله
وسامى ومراد وسوسن وعاطف ؟ دانا فاكهه يوم ما اتولدت
هاله ، كان بابا فرحان ، احنا لما اتولدنا كنا عبء جديد عليكم ،
ويرضه فرحتوا بيانا ، مش كل الأعباء ترعل ، فيه أعباء لذيفة
الواحد يتحملها وهو مبسوط ، أنا أفكر ان متاعب الكفاح من

الأعباء اللذيذة • لما تررعى شجره وتتعبى فى زرعها مش بتتسى كل تعبك لما تشوفيه كبيره ، كمان الأزوجه بترعى جوزها ويتعب عشانه ويتحرم نفسها من كثير ، عشان توفر له الراحة ، وتهاى له الفرصة اللى يكبر فيها ، لغاية ما تشوفه كبير ، وساعتها تنسى كل تعبها •

ونظرت أمها اليها فى دهش ، وهى صامته ، لم يدر بخلدها أن أحلام ، ابنتها الطفلة ، التى كانت تصب حتى الساعة أنها لا تفهم عن الحياة شيئاً ، تتحمس لخطبتها كل ذلك الحماس ، كانت تظن أنها ستدير وجهها حياء ، حتى اذا ما ألحت عليها فى استطلاع رأيها قالت فى صوت متهدج : (البركه فيكم • اعملوا اللى تشوفوه) •

ورأت الأم من الحكمة أن تساير ابنتها فى عواطفها ، وألا تحاول تبصيرها بمستقبلها ، فقد أحست ضآلة نفسها بعد أن سمعت آراء ابنة الأمس ، فقالت :

— يا بنتى احنا كل اللى عايزينه سعادتك ، وان ربنا يهدى سرکم •

والتفتت الأم صوب السماء وقالت :

— يارب اجعل أيامهم أحسن من أيامنا •

فقالت أحلام وهى تبتسم :

— واللا زيتها •

— واللا زيتها يا بنتى • والله أيامنا ما كانت وحشه •

وأخذت أحلام الغسيل وغادرت الحمام لتتشره ، والأم -
تنظر اليها في اعجاب وعجب •

وراح الوقت يمر ، وعاد الأولاد من مدارسهم ، وبدأت
مقاعب الغداء ، وارتفعت الأصوات ، وأقبل الزوج ، واتجه الى
غرفته ، وأسرت زوجته اليه ، فقال لها وهو يخلع جاكته :

— هيه • كلمتي أحلام ؟

— كلمتها •

— موافقه على جواز • ؟

— موافقه بس ! دا لو جاب محامي ما كتشي اتكلم له زي

ما تكلمت له •

— قالت لك ايه ؟

فقالت وقد التمعت عيناها ببريق الاعجاب :

— قالت كلام ما عرفش اقله أنا يا للى متجوزه بقى لى

تمنتاشر سنه •

ثم مصممت بشفتيها وقالت :

— بنات آخر زمن •

البغض للسلج

وقفت أحلام أمام المرأة تديم النظر الى وجهها ، ثم ترفع
يدها وتصلح الشعرات المبعثرة على جبينها ، واقتربت نبيلة
منها ومررت يدها على ظهرها لتذهب التقلصات التي كانت
بثوبها . ونظرت الى ساقها مليا ، فالتفتت اليها أحلام وقالت
وهي تبسم :

— ايه ، خط الشراب مش عدل ؟

فقالت نبيلة وهي تضحك :

— فين الشراب ده ، هو انتى لسه لمستيه ؟

ورفعت أحلام ثوبها ، والتفتت بنصفها الأعلى ، لترى
بطن ساقها وقالت :

— ما آه .. بصى عدل .

فازداد ضحك نبيلة ، وقالت :

— ح تستعمينى ، وأنا نظرى سته على سته ؟

وصكت ضحكات نبيلة أذن سامى ، فخرج من غرفته ،

وهو عارى الصدر ، يرتدى بنطلونا قصيراً وجوربا وفردة
حذاء ، وفى يده الفردة الثانية وقال :

— ايه الضحك ده ، زمان جلال طالع ، يقول علينا ايه ؟

فقلات نبيلة وهى تشيح بوجهها عنه :

— ايه • ما نضحكش ؟!

— لا ما تضحكش •

— هو حكم قراقوش ده ، والا ايه ؟

— أيوه حكم قراقوش •

— اسمع • انت ما لكش دعوه بيه • انت مش ولى أمرى •

— لازم تعرفى انى أنا مسئول عنك •

كانت الأم ترقب زوجها وهو يرتدى ثيابه ، فقالت له

همسا :

— يا راجل اخرج لهم خليك حمش •

وخرج الأب لهم وقال فى صوت خافت :

— ما بسن • زمان جلال طالع •

فقلات نبيلة فى عصبية :

— خليه يسكت عنى ، مالوش دعوه بيه ، دا مش عايزنى

أضحك •• مش عايزنى أتكلم •• مش عايزنى أتتنفس •• يعنى

أموت يعنى ؟!

فقال سامى :

— يا بابا مش سامعها بتضحك ازاي ؟

— يا بابا دا عامل نقره من نقرى •

ووقف الأب حائرا بينهما ، فأسرعت الأم لتضع حدا لهذا النزاع فصاحت :

— خللى عندك دم انت وهى ، ياللا كل واحد منكم على أودته ، مش عايزه أسمع حس حد فيكم •

وانسحب سامى الى غرفته ، ودخلت نبيلة الى غرفتها ، فاذا بأحلام فى شغل عنهم جميعا بتنسيق وضع الشيكولاتة على الصينية ، كان معها أرضاء جلال •

ولمحت الأم مرادا وهو مقبل من أقصى الشقة ، وقد اتسخت ملابسه ، وتلوثت يداه بالخبر ، فصاحت فيه :

— مراد • خش اشطف والبس هدوم نظيفه ، زمان جلال طالع •

فقال فى بساطة :

— وانا مالى ومال جلال ؟ !

— لما يشوفك وسخ كده يقول ايه ؟

— يقول الى يقوله ، هو جاي عشانى ؟

ونظر من خلال الباب فرأى أحلام ، فقال :

— اللي جاي عشانهم يتروقوا له •

فصاحت الأم فيه :

— خش ائشطف بلاش قلة أدب •
وأسرع مراد الى الحمام ، واتجهت الأم الى زوجها •
وقالت :

— كلمه بصراحه •• اسأله اذا كان ح يسكن لوحده واللا
ح يسكن مع أمه ، اذا كان ح يسكن مع أمه ما توافقش : احنا
لسه على البر ، واللاح تتكسف زى عوايدك ؟
فقال وهو يدس رجله فى الحذاء :

— أكسف ازاي !

— آه • دى بنتنا ولازم نريحها •

وصمتت قليلا ثم قالت :

— تعرف يا حسين أنا يوم ما اتخطبت قلبى ما دقش زى
النهارده • أنا مش عارفه مالى موهومه كده •• خايفه ••
الا يا حسين سألت عليه كويس ؟

— كل اللى سألتهم عنه قالوا انه ابن حلال •

وسمع ارتطام حذاء بالباب الخارجى ، فصاحت الأم :

— نبيله ، افتحى لاخوكى •

وأسرعت نبيلة الى الباب وفتحته ، واذا بعاطف يدخل
منفوش الشعر ، فى وجهه آثار عرق ممزوج بالتراب ، وقد
حمل فى يده فردة حذاء وتدلّى بنظلولونه فبدت الفانلة من تحت
قميصه القصير ، فصاحت نبيلة فيه وهى تجذبه من يده :

- ايه الوساخه دى • تعالى •
- وانطلقت به صوت الحمام وقالت لمراد :
- اغسله وشه وايديه معاك •
- وتركته ، فانسل مسرعا الى حيث أمه ، فقالت له :
- روح اغسل وشك وتعال عشان ألبسك البدله الجديده •
- فقال عاطف وهو يهز كتفه :
- قبله هاتى قرش •
- بعد ما تغسل وشك وتنصف ح اديك قرش •
- ودق جرس الباب الخارجى ، فقالت الأم :
- سامى افتح • جلال جه •
- لكن رنين الجرس ظل متواصلا ، فقال سامى :
- دى سوسن •
- طب روح افتح لها •
- وقال الأب وهو يرتدى جاكته وينظر الى هندامه فى
المرآة :
- الشيكولاته والملبس اللى اشتريتهم فىين ؟
- فقالت الأم :
- مع أحلام •

وأقبلت سوسن ، وفى يدها قطعة من كعكة عيد ميلاد ،
واتجهت الى أبيها وقالت وهى تتمسح به :

— بابا اשמعنى جيرانا كلهم يبيعولوا لأولادهم عيد
ميلاد ، واحنا ما بنعملش ؟

ومرر أبوها يده على شعرها فى حنكن وقال :

— عايزه تعملى حفلة عيد ميلاد ليه ؟ عشان تاكلى جاتوه
وشيכולاته ؟ أجيب لك جاتوه وشيכולاته .

— لا يا بابا . أنا مش عايزه أعمل عيد ميلاد عشان أكل
جاتوه وشيכולاته ، عشان أعزم أصحابى اللى بيعزمونى ،
عشان يفرحوا ويهيصوا معايا ، زى ما بفرح وأهيمص معاهم .
النهارده بقيت قاعده معاهم مكسوفه ، لأنى عارفه انى مش
ح اجيبهم فى عيد ميلادى ، لأنى ما ليش عيد ميلاد .

واكتسى وجه الأب بسحابة من الحزن ، وظل صامتا يغالب
مشاعره ، تحرك الحنان فى صدره فكاد يضعف ويعد ابنته بحفلة
عيد ميلادها ، وان كلفه ذلك ما لا يطيق ، واذا بزوجه تجذب
سوسن من يدها فى رفق ، وتقول لها فى صوت فيه رنة أسى
وحزن ، وان جاهدت أن ينبعث طبيعيا ، لا يشوبه ذلك الكدر
الذى حركه حرمان ابنتها من أمنية عزيزة من أمنائها :

— اسمعى يا سوسن ، اللى بيعملوا حفلات عيد ميلاد

أولادهم سيكون عندهم ولد اتنين مش زينا ، احنا لو عملنا
« عيد ميلاد » ح نعمل حفله كل شهر •

وتسرب ذلك الحديث الى آذان الأولاد ، فأقبل سامي
ونبيلة وأحلام ومراد وعاطف ووقفوا عند باب الغرفة يصغون ،
وكانما شاعت هالة أن تعلن عن وجودها فراحت تعبت في أصابع
رجلها وهي مستلقية في سريرها ، تصيح صيحات متتابعة •
وانبرت نبيلة تشد أزر أختها قالت :

— بلاش نعمل لكل واحد فينا عيد ميلاد ، نعمل عيد ميلاد
واحد لنا كلنا •

فقالت الأم :

— ونختار تاريخ الحفله دي ازاي ؟

فقال سامي وهو يشمخ بأنفه :

— بتعمل في عيد ميلادي أنا ، لأنى أنا أكبر ••

ولم تتركه نبيلة يتم جملته ، وقالت مقاطعة :

— ليه الأنانيه دي ؟

وقالت الأم منتهزه هذه الفرصة لتتخلص من هذه الورطة .

— ح تتخفقوا ! ياللا كل واحد فيكم علمي أودته •

وقالت أحلام في هدوء :

— ولا خناق ولا حاجة • نعمل الحفله دي في عيد ميلاد

بابا •

وصاح الأولاد كلهم موافقين :

— أيوه عيد ميلاد بابا •

واندفعوا اليه يلتفون حوله ، وأمسكت سوسن بينظولونه
وصاح مراد :

— يحيا بابا •

ودق جرس الباب ، فقال الأب :

— جلال جه • ياللا يا سامى افتح له ودخاه أودة
الاستقبال •

وخرج سامى ، وانسلت أحلام ونبيلة من الغرفة ، وقالت
الأم لمراد :

— ياللا روح اقلع هدومك اللي زى الزغت دى ، يا نبيله
خدى عاطف لبسيه •

وعادت نبيلة وتناولت يد عاطف وخرجت به . وأسرعت
سوسن لتتظر الى جلال من بعد ، وبقي الزوجان وحدهما فى
الغرفة ، فقالت الأم فى مرارة :

— طبعا يحبوك ويكرهونى أنا • ما انت دايما تصدرنى
لهم • أنا اللي أقول ما فيش فساتين •• ما فيش بدل •• ما فيش
جزم •• ما فيش خروج •• ما فيش فلوس •• از اى يحبونى

•• أنا من بعد النهارده ما ليش دعوه بأولادك • أنت اللي
تربيههم •

فماقترب منها وقال :

— انتى زعلتى ؟ ! أهم ولادى وولادك •• دول
ما يقصدوش •

— دى مش أول مره • دول بيعاملونى زى ما اكون مرات
أبوهم •

فقال وهو بيتسم :

— ولا يهكم • كفايه أنك تكونى أمى أنا •

وأسرع عاطف ، بعد أن ارتدى ثيابا جديدة ، الى غرفة
الاستقبال ، ووقف ببابها بالقرب من سوسن ينظر •

كان جلال جالسا فى المقعد المواجه للبواب ، وكان سامى الى
جواره • وقد ساد الصمت بينهما • ولمح جلال عاطف ، فقال له
وهو يهم لاستقباله :

— تعال • •

فقال عاطف وهو يهز كتفه :

— لأ ••

— تعال عشان أديك حاجة حلوه •

فقال عاطف وهو يتقدم :

— هات قرش قبله •

واربد وجه سامى وصاح فى عطف :

— ح اقطع رقبته •

وقال جلال :

— سييه •

وانطلقت سوسن كالعاصفة الى حيث كان والدها وقالت :

— ماما .. ماما .. الحقى • عطف بيشتحت من جلال

قرش •

فقالت الأم فى عصبية :

— امشى هاتيه ، هى العيال دى ما تسترش أبدا •

ومد الزوج يده الى عقدة الكرافة وأصلحها ، ثم سار الى
غرفة الاستقبال ، وزوجته توصيه :

— ما تنكسفش .. اذا كان ح يسكن مع أمه الله الخنى عن
دى جواز •

ودخل الأب الغرفة ، فنهض جلال لاستقباله ، وتصافحا .
وانسل سامى من الغرفة وراح يبعد أخوته عنها ، فيسمع الأب
وجلال همهمتهم ، فيرفع الأب صوته بالترحيب لينطفى
الضوضاء المنبعثة من الخارج :

— أهلا وسهلا • ازأى والدك ؟

— بخير والحمد لله •

واعتدل الأب فى جلسته ، وراح يجمع شتات نفسه ، فغذ
كان مقبلا على حديث خطير ، قال :

— أنا كل اللى سألتهم عنك قالوا انك طيب وابن حلال ،
وأنا يابنى يشرفنى انى أدى لك بنتى ، بس أحب أقول لك ان
العيشه اليومين دول صعبه ، كل حاجه غاليه ، فكرت ح تسكن
بكام وح تعيش از اى أيام أنا ما اتجوزت سكنت باتنين جنيه
ونص ، وكل اللى كنت باصرفه على البيت تلاته جنيه ، كنت
عايش بالمبلغ ده عيشة أمرا .. كنت باكل تفاح وموز وفراخ
وحمام ، وبالبس حرير وصوف انجليزى ، أفصل كل ست
اشهر بدله جديده .. كان القسط اللى بدفعه للترزى خمسين
قرش .

وسمع طرق خفيف على الباب ، فالتفت الأب فرأى أحلام
وبين يديها الصينية ، عليها صحاف من بلور ، نسقت فيها
الشيكلاته والملبس والجاتوه ، فنهض لياخذ منها الصينية ،
فأذا به يرى أبناءه جميعا قد اصطفوا خلف أحلام ، كانوا
أشبه بالقطط التى جاءت على رائحة السمك .

وضع الأب الصينية أمام جلال وقال :

— اتفضل ..

ومد جلال يده وتناول قطعة شيكلاته ، بينا راحت أحلام

تبتعد اخواتها عن الغرفة فى رفق وتحول بينهم وبين الهجوم على
الصينية المشتهاة •

ووجد جلال الفرصة سانحة ليتحدث ، فقال :

— حكاية الشقه فرجت •

— ازاي ؟

— بابا انتقل المنصوره ، ح ياخذ ماما معاه ، وح يسيب
لى الشقه •

وأحس الأب راحة ، فقال وهو يزفر فى اطمئنان :

— عال •

— أما الأكل واللبس ••

فقاطعه الأب قائلا ••

— الحاجات دى كلها مقدور عليها •

ونهض الأب مستأذنا ، وأسرع الى زوجته يزف اليها النبأ ،
ويطمئنها أن ابنتها لن تعيش مع حماتها تحت سقف واحد •

واستطاع عاطف أن ينسل فى غفلة من الجميع الى غرفة
الاستقبال ، وأن بذهب مباشرة الى الصينية ، وأن يغتتم
الفرصة لينفرد بما فيها وحده : وجلال يعاونه على فض أغلفة
الشيكولاتة ، وفطنت سوسن الى غياب عاطف ، والى تسربه
الى غرفة الاستقبال ، فخفت تشاركه الغنيمة • وأراد الأب

كانت فرصة ذهبية أن ينفردوا بالنيكولاته والملبس والتجتره



أن يعان بطريقة عملية أن جلالاً قد صار فرداً في الأسرة فأذن
لأولاده جميعاً أن يشاركوه جلسته .
وأقبل الجميع يسلمون عليه ، ودخلت الأم وصافحته في
شوق ، وما أن جلس الأولاد حتى رأوا فتك عاطف وسوسن
بالشيكلاتة ، فخف كل منهم الى الصينية ليأخذ نصيبه .
وجاءت أحلام ، ومدت يدها الى جلال ، فاذا به يضغط
على يدها في حب ، والتقت عيونهما لحظة ، كان لها في نفسيهما
وقع السحر ، واتجهت الى كرسي قبالة وجلست ، فشاع في
المكان جو عجيب من الحب والهيام ، ما كان يعكره الا الأيدي
الممتدة الى الصينية في تتابع ، ونظرات الزجر التي كانت
تسددها الأم الى أبنائها ، والتي كانوا يشيخون بوجوههم عنها ،
كانت فرصة ذهبية أن ينفردوا بالشيكلاتة والملبس والجاتوه ،
وأن يلتهموا ما يشاعون كما يشتهون تحت بصر أمهم وسممها ،
دون أن تقدر على زجرهم ، فرصة قلما يجود الزمان بمثلها ! .

أراد جلال أن يعلن أصهاره أن فى أسرته من يمتلك سيارة ،
فدعا شفيق ابن خاله ليذهب معه فى اليوم المحدد لقراءة
الفاتحة ، ودفع المهر والاتفاق على يوم الزفاف •

ووقفت السيارة أمام بيت حسين ، وهبط منها جلال وأمه
وأبوه وشفيق ، كان شفيق شابا فى الرابعة والعشرين ، طويل
القامة ، عربض المنكبين ، خفيف الظل ، من ذلك الطراز الذى
تهفو اليه القلوب من أول نظرة •

وكان عاطف وسوسن واقفين عند باب البيت ، فلما رأى
عاطف جلالا ، أسرع يحييه ، فمد له يده مصافحا وقال :
— أهلا صاحبى ، أنت جيت ؟

ورفعه جلال بين ذراعيه وقال له وهو يقبله :
— أهلا عاطف ، ازيك •

ووضعه على الأرض ، فرفع رأسه وقال :
— هات قرش بقى •

فوضع جلال يده فى جيبه وأخرج قرشا ، ووضع فى كفه ،
فقال سوسن كأنما تعلن عن وجودها :

— اخص يا عاطف ، ح اقول لماذا •

فقال لها عاطف :

— وانتى مالك ؟

— يا شحات •

ومد جلال يده فى جيبه وأخرج قرشا آخر وأعطاه لسوسن ،
فتمنعت تمنع الراغب ، ثم أخذت القرش فى خفة ، وقالت
لعاطف :

— تعال لما اشترى لك حاجه •

وابتعدا وجلال ينظر اليهما وهو فى طريقه الى البيت ،
وقد وسع خطاه ليلحق بأهله الذين سبقوه الى السلم •

ودق الجرس ، فاذا بحسين يفتح الباب فى سرعة ، فقد كان
يرصد مقدمهم ، ورحب بهم وقدم مصطفى علوان شفيقا الى
حسين ، وجلسوا يتبادلون عبارات الترحيب ورائحة البصل
المحمر فى السمن تملأ أنوفهم •

كان المطبخ على قدم وساق ، أصلام تغرف الطبخ فى
الصحاف ، والأم تحمر اندجاج ، ونبيلة وسامى ومراد يغدون
ويروحون بين المطبخ والأسفرة يحملون الصحاف والخبز والماء
المثلج •

وقالت الأم :

— روجى انتى يا أحلام غيرى هدومك •

فقالت نبيلة ، وهى تجفف يديها فى « الفوطة » التى كانت ترتديها فوق ثوبها :

— واشمعى أحلام ، ما اروح أنا رخره أغير هدومى •

فقال سامى متحديا ومتأهبا للشجار :

— هو ما فيش حد بيعمل حاجه ، الا لازم تعملى زيه •
ما تقولى لازم أتجوز أنا رخره •

— وانت حاشر نفسك فى كل حاجه ليه يا بايخ ؟ •

فقالت الأم :

— هس •• انكتموا وخللو عندكم دم ، الناس جوه • ياللا غوروا كلکم من وشى • مش عايزه حد منكم هنا •

وانسلوا من المطبخ ، وراحوا يرتدون ملابسهم • كأنما كانوا فى سباق ، وخرج سامى من غرفته يرتدى الحذاء والقميص والجاكته ، وهو يهرول صوب غرفة الاستقبال ، واذا بعاطف يضحك ضحكات عالية ، وأطلت أحلام ونبيلة برأسيهما ، ومراح يقول :

— سامى ح يقابل الناس من غير بنطلون •

ونظر سامى الى ساقيه العاريتين ، ثم عاد مهرولا الى غرفته ، فقالت له نبيلة وهى ترمقه فى زراية :

— بلاش خفافة والنبي •

وأتمت أحلام ارتداء ملابسها وتقدمت فى تودة إلى غرفة
الاستقبال ، وما ان لحها مصطفى علوان حتى قال مرحبا :
— أهلا • أهلا بعروستنا •

ونهبوا جميعا لاستقبالها ، وصافحتهم واحدا واحدا ثم
استدارت لتجلس فى كرسى بعيد ، فقال شفيق وهو يفسح لها
مكانا الى جوار جلال :

— ح تروحي غين : مهلك بقى هنا •• جنبه •

وأطرقت رأسها حياء ، ثم اتجهت الى الكرسى المجاور
لكرسى جلال وجلست •

وجاءت نبيلة فى خطوات راقصة ، وتقدمت ثابتة الخطو
وسامى ومراد خلفها ، وقالت وهى ترفع يدها الى رأسها
بالتحية :

— السلام عليكم •

ورد الجميع :

— وعليكم السلام •

واتجهت الى مقعد مواجه لمقعد شفيق وجلست ، وقعد
بالقرب منها سامى ومراد •

ولاحظت أم جلال أن نبيلة تطيل النظر الى شفيق فى
استغراب ، فقالت :

— شفيق ابن خال جلال ، كانوا سوا في المدرسة ، انتقلوا
مع بعض من فصل لفصل ، لغاية ما خلصوا الجامعة سواء .

وأقبلت زينب وصافحت الجميع ، وما أن استقرت في
مقعدھا ، حتى أخرج جلال عن جيبه علبة صغيرة من المخمل
الأحمر ، وفتحھا وتناول منها دبلّة راح يضعھا في أصبع أحلام ،
وقد أطرقت خجلا ، وان كانت كل خالجة فيها تنطق بالفرح ،
وقال له شفيق :

— حيلك • مالك مستعجل كده ؟

فقال والد جلال :

— خير البر عاجله •

والتفتت أم جلال ائي زينب وقالت :

— ما فيش حد يعرف يزغرط ؟

ولم تنس زينب بكلمة ، كانت الدموع تترقرق في مآقيھا ،
وأحست أن الأنظار ستتجه اليھا ، فنهضت وقالت :

— اتفضلوا •

وقام الجميع ، وقال شفيق وهو يفسح الطريق لأحلام
وجلال :

— العريس والعروسة الأول •

فقال جلال لوالده ووالد أحلام ، وهو يشير بيده :

— اتفضلوا ،

فقال مصطفى علوان وهو يبتسم :

— انتم الأول النهارده — دا احنا ما جيناش الا عشانكو •
وتقدم جلال وأحلام ، ثم سار الجميع خلفهم ، ومراد
يشق طريقه بينهم ، والتفت شفيق ، فاذا بنبيلة تسير الى
جواره جنبا الى جنب ، فرغت على شفتيه بسمه رقيقة •
وجلسوا حول المائدة ، جلال والى جواره أحلام والى
جوارها والددة جلال ، ثم نبيلة فسامى ، وجلس مصطفى علوان
فى صدر المائدة ، وجلس حسين أمام جلال والى جواره
زوجته ثم شفيق ومراد •
ومدت أم جلال يدها ، ورفعت الأطباق من أمام أحلام
وقالت :

— النهارده تاكلى انتى وجلال فى طبق واحد ، عشان
ما تفترقوش عن بعض أبدا •
وأطرقت أحلام حياء ، وقالت أم جلال لابنها :
— أقطع لقمه وغمسها فى الملح وكلوها سوا ، عشان يبقى
بينكو عيش وملح •
وابتسم جلال ، وبقي مترددا برهة ، فقال شفيق مشجعا :
— يللا يا جلال يللا •

وتناول جلال لقمة خبز غمسها فى الملح ، ثم قسمها جزأين ،
وغيب جزءا فى فمه ومد يده بالجزء الآخر الى فم أحلام ،

فالتقمته وقد تخرج وجهها بلون الدم ، والتقت عينا شفيق
بعيني نبيلة ، فإذا بها تنفجر ضاحكة ، فسددت إليها أمها نظرة
زجر قاسية •

وقال حسن وهو يشير بيده إلى الطعام المكس على المائدة :
— اتفضلوا •

وقال شفيق وهو يغرف الحساء بالمغرفة :
— ياما حضرت خطوبات كثير ، وكتب كتاب وأفراح ،
ما شفتش حكاية الميش والملح دى ولا الأكل فى طبق واحد •

فقال حسين وهو يبتسم :
— اللى يعيش ياما يشوف •

فقال مصطفى وهو يضحك :
— مهما عاش مش ح يشوف اللى شفته •
والتقت الى زوجته وقال مداعبا :

— الست دى ياما ورتتى ، ورتتى كثير •
ورمقته زوجته من طرف عينيها وقالت :
— يا راجل عيب •

— هو انا قلت حاجه ! انا قلت انك ورتتى كثير ، لكن
ما قلتش ورتتى ايه ، يمكن ورتتى حاجات حلوه كثير •
وشاع السرور ، وتوجت الابتسامات الشفاء ، وراح جلال
وأحلام يتناولان طعامهما فى طبق واحد ، وتعهد جلال أن تمس

يده يد أحلام ، والتقت عيونهما أكثر من مرة فى لمحات كانت
أفصح من حديث طويل •

وانتهز مراد فرصة انشغال الجميع فى الحديث ، فترك
الشوكة والسكين وراح يعالج قطعة الدجاج بيده •

وعلى حين فجأة ارتفع بكاء هالة ، فوقف فم أمها عن
الحركة ، وقطبت جبينها ، ثم التفتت الى نبيلة وقالت :
— هاتى أختك •

— ونهضت نبيلة وغادرت المائدة ، وصوت هالة يدوى فى
المكان ، وأراد مصطفى أن يزيل ذلك الحرج البادى على وجه
أمها وأبيها فقال :

— عقبال ما نفرح بيك يا شفيق •

فقال شفيق وهو يدس ورك دجاجة فى فمه :

— قريب أن شاء الله •

فقال له أم جلال :

— ما كنت بتقول مش ح تتجوز أبدا •

فقال حسين :

— الجواز نص الدين •

فقال شفيق مبتسما :

— دا النص الحلو فيه •

وعادت نبيلة تحمل هالة ودفعت بها الى أمها ، فأجلستها

على فخذها ، وراحت هالة تعبت بكل ما تصل اليه يدها ، عبت بالشوكة مرة ، وبالسكين مرة أخرى ، ثم وضعت كفها فى طبق به ملوخية ، ورفعته ومررتة على وجه أمها ، وتحملت الأم مضايقات ابنتها فى صبر ، وان كان الحنق يكاد يمزق صدرها •

وانتهوا من تناول طعامهم ، فغادروا المائدة وعادوا الى غرفة الاستقبال الا مصطفى وحسينا اتجهوا الى المكتب •

وأخرج مصطفى من جيبه رزمة أوراق مالية ، ودفع بها الى حسين ، وهو يقول :

— الشقة بعد أسبوعين ح تكون فاضيه ، اللي تشتروهم تقدرؤا تبعثوه على هناك على طول •

فقال حسين وهو مأخوذ :

— ان شاء الله •

— ربنا يتمم بخير •

ولاحظ مصطفى أن حسيناً يعانى ذلك القلق الذى يحسه المقدم على مغامرة ، فقال له ليُرفه عنه :

— دا كل شئ قسمه ونصيب ، أنا ربنا رزقنى بالست بتاعتى كانت سبب سعدى ، فهمتها وعرفت بركتها غين ، ماكنتش أعمل حلجه الا لما آخذ رأيها فيها ، وان قالت يمين أنا أعمل شمال ، أعمل عكس رأيها على طول ألاقى الحاجه مشيت وبقت عال •• ده توفيق كبير •• رضا •

وابتسم حسين وقال :

— ان اترنقنا فى حاجه نبقى ناخذ رأيها •

— خلاص بقى بقينا أهل ، وادى انت عرفت السر •

ونفض مصطفى وقال :

— يلا نقعد مع الأولاد •

واتجها الى غرفة الاستقبال ، ودخل مراد الى الشرفة
ينظر ، فرأى عاطفا وسوسن يعبثان فى سيارة شفيق ، ويفرغان
للواء من إحدى المجلات ، فأسرع الى أبيه وقال له هامسا .

— عاطف وسوسن فسوا عجلة الأوتومبيل •

فأشار الأب برأسه الى سامى أن يتبعه ، وخرج من الغرفة
ومراد معه ، فاذا بسامى ينفض ويتجه اليهما ، وقال الأب :

— العفارىت فسوا عجلة الأوتومبيل ، لازم تتفخها بأى
طريقه •

فقال سامى :

— آخذ مفاتيح العربيه من شفيق واشوف عنده منفاخ ،

وأنفخها •

فقال الأب لسامى :

— أنا عايزك تتفخها من غير ما يعرفوا •

فقال سامى :

— ح أنفخها ببقى !

وقال مراد :

— أنا ح اروح للمجلاتى • وح اخليه يجيب منفاهه ويبجى
ينفخها •

والتفت الأب الى سامى وقال له :

— هو انت ما تعرفش تتصرف أبدا ؟

وهرول مراد منصرفا ، وعاد الأب وسامى خلفه شامخا
بأنفه ، وما ان لحته الأم حتى نادت :
— سامى ، تعال •

ودنا منها ، فقالت له هامة :

— خد نبيلة وروحوا شيلوا الأطباق والحاجه من على
الترابيزة •

والتفت ناحية نبيلة ، فألفاها تتحدث مع شفيق وجلال
وتضحك ، فراها فرصة سانحة ليعكر صفوها فقال بصوت
عال :

— نبيله • تعالى •

والتفت اليه نبيلة فى ضيق وقالت :

— ايه ، عايز ايه ؟

وأحست الأم بداية العاصفة ، فقالت فى حزم :

— نبيله روحى معاه •

وسار سامى ونبيئة خلفه ، حتى اذا ابتعدا عن الغرفة قليلا ، قالت :

— نعم ؟

فأشار اليها بأصبعه ناحية المائدة ، فقالت له فى غيظ :

— ما تتطق عايز ايه ؟

— عايزينك تشيلى الأطباق الللى ع التراييزه •

وكانا قد وصلا الى المائدة : فراح سامى يستعرض ما عليها بنظرة ازدراء ثم قال :

— أنا عارف هوانم ايه الللى ياكلوا ويسيبوا التراييزه بالشكل ده !

— اذا كنت ح تشتغل ، اشتغل من غير ما تتنفس بكلمه أحسن لك •

وراحا يتنقلان بين المائدة والمطبخ ، يحملان الملاعق والسكاكين والشوك والصحاف ، دون أن يتبادلا كلمة • كان سامى يحمل الأشياء وذراعا مبسوطتان حتى لا تتسخ ثيابه ، بينما تسير نبيلة على أطراف أصابع قدميها ، كأنها ترقص على مسرح •

وبدأت فى جمع الفوط ، ووجدت كوبا موضوعا فوق فوطة ، فنجذبت الفوطة بقوة ، فصارت فى يدها بينما ظل الكوب على المنضدة • ورأى سامى ما فعلته ، فأراد أن يقلدها ، جذب

فوطّة ليخلصها من طبق موضوع فوقها ، فصارت الفوطّة
فى يده ، ولكن الطبق سقط على الأرض ودوى صوت تكسره ،
وصك الصوت أذنّى الأم فضمت هالة إليها فى غيظ ، وان ظلت
البسمة تتوج شفيتها •

ولاحظ مصطفى كثرة تلفت حسين صوب الباب ، فقام
وقال :

— نستأذن بقى •• يللا يا جلال •

فقال شفيق :

— اذا كان على جلال مش عايز يفشى أبدا •

وقال حسين وزوجته :

— والله ما انتو نازلين دلوقت • بدرى •

واتجه حسين الى مصطفى وقال له وهو ينظر فى الشرفة ،
ويرى مراد و « العجلاى منمكين فى نفخ عجلة السيارة ،

— والله لانت قاعد •

وقال شفيق وهو ينهض :

— ما تيجو معنا فى العربيه تشموا هوا •

فقال زينب وهى تنظر الى هالة :

— والأولاد !

— ييجوا معنا •

فقال الأم وهى تبتمسم :

— هو ذا معقول • هو فيه عربيه تاخذنا كلنا الا اذا كانت
أمنيوس •

واشرأب حسين بعنقه ، ونظر من خلال الشرفة ، فوجد
مرادا والرجل منهمكين فى نفخ العجلة ، فقال وهو يجلس :

— والله ما انتو نازلين دلوقت • اقعدوا شويه •• اقعدوا
•• قهوه يا نبيله •

فقال مصطفى :

— والله ما احنا قادرين نشرب حاجه ، نقعد ولا نشربش •
فقال حسين وهو يتنفس فى راحة :
— طب اقعدوا •

وجلسوا ، وأقبلت نبيلة وسامى ، وقال شفيق وهو يحاول
أن يقهر نفسه ويرغمها على عدم التطلع الى نبيلة :
— طب نيجى بكره ناخذكم ونتفصح شويه •

فقالت زينب :

— كتر خيرك ، وما تتعشى نفسك ، مش ح نقدر نخرج •
وقال جلال ، دون أن يحيد نظره عن أحلام :
— ناخذ الأولاد •

وضحك مصطفى وقال :

— ما بلاش لف ودوران وتقولوا انكم عايزين تفسحوا
أحلام •

وأطرقت أحلام في خفر ، وقالت نبيلة في بساطة :

— ليه ما نتفسحش بكره ، ما فيش ورانا حاجة ؟

وحجبتها أمها بنظرة تأنيب ، وقال لها أبوها :

— انتي حاشره نفسك ليه ، هو حد عزك ؟

وقال سامي :

— زى البصل محشوره في كل حاجة •

وقال شفيق :

— بكره نيحى ناخذ أحلام وسامي ونبيله •

وقالت الأم :

— والنبي ما تفتحش على نفسك الفاتحه دي •

وقال سامي :

— بكره المساعه خمسه تلاقونا جاهزين •

وجاء مراد وفي يديه ووجهه آثار شحم ممزوج بالتراب «

والعرق يتقصد من وجهه ، ووقف بعيداً وجعل يشير لأبيه

بيديه أن النفخ قد انتهى ، وأنه يريد نقوداً للرجل •

وهم أبوه بالذهاب إليه ليعطيه ما يطلب ، ولكن الأم

لمحته ، فصاحت :

— درمفت نفسك في ايه كده ، ركبت عجل تاني ؟

فقال مراد وهو ينظر إلى أبيه :

— هو عارف .. هو اللي قال لي •

— قال لك تدرمع نفسك كده !

وكان أبوه قد وصل اليه ، وأعطاه نقودا فانصرف مهرولا ،
ورأت الأم ذلك فقالت لزوجها فى تأنيب :

— بقى يوسخ نفسه وتديه فلوس ! أنا مش فاهمه •

وأحسبت أن الأنظار اتجهت اليها ، فكظمت غيظها وقالت :

— أهلا وسهلا • شرفتونا •

وقال مصطفى وهو ينهض :

— نستأذن بقى •

وقال حسين :

— خليكو على راحتكو •

وكان ذلك ايذانا بالانصراف ، فنهض الجميع وراحوا
يتصافحون ، وقد اختلطت أصواتهم ، وظل جلال يهمس بحديثه
لأحلام ، وكان آخر من انصرف •

وخف حسين وزوجه وسامى وأحلام ونبيلة ومراد الذى
عاد بعد أن أعطى الرجل نقوده الى الشرفة يرقبون ضيوفهم
وهم ينصرفون •

أسرع شفيق يفتح أبواب السيارة ، وتقدم مصطفى
وزوجته فى تودة ، بينما حمل جلال عاطفا بين يديه وقال له :

— عملت ايه بالقرش ؟

— اشتريت طباشير •

— فين هو ؟

— خلص • كتبت بيه ع الأتوميل •

ونظر جلال الى السيارة فاذا بها قد غطيت بخطوط ودوائر
بيضاء ، وان بابها كان أشبه بسبورة كتب عليها : زرع • درس •
وزن • فقد شاركت سوسن أخاها فى استهلاك الطباشير •
ووضع جلال عاطفا على الأرض ، وضربه مداعبا على
مؤخرته ، وقال له :

— اطلع على فوق •

ورفع بصره ، فانجذب الى أحلام ، كأنما لم يكن فى الشرفة
غيرها ، فابتسم لها ولوح بيده مودعا ، ثم سار الى السيارة
وركب الى جوار شفيق •

وغابت السيارة عن العيون ، فقالت الأم :

— ياللا • كلكو ع المطبخ •

وقالت نبيلة :

— يا ماما ورايا مذاكرة •

— اשמعنى المذاكره حليت دلوقت ؟ قدامى ع المطبخ اللى
ساييينه لايص وواقف على رجل •

وانسلت أحلام ونبيلة وسامى ومراد ، وبقي الزوجان

وحدهما فى الغرفة ، فالتفتت الزوجة الى زوجها وقالت :

— هيه • عملت ايه مع مصطفى ؟ •

— دفع لى المهر •

— وقلت له ان النجف والمشمع وحاجة المطبخ عليه هو انه

يجيبها ؟

— ما قتلوش •

— ما قتلوش ليه ؟

— ما جتش فرصه •

— ما جاتش فرصه واللائت اللى انكسفت ؟

— والله أنا مش فاهم الكلام ده • اشمعنى العريس يجيب

النجف والمشمع وحاجة المطبخ ؟ •

— الدنيا كلها ماشيه على كده •

— ما شفتش حد ماشى على كده الا انتو •

— قصدك تقول اننا خريناك تجيب حاجات ما حدش

يجيبها ؟ !

كل العرسان بتجيب الحاجات دى ، وان ما كنتش مصدقنى

اسأل •

— ولا بسأل ولا حاجه •

— بلاش ، أصل فلوسك كثير ، قال على رأى المثل •

— ما تقولى المثل آيه •

— أنا عارفه ؟ !

وذهبت الى المطبخ ، وانطلق خلفها ليعاون أولاده ، وهو
يغمغم :

— قال على رأى المثل : « عقلك فى راسك ، اعرف

خلاصك » •

الفصل التاسع

كانت الردهة خالية ، ولكن لم يكن للصمت فيها مكان ،
فالأصوات منبعثة من غرفة الوالدين ، وغرفة الأولاد وغرفة
البنات ، كان الجميع يتكلمون وما كان أحد يصغى الى ما يقال •
وقالت الأم :

— بس يا مراد ، انزل يا عاطف من ع الكرسي ، وانتى
يا سوسن ابعدى من هنا بلاش وجع دماغ •• أوه يا سامى
بلاش مناهده بقى •• ما كفايه يا نبيله كلام •
فكانت أشبه بمذيع فى مباراة كرة حامية •

وخرجت أحلام من غرفتها ، ترتدى ثوبا ورديا ، ضاق عند
خصرها غاية الضيق حتى ليحار المرء اذا ما فكر كيف مر ذلك
الثوب من صدرها الممتلئ عند ارتدائه ، واتسع غاية السعة
عند طرفه ، وزينت جيدها وأذنيها وصدرها بعقد وأقراط
و « بروش » من طراز واحد ، وكان شعرها ينطق ببراعة
الحلاق •

ومرت فى الردهة ، والأصوات تتناثر هنا وهناك ، فلم تحفل
بها ، كانت مشغولة بنفسها تعيش للحظة التى سيقدم فيها جلال
ليأخذها لأول نزهة بكل حواسها ، والتفتت الى الساعة المعلقة
فى الردهة ، فاذا بها الخامسة إلا خمس دقائق ، فقالت :

— ياللا يا نبيلة زمانهم جاينين •

فقالت نبيلة وهى تديم انظر فى وجهها فى المرأة :

— أنا خلاص لبست •

وقال سامى وهو يحاول أن ينيم شعره الذى كان أشبه
بعرف الديك :

— وانا جاى ااه •

ودنا مراد من أبيه وقال فى غضب :

— واشمعنى سامى اللى يروح معاها ؟

فقالت له الأم :

— المرء الجايه تروح معاها •

وقال سامى فى غطرسة :

— حتى انت ليك نفس : يا شيخ روح طلع الخبر من
صوابك قبله •

وقال مراد فى عناد :

— لازم اتفسح النهارده • ماليش دعوه •

ودنت سوسن من أمها وقالت :

— عايزين نتفسح — اشمعنى هم يخرجوا ؟
 وأسرع عاطف الى أبيه ، وقال له :
 — آه يا بابا نتفسح ، والنبي نتفسح •
 ورق قلب الأب لأولاده ، فقال لهم :
 — طب البسوا وأنا افسحكم •
 فقال سامى وهو فى طريقه الى غرفة أبيه :
 — يا بابا تاخذ مراد معاك ازاي وشعره طويل كده •• لا
 يحلقه قبله •
 فقا لمراد فى تحد :
 — وانت مالك ؟
 — ما هو يا ماما ••
 فقطاعته أمه :
 — بس ما لكش دعوه بيه • روح أنت مطرح ما انت رايع •
 وقالت سوسن وهى تتمسح بأبيها :
 — هم ح يركبوا أتومبيل •
 فقال لها الأب :
 — ح أركبكم أتومبيل •
 وقال عاطف فى فرح :
 — وانا اللي أسوقه •
 فقال الأب وهو يعبث فى شعره فى حنان :

— وأنت ألى تسوقه .. ياللا روحوا البسوا •
وخرجوا من غرفة أبيهم فرحين ، مراد يخلع جلسته
بيجامته ، وسوسن تحاول أن تخلع ثوبها وهى فى طريقها الى
غرفتها ، وعاطف يصيح :

— لبسونى .. لبسونى ..

وقالت أمه وهى تضع هالة بجوار أبيها :

— طيب • أنا جايه البسك •

والتفت الأب الى هالة وقال مداعبا :

— وانتى .. مش عايزه تتفسحى ؟

فقالت الأم وهى تهتم بمغادرة الغرفة وعاطف فى يدها :

— يا ريت تاخدها معاك وتريحنى •

ونظر الأب الى هالة ، فاذا بعاطفة الحنان تتحرك فى جوفه ،
واذا بأسايريه تتبسط ، واذا به يمد يديه ويحملها ، ويضمها الى
صدره ويقبلها •

وبلغ صوت نداء سيارة آذان الجميع ، فحدث فى الشقة
هرج شديد ، راحت أحلام تهول صوب باب الشقة فى فرح
وفى أثرها نبيلة وسامى ، وقد أخذ سامى يصيح :

— أيوه • نازلين •

وقالت سوسن فى غضب :

— اشمعننى هم ينزلوا قبله •

وجرى عاطف الى والده حافى القدمين ، وجذبه من بطنولونه
الذى كان يرتديه ، وقال له :

— ياللا احنا كمان ننزل بقى •

فقال له أبوه وهو يدفعه فى رفق :

— روح كمل لبسك ، وتعال ننزل •

وخف مراد الى الشرفة يرقب أخوته •

تقدمت أحلام الى السيارة فى دلال ، وان كانت المشاعر
الرقيقة المنبعثة فى جوفها انعكست على مرآة وجهها ، وضيق
من خطوها ، ولو طاولت نفسها وأطلقتها على سجيته الهزولت
وهى تتنادى : « جلال .. جلال » •

وتقدمت نبيلة فى رشاقة كأنما تسير على أطراف أصابعها ،
وقد شمخت برأسها فى كبرياء ولم تغير صفحة وجهها مسحة من
كبر ، وسار سامى وهو ينقل عينيه بين أحلام ونبيلة والسيارة •
كان كالمراقب الذى يخشى أن تشرده منه شاردة ، أو يأتى أحد
المراقبين بحركة فى غفلة منه !

وقفز شفيق من السيارة فى رشاقة وفتح بابها ، فحيته
أحلام بايماة من رأسها ، ومدت بصرها فألفت جلالا جالسا
خلف عجلة القيادة ، فصعدت لتشاركه فى المقعد الأمامى وهى
تقول فى نبرات مشحونة بالعاطفة المشبوبة :

— مساء الخير •

فقال جلالا مغازلا :

— مساء النور ، مساء الجمال •

وقالت نبيلة وهى ترفع يدها الى رأسها ، فقد نسيت
كبرياءها المصطنعة ، وعادت انى طبيعتها :

— السلام عليكم •

فقال شفيق وجلال :

— عليكم السلام .. أهلا •

ومدت يدها وصافحت شفيقا ، ثم صعدت الى المقعد
الخلفى ، وهى تمد يدها الى جلال لتصافحه •

وهز سامى رأسه محييا ، وغمغم بعض كلمات لم يفهم منها
شئ ، ولكنها أولت على أنها تحية • ووقف برهة مترددا يفكر •
واذا به لأول مرة فى حياته يتمنى لو أن أحد اخوته قد جاء
معهم ، حتى يجلس بين أحلام وجلال ، بينما يجلس هو بين نبيلة
وشفيق ، حتى يطمئن الى عدم تماس أجسام البنات بأجسام
الشباب •

وفى مثل لمح البصر تذكر أن هناك خطبة بين أحلام وجلال ،
وأنه لا غشاضة من تركهما جالسين فى مقعد واحد دون عازل ،
ما داما تحت بصره وسمعه ، فصعد وجلس الى جوار نبيلة ،
وقعد شفيق الى جواره وأغلق باب السيارة خلفه •

وانطلقت السيارة ، وقال جلال وهو ينظر الى أحلام :

— تحبوا تروحوا فين ؟

قالت نبيلة في نشوة :

— نروح الهرم ، أنا ما رحتوش من أيام ما كنت في
ابتدائي ، لكن لسه فاكروه المنظر الجميل اللى شفته هناك ساعة
الغروب ، منظر بديع ، كانت الشمس وهي نازله زى ••
وقال سامى مقاطعاً :

— ايش ودانا لهنك ؟

فقال شفيق وهو يديم النظر الى نبيلة ، دون أن يابه لعيني
سامى المحملتين :

— فكره جميله ، أنا موافق ع الهرم •

وقال جلال لأحلام :

— وانتى ، رأيك ايه ؟

فقالت وهي تنفوس في مقدمها :

— مطرح ما تحبوا •

فقال شفيق :

— يعنى موافقه • خلاص نبقى أغلبيه • ع الهرم •

وصمت سامى على مضض ، وان راح يمضغ غيظه ، وقال
شفيق لنبيلة :

— كملى • كتنى بتقولى : كانت الشمس وهي نازله زى
•• زى ايه ؟

فقلت وهي تضحك :

— والله ما انا فاكرك ، أنا لما حد يقاطعنى وانا باتكلم يطير
كل اللى فى مخى •

فقال سامى فى شماتة :

— الحمد لله انه طار ، والا كنا ح نفضل نسمعك للصبح •
فقلت له فى تهديد •

— سامى ، لم لسانك أحسن لك •

وأحس جلال أن الجو بدأ يتكهرب ، وأن نقاش نبيلة
وسامى سيخرجه من الجو الشعري الذى بدأ يستشعره ، وهو
قابض على عجلة القيادة وأحلام الى جواره ، والنيل ينساب
رقرقا كمرآة سحرية تعكس أفانين من الجمال ، تفجر ينباع
الحب والهيام ، فضغط على زر راديو السيارة فاذا بأنغام عذبة
تتبعث حنونة ، فتهدئ الأعصاب التى بدأت تثور ، وتجمل
الجميع يسترخون حالمين فى مقاعدهم •

ودنت أحلام من جلال ، ومالت برأسها نحوه ، ثم أسندته
على مسند المقعد ، وراح شفيق ونبيلة يتبادلان النظرات ، ثم
يطبقان الأجناف حتى لا تفر رؤى الأمانى العذاب ، التى كانت
الموسيقى تتفق مواهبها !

ونظر جلال الى أحلام ، فألفاها ترمقه بعينين والهتين ،
فيهما حب وفيهما رغبة وفيهما نداء ، فراح يديم اليها النظر ،

وتخاطبت العيون ، وانبتقت الأحاسيس ، وولدت اللحظات
المسحورة التى تنشئ فى ذاكرة المحبين ، وتختزن فى سويداء
القلوب ، لتعيش الأفتدة عليها فى السنين العجاف •
وفقد جلال سبطرته على حواسه ، كان فى شبه غيبوبة ،
استرخت قبضته على عجلة القيادة فإذا بالسيارة تتحرف ،
وتكاد ترتطم بشجرة ضخمة من الأشجار المغروسة على جانبي
الطريق •

وصاح سامى فى فزع :

— حاسب ح نروح فى داهيه •

وأفاق جلال من حامه ، وفى مثل لمح البصر سيطر على
السيارة ، وأبعدها عن الخطر ، فأحدث احتكاك العجل بالأرض
صوتا غطى على صوت الموسيقى ، ولكن سرعان ما تلاشى ،
وسرت مرة أخرى الألكان الحاملة •

وتأهب من فى السيارة ليستأنفوا شرودهم اللذيذ ، وإذا
بصوت سامى يعكر صفاءهم :

— والنبي تدور لنا محطه غير دى •

ومد جلال يده الى الأزرار ، والتفت سامى الى نبيلة وقال :

— شورتك كانت ح تودينا فى داهيه •• كان لازم الهرم ؟!

حككت !

فقال شفيق :

— حصل خير .. مين عارف كان ح يحصل ايه لو كنا رحنا
فى حتة تانيه •

وأرضى نبيلة أنبراء شفيق لتأييدها والدفاع عنها ، فمئحته
بسمة اعترافا منها بجميله •

وانطلقت السيارة حتى اذا لاحت الأهرام فى الأفق ، قالت
نبيلة فى انشراح :

— الأهرام أهيه .. مش عارفه أنا فرحانه كده ليه ، متعياالى
انى رجعت عيله صغيره .. عايزه انتشط وإجرى ، تعرفوا
لو توافقونى على عقلى ، تقفوا هنا وانزل أجرى .. أجرى لغاية
ها أصل الهرم •

فقال أحلام ، وهى تبتسم :

— تجرى من هنا لهنالك ؟ • كان انقطع قلبك •

وملا شفيق رثتيه بالهواء وقال :

— حاجة لطيفه • تيجوا نوقف العربيه ونجرى شويه •

فقال له جلال :

— اعقل •

كقال شفيق :

— والله نفسى أجرى • بقى لى زمان •

— طب استنى لما نوصل فوق •

ونظر شفيق الى نبيلة ، وقال دون أن يبعد عينيه عنها :

— سامى • تسابقنى ؟

فقال سامى فى غرور :

— ح اسبقك • ما فيش كلام •

فقال شفيق :

— الميه تكذب الغطاس •

وقالت نبيلة :

— وانا ح اخشن معاكم فى السباق ده •

فقال لها سامى :

— نفسى تبطللى غلبة ، ولا تحشريش نفسك فى اللي مالتيش

فيه •

وصعدت السيارة المنحدر ، ووقفت عند سفح الهرم الأكبر ،
وفتح شفيق الباب وهبط يتبعه سامى ثم نبيلة ، بينا ظل جلال
وأحلام فى مكانهما يصغيان الى الموسيقى •

ودارت نبيلة دورة على أطراف أصابع قدميها ، وقالت :

— احنا مش عايشين • أدى الحياة •

فقال لها سامى وهو يهز رأسه أسفا •

— نفسك تسيبى على طول •

— نفسى أبقى حره •• طليقه •• زى النسيم •

فقال لها سامى :

- ح نمثل .. شياطين الفن ح تتحرك •
- فدنا منه شفيق وقال له :
- انت فى سنه ايه ؟
- أولى ثانوى •
- فقال شفيق فى استنكار :
- اسه أولى ثانوى •
- فقالت نبيلة وهى تضحك :
- ما هو أولى ثانوى دلوقت .. يعنى تالته ثانوى زمان •
- دى حاجه تلخبط • ما افهمش حاجه فى النظام الجديد
- ده أبداً لدرجة انى فكرت مره أعمل جدول معادلات .. وانتهى
- فى سنه ايه ؟
- فقالت فى فخر :
- فى تالته ثانوى •
- ودى تساوى ايه فى جدول المعادلات ؟
- توجيهى •
- وناويه بعد ما تخلصى تقعدى فى البيت زى أحلام ؟
- فقالت وهى تشب على أصابع قدمها :
- لا .. ح اروح الجامعه ، وح ادخل كلية الطب •
- فقال لها سامى :
- دا بعدك •
- بكره تشوف •

— بكرة تشوفى أنت •

وقال شفيق :

— يالا مش ح نتسابق ؟

وراح يخلع جاكته ، ففعل سامى مثله ، ومد شفيق اليه يده بالجاكّة وقال :

— والله لو تسمح تودى الجاكّة دى معاك فى العربيه •

وتناول سامى الجاكّة ، وذهب الى السيارة ، وأحسّت أعلام دنوه فرفعت رأسها عن صدر جلال ، والتفتت اليه ، فاذا بجلال يلتفت ويقول :

— ناويين على ايه ؟

— ح نتسابق •

واقترب شفيق من نبيلة وقال لها :

— وليه ما تقعديش فى البيت زى أختك ؟

— أقعد فى البيت أعمل ايه ؟

— تعملى زيها •

— أملا قتل واغسل واطبخ وامسح • لا .. دانا ح ابقى

دكتوراه .. دكتوراه مشهوره .. أنا شايغه اليافطه دلوقت على

العياده .. « الدكتوراه نبيلة حسين » •

— بقيتى دكتوراه مشهوره • وبعدين ؟

وقالت مفكرة :

— وبعبدين ؟ وبعبدين ؟ مش عارفه .. ما فكرتش .. كان
أملئ انى أبقي دكتور .

وابتسم شفيق ، ووصل انيهما سامى ، وقال :
— ياللا . اقفوا جنبى هنا ، شايفين الحجر الكبير اللى
هناك ده ؟ ح نجرى لعنده ونرجع للعرييه .
واصفوا صفا واحدا ، والتقت سامى الى السيارة وقال :
— أحلام . خدى بالك . ح نبتدى .
وقالت أحلام دون أن تلتفت :
— حاضر .

واستأنف جلال حديثه وأحلام ترنو إليه فى وله :
— تعرفى ، نفسى أكون أنا وانتى لوحدنا فى جزيره ،
ما شفش غيرك ولا تسوفيش غيرى ، واسمك لوحدى ،
وما تسمعيش غيرى .
فقالته وهى تبسم فى اغواء :
— وإن زهقت ؟

— مش معقول أزق وانتى جانبى .
وازدابت قربا منه ، ورفعت بصرها اليه ، فاذا به يهوى
عليها ويقبلها وهو يضمها فى قوة .
وارتفع الصياح ، فالتفت جلال وأحلام ، فوجدوا أن سامى
وشفيق فى عودتهما بينما لم تصل نبيلة الى الحجر .

وقفت نبيلة ، وتلفت شفيق نحوها وخفف من سرعته ،
وراح سامى يعدو بأقصى سرعته مزهوا بنصره •

ووقف شفيق ، وانتظر حتى وافته نبيلة وسارت الى جواره
تلتفت أنفاسها ، وقال لها :

— تعبتى ؟

— حاسه ان قلبى ح ينط من بقى ، وان رجليه مش قادره
تشيلنى •

ومد لها ذراعه وقال :

— طب اسندى على •

وترددت ، وان كانت تلهث ، وتحس قواها تخور ، وفطن
الى ترددها غمد لها يده ، فاذا بها تضع يدها فى يده ، وتسير
معه •

وصاح سامى فى فرح وهو مستند الى السيارة :

— لما انتو مش قد الجرى ما تيقوش تتغالبا •

وأدار وجهه ناحية الغرب ، فاذا بالشمس فى الغروب ،
فهتف :

— ما تمدى يا نبيله شويه عشان تشوفى المنظر الجميل اللى
عجبك قبل الشمس ما تخيب •

وقال لجلال وأحلام :

— ح تفضلوا لابدين فى العربيه كده • مش ح تنزلوا
شويه ؟

فقال جلال وهو يفتح باب السيارة :

— آدى احنا نازلين •

ووقف الجميع برهة صامتين ، وهم يرصدون الشمس وهى
تغوص فى الأفق البعيد •

وركبوا السيارة وقد خيم الظلام على المكان ، وقفلوا
عائدين وقد سيطر عليهم السكون ، صمت الراديو وركن
سنامى الى الهدوء ، حتى نبيلة لم تنبس بكلمة ، كانوا جميعا
يجتثرون الحوادث التى انزلت من لحظات من دنيا الواقع الى
عالم الذكريات ، وقد راحت يد الخيال تتمقها فتزيدها فتنة
وجمالا •

ولاح فى وجه جلال وجد وهيام ، فمد يده ووضعها فوق
يد أحلام ، ليربط ما يدور برأسه بواقعه الذى يعيش فيه •

وبلغت السيارة الدار ، فأفاق الجميع من أحلامهم ، وفتح
الباب الخلفى وهبط شفيق وسامى ونبيلة ، ثم فتح الباب
الأمامى وهبطت أحلام وهى ترنو الى جلال وتقول :

— مش ح تطلع شويه ؟

— معلش المره دى •• بقينا ليل •• المره الجايه •

ومدت يدها وصافحته ، ثم صافحت شفيقا ، وانطلقت
مرحة ، وقالت نبيلة :

— السلام عليكم •

ولكنها لم تتصرف ، بل مدت يدها الى شفيق تصافحه ،
وأحست يده تضغط على يدها ، ففحق قلبها ، ونظرت اليه فاذا
في عينيه نور يأتلق ، فاستشعرت كأن تيارا كهربيا سري في
روحها فزلزل كيائها •

وتسمرت لحظة ، وقد أسند بها اضطراب لذيذ ، وأحست
في لحة أنها تغيرت ، لم تعد طفلة ، فقد راحت تمور في أغوارها
مشاعر ناضجة !

ودارت على عقبيها ، وسارت في ثورة ، كانت تستشعر
كأنها صارت طيفا ، ومع ذلك لم تتطلق في خطوات راقصة
على أصابع قدميها كماداتها ، بل انسابت في رزانة ، تطأ الأرض
بكل قدمها •

• ووقف سامي يودع جلالا وشفيقا ، ولم يتحرك الا بعد أن
ابتعدت السيارة وأبتلعها الظلام •

وصعدا الى الشقة واذا بمراد وسوسن وعاطف يخفون
اليهم ويلتقون بهم ، ويسألونهم في صياح :
— رحتم فين ؟ • رحتم فين ؟

فقال سامى فى فخر :

— الهرم •

وقالت سوسن فى حزن :

— بابا ضحك علينا ، وركبنا تاكسى شويه صغيره ورجعنا •

وقال مراد وهو يحاول أن يعترض طريقهم ليؤخر وصولهم

الى غرفهم :

— تعرفوا اعداد التاكسى ضرب كام ؟ تمنايه صاغ •

ودخلت سوسن على أبيها وقالت :

— أنا عايزه أروح الهرم •

وقال الأب فى أسى ، فقد جرح نفسه سخريه أولاده من

الفزحه التى حاول أن يدخل بها السرور على قلوبهم ، كان

يأمل أن يرضوا فإذا بها تخلف فى نفوسهم مرارة :

— حاضر •

وأقبل عاطف وقال :

— وانا با بابا •

وعبث بشعره وقال :

— وانت يا حبيبي •

ودخل مراد وقال :

— المره الجايه أنا اللي ح اخرج معاهم ، اشنمنى سامى

يعنى اللي يخرج معاهم كل مره •

فقالت الأم :

— هم خرجوا الا المرة دي ؟

فقال مراد وهو يعبث فى كرفاته أبيه المعلقة :

— ما انا عارفه لزقه ، ما يحبش الا نفسه ، وسامى أنانى

خطف الفسحة من قدامى •

فصاحت الأم فيهم جميعا :

— ايه لزمة الخوته دي دلوقت ؟ • ياللا امشى بره انت

وهو •

فقال مراد معترضا :

— ايه • احنا عملنا حاجة •

وهمت الأم وتحركت فى مقعدها وقالت :

— والله ان ما خرجتو من هنا لضرباكم بمصاية الفليه •

وفر الأولاد من الخرفة كأرانب مذعورة ، فالتفت الأب الى

الأم وقال :

— ليه بس كده ؟

فقالت الأم :

— دلهم يا خويا عشان يحبوك •• أنا ما اعرفش ادلع •

أنا أربى •• التربيه ما تنقص عمر •• قال على رأى المثل •

فقال الزوج مداعبا :

— طب المثل بيقول ايه ؟

— أنا عارفه ؟

— المثل بيقول : ربى ابنك واحسن أدبه ، التربيه ما تلخد
أجله •

— يا اخويا الأمثال كثير ، الواحد ح تفتكر ايه واللا ايه •
— آمال كل ما تتكلمى تقولى « على رأى المثل » ليه ؟
دا اللى يسمعك يحسبك قاموس فى الأمثال •
— يوه بقى •

وخلمت أحلام ونبيلة ثيابهما ، وارتدتا ثياب النوم ،
وأسرعت كل منهما الى سريرها لتعيش وحدها مع خيالها ،
وجذبت نبيلة الغطاء فوقها ، وتململت فى رقدتها وقد رفت على
شفيتها بسمة حالمه •

وأحست أن الضوء المنبعث من الردهة الخارجية يشغلها عن
الاستغراق فى أوهامها ، فقامت تطفىء النور ، ومرت وهى فى
طريقها الى الزر الكهربى بعاطف وهو غارق فى نومه على
الأريكة ، فلم تفكر فى حمله الى سريريه ، وضغطت على الزر ،
ثم عادت الى سريرها مسرعة ، وما ان اندست فى فراشها حتى
التفتت الى أحلام وقالت :

— سامحينى يا أحلام ، ما كنتش فاهمه انى بضايقتك
لما كنت بانور الأباжوره •• النهارده بس فهمت •


فقال أحلام في تكاسل :

— فهمتى أيه ؟

فقال نبيلة وهي تنام على ظهرها وتضع كفيها تحت رأسها ، وتشرد ببصرها :

— أنا عارفة ! فهمت كثير •

وهامتا في عالم وردى من التصورات ، ورفتا على شفتيهما ابتسامات رضا وأمان وأمل •



سامحيني يا أحلام ، ما كنتش فاهمه اني بخلايتك
لا كنت بانور الأبا جوره .. النهارده بس فهمت •

الفصل العاشر

وقف حسين أمام باب الشقة وفى وجهه سهوم ، ومد يده الى زر الجرس وضغطه ، ثم أرخى ذراعه ، وراح يعيث فى أصابعه • كانت حركاته توحى بالقلق • وفتح الباب ودخل ، وما أن خطا خطوتين ، حتى دوت زغرودة طويلة معدودة ، وبدرت حفنة من « الملبس » على الأرض ، فانقض الأولاد جميعا يلتقطون « الملبس » المنثور •

ونظر حسين الى زوجته فى تسؤل ، فقالت :

— دى الخياطه جابت فساتين أحلام •

ودلف حسين الى غرفته ، وزوجته خلفه ، وقبل أن يستقر على مقعده ، قالت له زوجته :

— الخياطه طالبه خمسين جنيه •

فقال وقد اتسعت عيناه :

— خمسين جنيه ! دا كثير •• كثير قوى •

— مش كثير • يا دويك • مش فصلت أربع فساتين سهر •

كوكيتل وخمسه تواليت وتمانيه اسبور وست جونلات وست
بلوزات وتلات بلوزات نايلون وجينون تواليت وجيون اسبور ؟
وأحس حسين رأسه يدور ، وقام الى الصوان وفتحه
وأخرج منه خمسين جنيها ، وقال لزوجته وهو يمد لها يده
بالأوراق المالية :

— خلاص • ما بقاش معنا حاجة ، المهر اللي خدناه ،
والقرشين الى كنا شايلينهم طاروا •

— ياما قلت لك اوعى لنفسك ، ياما قلت لك طالع لنا
بنات •

— يعنى كنا حا نعمل ايه ؟ ما ناكلش ! كل اللي كان بيعينا
كنا بناكل بيه •

— برضه لو كنا وعينا لنفسنا ما كناش احتجنا لحد دلوقت •
الى حمل •

وخرجت زينب ، وبقي حسين وحده فى الغرفة ، فالتفت
الى المرأة وقال لصورته فيها :

— دايمًا انت السبب •• انت اللي بتعزق الفلوس •• انت
الى ما وعش نفسك ، أنت اللي بتشتري كل شهر شغله
وجزمه وفستان عشان مودة اللي اشتريتهم الشهر اللي فات
اتغيرت • معلش • لك رب اسمه الكريم •

ودست الخياطة الأوراق المالية فى حافظتها ، وقبالت
أحلام ، ثم ربتت على خد نبيلة وقالت :

— عقبالك .. بس قريب أن شاء الله •

ومست أمنيقتها أذنى حسين فنظر الى نفسه فى المرآة فى
ذعر ، وقد فغر فاه دهشة •

وأسرعت نبيلة الى أبيها وقالت :

— بابا أنا عايزه فستان أبيض أنزل بيه مع أحلام •

فجرى سامى اليها حتى لا تفوته الفرصة وقال :

— غرنا ! ما تشوفش حاجه الا لما تجيب زيتها •

فالتفتت اليه وقالت :

— وانت مالك ؟

فقال لها سامى :

— مش تخلقى عندك نظر •

وقالت وهى تتصرف :

— ح اجيب فستان غصب عنك •

وأخرجت له لسانها فلم يأبه بها ، لأنه أراد أن ينتهز
الفرصة لنفسه ، فقال لأبيه :

— بابا ، أنا عايز بدله كحلى وقميص أبيض وجزمه لميع •

وجاعت الأم ، وسوسن تتمسح بها ، ولما رأت أباهما قالت :

— عايزه جزمه بيضه بكعب على • اشمعنى أحلام ؟

فصاح مراد وهو مقبل :

— ايه الطمع ده ؟ ، ما عندك جزمه سوده جديده • أنا اللي
ما عنديش حاجة أبداً ، أنا عايز بدله بينطلون طويل •

فقال سامى :

— انت تلبس بنطلون طويل !

— وانت مالك ؟

وصاحت الأم فيهم :

— ابعدوا دلوقت خللوا بابا يقلع ويستريح • ياللا بره •
وانسحبوا من الغرفة ، وبدأ الأب يخلع ثيابه ، ومدت
الزوجة يدها وتناولت ثوبا صغيرا من سرير هالة ، ونشرته بين
يديها وقالت فى هيام :

— شوف الفستان اللي خيطته الخياطه لهاله •• مش طعم
والنبي !

وخلع قميصه ، فبدت الفنانة ممزقه ، فقالت له الزوجه فى
انكار :

— بقى تصرف الصرّف ده وتستخسر فى نفسك فانلتين ؟

— والنبي تسيبيني فى حالى • أنا مش عايز حاجة ، نفسى
بس أسد بق البير المفتوح ده •

— كله ينتهى •

وأطرق صامتا ، وجلس يخلع حذاءه ، وبان فى وجهه الهم ،

وساد الصوت برهة ، وزوجه ترمقه فى قلق ، وأرادت أن تخرجه من صمته ، فقالت له :

— أحلام عايظه أربع تطقم نايلون •
فقال فى انكار :

— أحلام تلبس نايلون ؟ •

— وما تلبسش نايلون ليه ؟

— هو النايلون بيغطى حاجه • دأ فضيحه •

وأرادت أن تداعبه لترفه عنه ، فقالت له :

— وأنت أيش عرفك ، شفت النايلون على مين ، قول لى ؟

— شفته فى الفتارين •

— ياراجل !

— ما تشوفى حاجه غير النايلون ده •

— ح نيحى ع الآخر ونكسر بخاطرها ، نجيب لها الأربع

تطقم وخلص ، واهى ح تلبسهم فى أودتها •

فقال وقد شرد ببصره :

— ع الآخر ؟ مين اللى قال ع الآخر • قدامنا كثير ، بتاع

الموبيليا عايذ فلوس ، والمنجد عايذ فلوس ، والنحاس عايذ

فلوس ، وأنا خلاص ما بقاش معليا فلوس •

— وح تعمل ايه ؟

— عملت وخلص • طلبت استبدال جزء م المعاش •

— خساره !

— لا خساره ولا حاجه ، لو طلّت استبدال المعاش كله
كنت استبدلته ، مش أحسن ما الحكومه تورث فيه ؟

فقالت الزوجة فى فزع :

— ما وعيت •

— ح توعى ، ودى فيها كلام ح أموت يوم ، وح تورث
الحكومه فيه •

— بعد الشر •

وشرد ببصره وقال :

— أنا مش فاهم الحكومه تورث ليه ، ليه أمى ولا ابويه
ولا بنتى ولا ابنى ولا انا مسئول عنها •

وتمدد فى السرير ، ونظر الى حيث ترقد هلاله ، ثم التفت
الى زوجه التى تناولت حذاءه : وراحت تضعه فى مكانه ، وقال
لها :

— قولى لى يا زينب لو مت تعملى ايه ؟

فقالت له فى ضيق :

— أوه • والنبي تسبب السيره دى •

— وليه نهرب م اللى ح يحصل ؟ ما نفكر مسوا فى اللى
تعمليه لو مت •

— يمكن اموت قبلك •

- ونفكر فى اللى نعمله لو متى •
 — ودى عايزه تفكير ؟ ح تتجوز واحده تانيه تذلل الأولاد
 وتمرمطهم •
 — تفكرى كده ؟
 — ما فيش كلام • يعنى انت أحسن من مين ؟
 — طب لو مت قبلك تعملى ايه ؟
 — أشوف شقه على قدى ، وادبر عيشتى أنا والأولاد على
 قد القرشين اللى ح يطلعوا لى •
 — يعنى من مصلحتك ومصلحة الأولاد انى أموت قبلك •
 — أوه • والنبي تفض السيره دى • أنا عارفه النهارده
 مالك ، مسكت الحكايه دى واستقلعت ليه ؟
 وتركته وغادرت الغرفة ، واذا بسوسن تقبل وفى يدها
 ورقة ، ودفعت بها الى أبيها وقالت :
 — بابا عايزينك فى المدرسه تخضر مجلس الآباء •
 فقال وهو شارد :
 — حاضر •
 وأسرعت نبيلة اليه وقالت :
 — اשמعنى ح تخضر مجلس الآباء فى مدرسة سوسن ،
 وما حضرتش المجلس فى مدرستى ؟
 وخف سامى اليه وقال :

— مجلس الآباء بتاعنا بعد بكره ، ضرورى تحضره •
وصاح مراد :

— كل أصحابى أبيهاتهم حنروا مجلس الآباء •

وأقبلت الأم على صياحهم ، وقالت لهم :

— هو ما حدش يعرف يستريح شويه فى البيت ده ! بره •

وانسلوا من الغرفة ، وقال الأب :

— بس الواحد ح يروح هنا واللا هنا واللا هنا واللا هنا •

ح يجيب الوقت منين ؟ ! يعنى ما يجيناش بدل الكلام ده عضوية
مجلس ادارة شركه •• تحل أزمتنا ؟

— أنا عارفه عرسان اليومين دول ايه ؟ ! الواحد منهم يدفع
المهر ويسلت ايده ، لا نفقه ولا نشان ، فاكرو الهدايا الحلوه اللى
كنتن بتبعيتها لى فى المواسم ! عروسة المولد اللى قد كده !
والحلاوه الحمصيه والسمنيه ، واللا السمك اللى كان يملأ
طشوت •• والنشان اللى بعقولى •• الفستق القصب والجزمه
القصب ، والشرابات الحرير والصابون المسك ، والشباشب
اللى قلبك يحبها • تصدق ان الهدايا اللى بعته لى فرجتنى أكثر
من كل الحاجات اللى جابوها لى ؟

— دى بقت موضه قديمه •

— موضه قديمه ! والله كانت تشرح القلب ، ده فقر اللى

بيعملوه اليومين دول •

— تعرفنى أنا كل ما اشوف سامى ومراد وعاطف بتهذا
نارى •

— ليه ؟

— مسيرهم ح يتجوزوا يوم ، وادفع لهم المهر وبس
واسلت ايدى انا كمان ، وأسيب غيرى يك ، واخذ بتارى •
وسمع ارتطام حذاء صغير بالبواب ، فقالت الأم :
— عاطف جه ، كان فين غطسان من بدرى ؟

وأسرت تفتح له الباب ، وبدأت هالة تبكى ، فنهض
حسين وحملها فى حنان ، وقال لها وهو يرقصها بين يديه :

— تعرفى لو عشت لغاية ما أجوزك ، ح اجوزك جهاز
ما فيش واحده اتجهزته ، مش ح يبقى ع الحجر غيرك •

وضمها اليه وقبلها قبلة أنسته كل آلامه ومتاعبه ، أحس
الكدر الذى غبش صدره ينقشع ، والهموم التى كادت تنقض
ظهره تتلاشى ، وإذا ببصيص من الأمل يبدد ظلام نفسه ، ثم
ينداح حتى يملأ جوانحه •

وفتحت الأم الباب ونظرت ثم ارتدت خطوة وصاحت :

— ايه القرف ده ؟

كان عاطف يرتدى قميصا أبيض مخططا بخطوط حمراء ،
صار رماديا من أثر التراب ، وقد التصقت خصلات شعره
بجبته من أثر العرق المتصبب منه ، وكان بنظرونه ممزقا عند

فخذه ، أما حذاؤه فلا لون له ، وفى يده قطعة جبل وفى نهايتها
كلب صغير ، أذناه طويلتان تخطان فى الأرض وشعره متهدل ،
أبيض اللون ، حول عينه اليسرى هالة سوداء •

وجذبت الحبل من يده ، ولكنه تشبث به ، فقالت له :

— سيب الكلب ، جيبته منين ؟

— واحد صاحبى أداهولى •

وعوى الكلب ، فاذا بأحلام ونبيلة وسوسن وسامى
ومراد ، يتسابقون الى الباب ، أحلام فى قميص النوم ، ونبيلة
ترتدى بنطلون البيجاما ، عارية الصدر ، حافية القدمين ،
وسامى ليس عليه الا بنطلونه الأبيض القصير ، ومراد
بالفانىلا و « الكلسون » ، أما سوسن فقد راحت تهول وفى
قدميها شبشب كبير •

وخرج الأب من غرفته ينظر وهو يحمل هالة •

وقالت الأم وهى تجذب الحبل :

— ما تتعشش نفسك ، الكلب دا مش ح يخش الشقه أبدا •

وقالت أحلام :

— يا جماله !

وأسرعت نبيلة اليه وحملته ، فصاحت فيها أمها :

— نزليه ع الأرض ، مش شايفاه وسخ ازاي ؟

فقالت نبيلة :

— ح أحميه •

وقالت سوسن :

— والنبي يا ماما تسيبيه ، دا لطيف خالص •

وصاح مراد :

— ح ننصفه ، ح نخليه قل •

فقال له أمه فى غيظ :

— ياخى روح نصف نفسك •

وسارت نبيلة به الى الحمام ، واخوتها خلفها يتصايحون ،

فقال لها أمها :

— يعنى عفيتى دلوقت ، لا تعبانه ولا مهمده ولا وراكى

مذاكره ، ما تتشطريش الا فى الحاجات الهايفه •

وأغلقت الأم الباب خلفها ، وسارت مهزومة حتى اذا بلغت

زوجها قالت له :

— هو البيت كان ناقص كلاب ! ما كفايه اللى فيه •

وسار الزوجان الى الحمام ووقفا بعيدا ينظران ، وجدا

أحلام تدلك جسم الكلب بالصابون بينما راحت نبيلة تصب لها

الماء ، بينما راح عاطف يصيح :

— ده كلبى ، أنا الى أحميه •

وطفق يمد يده ليأخذ من نبيلة الكوز ، وسامى ييمده ،

ومراد يقول له :

- استنتى لما يستحمه ابقى خده •
- وقالت سوسن وهى تلوح بالمشط فى يدها : •
- أنا الللى ح اسرحه •
- وقالت أحلام :
- ناولنى فوطه يا سامى •
- قالت الأم فى غضب :
- مش ناقصنا الا الكلب نجيب له فوط راخر ، وهو انتو
مش داريين ، ما بتحسوش • والله الللى ح يحط الفوطه على
جسمه ح يعرف شغله •
- وشقت نبيلة طريقها الى غرفتها وعادت بجاكتة بيجامتها ،
ولفت الكلب فيها ، ثم عادت الى غرفتها واخوتها خلفها •
- وسارت الأم الى غرفتها مطرقة وزوجها الى جوارها ،
وقالت له :
- هو احنا قادرين ناكلهم لما ح نأكل الكلب ؟ قال على
رأى المثل •
- فقال زوجها وهو يبتسم :
- مش لاقيين العيش ياكلوه ، يجيبوا كلب يربوه •

الفصل الثماني عشر

اصطف الأولاد في حلقة واسعة ، وقد ركع سامي ومراد
وأحلام ونبيلة وسوسن على ركبهم بينما ظل عاطف واقفا ،
ووضعوا الكلب في مركز الدائرة ، وقالت نبيلة :

— اللي يروح له الكلب يبقى ح ينجح السنه دي •
وراح كل منهم يناديه ، ويفريه بالاتجاه اليه ، فارتفعت
فرقة الأصابع ، وصفر كل منهم بفمه بطريقته الخاصة •
وترددت النداءات :

— بوبى • بوبى •
ووقف الكلب حائرا ، يدير رأسه يمينا وشمالا ، وقالت
نبيلة :

— بلاش نقول له « بوبى » نسميه اسم تانى •
فقال أحلام وقد وضعت سبابتها على خدها :
— نسميه آيه ؟
وشردت ببصرها تفكر ، وهي تعض شفتها السفلى
بأسنانها ، وقال سامي :

— نسيمه جالجل •

والتفت الى أحلام ، وضحك ضحكة ساخرة ، فنهرته نبيلة
قائلة :

— بلاش قلة أدب •

وتوردت وجنتا أحلام ، والتفتت الى سامى غاضبة ، وقالت
فى غيظ •

— ح نتخاف ؟

وقال عاطف :

— نسيمه « عاطف » •

وضحك الأولاد ، وقالت سوسن وهى تضحك ، لتعلن
الجميع أنها فهمت سبب ضحكهم :

— يعنى عاطف كلب •• يعنى عاطف كلب •• هى هى ••
هى هى ••

وقالت نبيلة وهى تفرقع بأصابعها :

— نسيمه سوزى •

فارتفعت الأصوات تنادى .:

— سوزى • سوزى •

واختلطت الأصوات بفرقة الأصابع ، وصفير الأفواه ،
والكلب يصبص بذنبه ويتلفت ، ثم يتقدم الى أحلام •

وحملته أحلام فى فرح وضمته الى صدرها ، وصاح
الأولاد جميعا وهم يضحكون :

— أحلام ح تنجح السنة دى •

وأسرعت اليها سوسن تضمها فى فرح لتعلن سرورها
بنجاحها ، وقالت أحلام وقد توجت شفتيها بسمّة عذبة :

— ح انجح فى آنى امتحان ؟

ورنت اليها نبيلة رنوة ذات مغزى ، وقالت لها :

— هو ضرورى تنجحى فى الامتحان ، أهو ح تنجحى
والسلام •

وعلا بكاء هالة على ضجيج الأولاد ، فنادت الأم :

— نبيلة ، تعالى خدى أخذك لعبوها ، والا يعنى مش ح
تحصل الكلب !

وقالت نبيلة :

— مراد ، هات هاله والنبي •

فأسرعت سوسن تهزول الى الردهة وتقول :

— أنا اللي ح اجيبها •

وانطلقت الى حيث كانت أمها جالسة على الأريكة ،
وحملت هالة ، ثم عادت بها ، فقال سامى :

— حظوها مع الكلب لما نشوف ح تعمل ايه ؟

فقال مراد معترضاً :

— لا ، خ اقول لاما •

ولم يأبهوا لاعتراضه ، ووضعوا هالة والكلب فى وسط الدائرة ، واشترأبوا بأعناقهم ينظرون •

وتمسح الكلب بها ، ومدت يدها تجذبه من شعره ، فانطلقت صيحات الرضا ، وراحوا يزحفون على ركبهم يضيئون الحلقة ، حتى ينعموا بمراقبة الغزل الدائر بين هالة وسوزى • وخرج الأب من الحمام ، يلف حول عنقه قوطة مبتلة ، وقرع أذنيه صياح الأولاد ، فسأل زوجته :
— آيه الزيته دى ؟

— زيتة أولادك اللى بتدلهم ، بيلعبوا الكلب ، يا راجل
كش فيهم خليهم يوطوا حسهم •
— وانتى ما كشتيش فيهم ليه ؟

— طول عمرى بكش فيهم لوحدى لما بقيت العدو ، روح
انت ربيهم مره •

وانطلق فى عزم الى حيث كانوا يلعبون ، وزوجته تنتظر اليه ، وقد أصاغت السمع ، ووضعت القميص الذى كانت ترتقه جانباً •

ووقف عند باب الغرفة ينظر ، فرأى هالة تجذب الكلب من أذنه وتحاول أن تضعها فى فمها ، فاحتلت وجهه بسمه عريضة ، ودغدغت أذنيه ضحكات أبنائه ، فاستشعر مشاعر

رقيقة تتبثق فى أعماقه ، وتقدم مسرورا يشاركهم حبورهم •
وركع على ركبتيه ، وأبعد « الفرطة » عن عنقه ، وراح
يفرقع بأصابع يديه فى توافق عجيب كأنما يدق لحنا راقصا •
وبدأت سوسن تتمايل على الأنغام ، وتشجع مراد وراح
يصفق لها على الوحدة ، ولم ينهره أبوه ، فصفقت نبيلة وأحلام
وسامى معه ، وأسفر تمايل سوسن عن وجهه الحقيقى ، فاذا بها
ترقص وتميل برأسها إلى الخلف ، حتى مس شعرها كعبها ،
وبطنها فى حركة دائبة •

وجلجلت ضحكات ناعمة ، وتعالَت الأصوات ، وقرع ذلك
أذن الأم فقطبت جبينها وجذبت القميص الذى نحتته فى
عصبية ، ثم استأنفت رتقه وثبتت أزراره •
وتتابع رنين جرس الباب فانقطع التصفيق وفرقة الأصابع
وتوقف الرقص ، ومد الأب يده وأخذ الفوطة ووضعها على
كتفه وهم بالانصراف ، وأسرع مراد الى الباب يفتحه •
وقال مراد :

— أهلا جلال •

ومس صوت جلال أذننى الأب وهو يقول : « أهلا بيك »
فوسع من خطوه ، حتى دنا من زوجه وهمس :

— جلال جه •

فقالت وهى تنهض :

— ياريتہ كان جہ من بدری وشافک وانت بقرقص العیال •
ووقفت أحلام تصلح ہندامہا ، وراحت نبیلہ تمرر یدہا
على شعرہا وفى عینہا قلق ، وحمل عاطف کلبہ وجری الى
غرفۃ الاستقبال حیث دخل جلال •

وقالت أحلام لسامی :

— احملى ہالہ •

— وانا مالى •

وغادر الغرفۃ لیرتدى ثیابہ ، والتفتت أحلام الى سوسن
وقالت :

— سوسن شاطرہ • احملى اختک •

فقالت وهى تہز کتفہا :

— وانا مالى •

— احمليہا وح اديکى قرش •

— ہاتى قبلہ •

— روى خدیہ من شنطتى •

ولم تنتظر حتى تحمل سوسن ہالہ ، بل انسابت مرحة الى
غرفۃ الاستقبال وفى أثرہا نبیلہ •

كان جلال یداعب الکلب ، وعاطف ينظر اليہ مسرورا ، بینا
راح مراد يفتح الشبایک ، واقترب عاطف من جلال وقال لہ :
— عجبک الکلب ؟

فقال جلال وهو يعبث فى رأس الكلب :

— لطيف خالص •

فقال عاطف وقد لمت عيناه خبثا :

— طب ادى له قرش يشتري بيه بسكويت بقى •

وسمعت أحلام ونبيلة ما قاله عاطف ، فوقفت أحلام وأطرقت خجلا ، ووضعت يدها على فمها ، ودفعتها نبيلة فى ظهرها تحثها على التقدم ، وهى تبتسم ، وصاح مراد فى أخيه :

— امش اطلع بره ، بلاش قلة أدب •

وقال له جلال :

— ما تسييه ، دا صاحبى •

ووقف جلال ومد يده فى جيب بنطلونه ليخرج القرش ، واذا به يلمح أحلام مقبلة ، فيمد يده مصافحا ، ثم يصافح نبيلة ويشغل بحديثهما عن عاطف •

وجلس جلال والكلب فى حجره ، وأصابه تتخلل شعره فى حنان ، وقد تعلق عيناه بوجه أحلام •

ورمق عاطف أحلام ونبيلة فى غيظ ، عطل دخولهما حصوله على القرش ، ورمى جلال بنظرة شزراء ، ثم هجم عليه ينترع الكلب منه ويقول :

— طب هات الكلب بقى •

فقال جلال وهو يقف ويمد يده فى جيبيه :

— انت زعلت ؟ لك حق • خذ القرش ايه •

فقال أحلام فى عتاب :

— ما تعلموش على كده •

فقال مراد وهو يطوح يده فى يأس :

— هو اسه ح بتعلم ، ما خد على كده وخلص •

ودخلت زينب وصافحت جلالا وقالت لمراد :

— افتح الشباك اللى وراء جلال ، النهارده حر •

فقال جلال منتهزا هذه الفرصة :

— بلاش تعب • احنا ح نخرج نتمشى ع النيل شويه ،

ياللا يا أحلام •

واتسعت عينا الأم ، وثارت دماؤها ، ولكنها كبحت جماح

عواطفها وقالت فى صوت مضطرب جاهدت أن يكون طبيعيا :

— طب استنى لما نشرب حاجه •

— لا معلى •

— استنى حسين جاى •

وقامت نبيلة وتظاهرت بأنها تصلح ضلفة الشباك ، ورمت

ببصرها • كانت ترجو أن ترى السيارة واقفة ، وأن تلمح شفيقا

فيها ، ولكنها رأت الطريق خاليا ، فانقبض صدرها ، وعادت

الى مقعدها مطرقة •

وانصرفت الأم ، وانطلقت الى زوجها ثائرة ، وقالت له :

— سمعت ؟ عايز ياخذها ويخرج •
 وقال الأب فى بساطة وهو يرتدى جاكته :
 — وفيها ايه ؟
 — وفيها ايه ازاي ؟ يخرجوا لوحدهم ؟
 — مش قارى الفتحه ودفع المهر ؟
 — والله ما يخرجوا لوحدهم ولو اتكتب الكتاب ،
 ما يخرجوا الا بعد الدخله •
 — وح تعملي ايه دلوقت ؟
 — ح اتصرف •
 وعادت الى غرفة الاستقبال ، ولكنها لم تدخل ، بل وقفت
 بعيدا بحيث يراها مراد ، ولا يراها جلال ، وجعلت تشير بيدها
 لمراد أن تعال •
 وقال مراد بصوت عال دون أن يتحرك :
 — ايه • فى ايه ؟
 ووضعت أصبعها على شفيتها تأمره أن يلزم الصمت ، ثم
 عاودت الإشارة له بيدها ، فذهب اليها وهو ضيق بها ، وما أن
 وصل اليها حتى همست له :
 — روح البس هدومك عشان تخرج مع أحلام وجلال :
 قوام •
 وهرول الى غرفته ، وفتح درج « الشوفنيير » وبحث عن

قميص نظيف له ، فلم يجد فأخذ قميصا من قمصان سامى ،
ولحه سامى وهو يسرح شعره ، فقال له :
— سيب القميص ده •

فقال مراد ■

— ما عنديش قمصان • كل قمصانى اتوسخت •
وأسرعت الأم اليهما وقالت لسامى الذى انتزع القميص
من يد أخيه :

— خليه يلبسه يا سامى •

— لا يا ستى • عشان يجيبولى نصين ؟

— أن قطعه أجيب لك غيره •

— ما ليش دعوه •

— طب اديهوله واشترى اك بداله •

وقال سامى وهو يلقي بالقميص فى وجه مراد :

— اذا كان كده مطش •

وراح مراد يرتدى ثيابه فى عجلة ، وأمه تعاونه ، ووقعت
عينها على حذائه ، فقالت له :

— جزمك وسخه قوى •• فين الورنيش ؟

فقال سامى وهو يغادر الغرفة :

— لو كانوا بياكلوه ما كانش يلحق يخلص بالشكل ده •

وراحت الأم تلتمع حذاءه بخرقة ، حتى اذا اطمأنت الى
مظهره ، رنت اليه لحظة وقالت :

— ياما نفسى تفضل نضيف كده على طول •
وسارا الى غرفة الاستقبال يودخلا • ولمح مراد كأسا على
الصينية فيها شراب وردى بين الكؤوس الفارغة ، فخطر له أن
يتناولها ولكنه وقف مترددا ، وأحست أحلام به ، فقالت له :
— اشرب الشربات بتاعك •

ورفع الكأس الى شفتيه ، فقال له سامى :
— حاسب توسخ القميص •
وابتسم الجميع الا نبيلة فقد ظلت ساهمة ، ولاحظ جلال
صمتها فقال لها :
— مالك النهارده ؟ ساكنه ليه ؟

وتوردت وجنتاها ، وأحست دماء حارة تتدفق فى عزوقها ،
وقالت وهى تمرر يدها على جبينها :
— مش عارفه مالى • عندى صدا ع شويه •
وقال لها أبوها :

— خدى لك اسبرنتين وكباية شاي وخشى نامى •
ونهضت لتفر من الغرفة ، خيل اليها أن العيون كلها صوبت
اليها ، وأن أمرها كاد ينكشف •
وقام جلال وقال لأحلام :

— يلا •

ونظرت الأم الى مراد ، فنهض وسار جلال وأحلام الى جواره وانطلق خلفهما مراد • وقبل أن يصلا الى الباب كان مراد يسير بينهما •

وأحس به جلال ، فلم يشعر بارتياح ، وكبت عواطفه وابتسم وقال له :

— جاى معنا ؟

فقال مراد فى ثقة :

— آه •

ولم تنهره أمه ، ولم يزجره أبوه ، فقال له جلال :

— تشرف •

وانطلقوا وقد تكدر صفو جلال ، وان راح يربت على ظهر مراد ، ويمرر يده على شعره • وبلغوا الجزيرة ، وساروا فى الطريق المنساب على ضفة النيل ، وقد أضيئت المصابيح الخافتة التى عجزت عن قهر جحافل الظلام ، وكان مراد يسير بينهما ، ويشاركهما الحديث •

وأراد جلال أن يسير مع أحلام جنباً لجنب ، فوسع من خطوه وانتقل الى جوارها ، وإذا بمراد يندس بينهما ويفصلهما • وضاق جلال به ذرعاً ، فجذبه من يده ، ونقله الى يمينه فصارت أحلام عن يساره لا يفصل بينهما فاصل •

والتصقت كتفه بكتفها ، ومال رأسهما حتى كادا أن يلتصقا ، والتقت العيون وهمس جلال :

— أحبك •

فقال مراد •

— بتقولوا إيه ؟

فقال جلال فى اضطراب :

— كنت باقول الجو لطيف النهارده •

فقال مراد :

— أبدا • الدنيا حر موت ، أنا عارف طايقين تتلزعقوا فى

بعض كده ازاي ؟

وابتعد جلال عن أحلام ، وقد لمعت العيون بالبسمة التى

كبتتها الشفاه !

وانطلقوا ، وما ان ابتعدوا خطوات حتى التصق الكتفان ،

ومال الرأسان ، وتحديثت العيون ، وتحركت المشاعر فى

الصدور ، وهمس جلال مغازلا :

— قمر •

ومست الكلمة أذنى مراد ، فقلب وجهه فى السماء وقال :

— فين ده القمر ؟ مش شايف حاجه •

فقال جلال ، وهو يئد البسمة التى ولدت على شفتيه :

— سألتنى أول الشهر العربى امتى ؟ قلت لها ، لما يطلع القمر .

فنظر مراد اليه فى دهش وقال :

— سألتك امتى • أنا ما سمعتش حاجه •

وأشاحت أحلام بوجهها حتى لا يرى أخوها البسمة العريضة التى ارتسمت على وجهها ، وقال جلال ليغير مجرى الحديث ، وهو يشير الى مركب يسير فى النيل •

— شايف المركب ماشى بالليل ازاي ؟

فقال مراد :

— وايه يعنى ، ما المركب بيمشى بالليل وبالنهار •

فقال جلال :

— صحيح •

وضربه على ظهره بقوة وهو يقول له :

— شاطر • ما كنتش فاهم انك كده •

ووصلوا الى جسر التحرير ، كان يأتلق بالنور والسيارات تنساب فوقه فى صفوف ، والناس على جانبيه يتدافعون بالمناكب ، فاندسوا بين الجموع ، وقد أتاح الزحام فرصة التصاق جلال بأحلام رغم أنف مراد •

ونادى صوت نسوى رقيق :

— جلال • جلال ••

والتفت جلال خلفه ، ثم خفف من خطوه ، ولاحظت أحلام
تمله ، فسارت فى طريقها ، ومدت يدها وأمسكت مرادا من
يده :

ونظرت خلفها فألفت جلالا يحدث شابة جذابة ويبتسم ،
فاربد وجهها ، وتحركت عقارب غيرتها ، ولم تنطق صبرا ،
فجذبت مراد من يده ، ووسعت خطاها وراحت تشق طريقها
بين الكتل البشرية المتدفقة .

واشرابه جلال بعنقه فلم يجد لأحلام أثرا ، فجعل يتلفت
ثم انطلق يجد فى أثرها ، ولكن أفواج الموج البشرى المتدفق
على الجسر كان يعوق تقدمه .

ووصل أخيرا الى محطة انسيارات ، ولح أحلاما ومرادا
فى سيارة بدأت تتحرك فهتف :

— مراد .. مراد ..

وأشاحت أحلام بوجهها عنه فى غضب ، فضرب كفه بقبضة
يده فى حنق ، وعقد العزم على أن يتركها الليلة لغيرتها تؤرقها
وتتهش صدرها .

وعادت أحلام الى الدار . واتجهت الى غرفتها حائقة ،
وغطنت أمها الى غضبها ، فخفضت إليها وقالت لها :

— رجعتى لوحدك ليه ؟ أمال فىن جلال ؟

- سابنى ووقف يكلم واحده ، فته وجيت •
- وقف يكلم واحده ، ازاي ده ؟
- أهو ده اللى حصل •
- ما تزعلش نفسك ، بس لما ييجى •
- وبدأت أحلام تخلع ثيابها وتلقيها فى غضب ، وغادرت أمها
الغرفة وذهبت الى حيث كان زوجها وقالت له :
- شفت جلال عمل ايه !
- ونحى الرجل الصحيفة التى كان يطالعها وقال :
- عمل ايه ؟
- ساب أحلام ووقف يكلم واحده •
- وعملت ايه أحلام ؟
- فانتبه وجت •
- غلطانه •
- غلطانه ازاي ؟ أمال كنت عايزها تعمل ايه ؟ !
- تستنى لما تشوف مين ده ، مش يمكن قرييته ، واحده
من معارفهم ؟
- بس لما ييجى •
- حتعملى له ايه ؟
- ج افرجه •

— ما لكيش دعوه .. سيبيهم هم يصفوا مشاكلهم من غير
ما حد يتحشر بينهم ، بكره ح بيان لك انها حكاية هايفه .
— هايفه ! بكره ح تشوف .
وتحركت لتغادر الغرفة ، ثم وقفت قليلا ساهمة ، خطرت
لها فكرة ، فأغذت السير الى حيث علق زوجها ثيابه ، وراحت
تعبث فى جيوبه ، وتقلب فى أوراقه وهى تغتمم :
— مين عارف . • يمكن • ! الرجاله كلهم خاينين وعينهم
فارغه ، وما لهمش أمان •

الفصل الثاني عشر

أطفئت الأنوار . وساد الظلام ، ونام حسين وزوجته وأولاده ، وبقيت أحلام مسهدذ ، لا يمشى الوسن الى جفنيها ، ولا يغادر القلق صدرها ، ولا يهدأ لها بال ، ولا يستقر لها قرار . كانت تتقلب في فراشها تقبلها على جمر ، ما أن يمس جنبها الا الأيمن الفراش حتى تدور وتستلقي على ظهرها ، ثم تكمل دورتها لتنام على جانبها الأيسر ، وسرعان ما تعود سيرتها الأولى .

وكانت تحكم الغطاء عليها ، وتغطي وجهها ، وما تلبث أن تدفعه بيدها ، ثم ترفسه بقدمها ، ثم تعود وتجذبه بيدها وتسده على جسمها القلق المحموم .

وكانت نبيلة ترقبها في صمت ، وخطر لها أكثر من مرة أن تحادثها ! تنتشلها من ذلك القلق المضني ، ولكنها كانت تترثى لعلها تهجم وتروح في سبات ، وظلت أحلام في عذاب ، فلم تطق صبرا ، وقالت وقد رفعت رأسها عن الوسادة حورمت ببصرها اليها :

- — معذبه نفسه كده ليه ، الموضوع بسيط خالص .
- ودفنت أحلام وجهها فى الوسادة ، وشهقت ، فمدت نبيلة يدها وأضاعت الأباжورة ، ثم اتجهت الى سرير أحلام وجالست على حافته ، وقالت :
- قولى لى : بتفكرى فى ايه ؟ • •
- فقال أحلام وهى تبكى :
- يسيينى ازاي وانا ماشيه معاه ويكلم واحده تانيه ؟
- وفيها ايه يعنى ؟ ما استنتيش ليه لما يرجع ويشرح لك كل حاجه : غرتى قوام خلتي لبتوع زمان ايه !
- ومالت نحوها ، قالت وهى تمرر يدها على ظهرها :
- عايزه الحق • انتى غلطانه •
- وأجهشت أحلام بالبكاء ، فقالت لها نبيلة :
- بتعيطر ليه دلوقت ؟
- عشان عارفه ان أنا غلطانه •
- خلاص ، مدام معترفه انك غلطانه ، كل حاجه ح تبقى سهل ، لما ح بيحى بكره ح تصلح كل حاجه •
- والتفتت أحلام اليها وقالت فى لهفة :
- تفكرى انه ح بيحى بكره ؟
- فقالت لها نبيلة وهى تهز رأسها :

- - بقي عشان كده بتعيطى ! اطمنى • ح ييجى • أمال
ح يروح فين ؟

وجلست أحلام فى فراشها وقالت :

- ان جه ح اعتذر له ، ح اقله انى غلطانه ، ومش ح اعمل
كده تانى •

قالت لها نبيلة :

- اياكى تعتذرى له ، مثلى عليه • اعملى انك زعلانه لغاية
ما يعتذر لك عشان ما تبقيش انت اللى غلطانه •

وابتسمت أحلام على الرغم من الدموع المترققة فى
مآقيها وقالت وهى تدفع نبيلة فى صدرها فى حنان :

- اتعلمتى الحاجات دى فين ؟

فقالت نبيلة فى غرور :

- الحاجات دى ما تتلعمش • نتولد بيها • خليكى ثقيله •
ونامت أحلام وسحبت نبيلة عليها الغطاء ، ثم أطفأت نور
الأباجورة ، واندست فى فراشها ، واستغرقت فى النوم •

وأصبح الصباح ، ودبت الحياة فى الشقة ، وراح الأولاد
يهزلون وبصيحون قبل أن يغادروا الدار الى المدرسة ،
وحدثت نبيلة حقيبتها وأسندتها على عجزها ، وقبل أن تتصرف
ألفت أحلام تملأ القلقل وهى ساهمة ، فدنت منها وقالت :

— والله ح ييجى • بس مش ح ييجى الصبح • ح ييجى
لما يخلص شغله •

وغادرت المطبخ وهى تصيح :

— ماما •• ح أتأخر العصر ، عندنا بروفه لحفلة التمثيل •
وقالت الأم وهى تقوم بلم ما بعثره الأولاد قبل خروجهم
من ملابس وأوان وفتات خبز وقصاصات ورق :

— والله ما انا عارغه التمثيل ده لزمته ايه !

ولم تحفل نبيلة باعتراضها ، وانطلقت كالطيف على أطراف
أصابع قدميها ، ودوى فى أذنيها صوت بوق السيارة ، فقالت
وهى تجرى :

— أنا نازله • العربيه جت •

وصفق الباب خلفها •

وخلت الشقة من الأب والأولاد ، ولم يبق بها الا الأم
وأحلام وهالة ، أما عاطف فقد كان فى طوافه اليومى على شقق
الجيران •

وانتهت أحلام من عملها انيومى الرتيب ، وبدأت فى كى
ثوب من ثيابها ، واقتربت أمها منها وهى تحمل هالة وقالت
لها :

— لما ييجى جلال أنا اللي ح اخش له •

فقالت أحلام ، وقد رفعت المكواة عن الثوب :

— ليه ؟

— مش ح تعرفى تكلميه ، أنا اللي ح اعرف أكلمه •
وخشيت أحلام أن تجرح أمها شعوره ، أو تسيء اليه من
حيث لا تدري ، وتسبب لها المتاعب فقالت لها :

— أرجوكى يا ماما تسييى الموضوع ده ليه •
فقالت لها أمها. فى تهديد :

— بقى اسمعى • لو قرش ملحتك مره ، ح يقرشها على
طول • ح تبقى هفيه •
— ما تخافيش •

وراح الوقت يمر وييدا وييدا ، وعاد الأولاد من
مدارسهم ، وجاء الزوج • ومالت الشمس للمغرب : ولم يأت
الحبيب ، فطفقت أحلام تغدو وتروح فى الشقة فى قلق شديد ،
كانت كلما سمعت صوت وقوف سيارة تهرع الى النافذة تنتظر ،
وهى تأمل أن يكون جلال جاء فى رفقة شفيق ، ولكن سرعان
ما يتبدد الأمل ، ويستبد بها يأس مرير •

ودق جرس الباب الخارجى ، فخفق قلبها فى شدة ، ولفها
اضطراب ، وراحت دماؤها تتدفق حارة فى عروقها ، وخفت
الى الباب ووقفت لحظة تصلح هندامها وشعرها ، ثم مدت يدها
تفتح الباب فى ثؤدة ، كانت أشبه بمقامر يفحص ورقه فى
حرص ، خشية أن يفجع فيه •

ولجت جلالا ، فاشتد وجيب قلبها ، وربما اضطرابها ،
واحمرت وجنتاها ، ولكنها فتحت الباب على مصراعه وقالت
فى فرح :

— أهلا وسهلا .. انتفضل .

وذهب الى غرفة الاستقبال ، وقال جلال قبل أن يجلس :
— تقدرى تقولى لى مشيتى امبارح ليه ؟

فقال فى اضطراب :

— يعنى ما انتش عارف ؟

— لأ مش عارف .

— لما لقيتك سبتتى ومشيت اضطريت أمشى .

— سبتك ومشيت ؟ !

— بصيت ما لقيتكش جنبى . ما قلتليش رايح فين ..

— هو انتى استنتيتنى علشان أكلك .

— كنت أقف فين والناس عماله ترق فى بعضها ؟

— طب ولما ندهت عليكو وانتو فى الأتوبيس وديتى وشك

الناحية التانيه ليه ؟ أنا مش فاهم إيه اللى زعلك .

— عايزنى أفرح لما تسيبنى وتكلم واحده تانيه ؟

— ما تقوايش سبتك ، واحنا ماشيين واحده كانت زميلتى

فى الجامعه شافتنا ، ندهت عنى يا دوب رحت لها ، والتفت

علشان أقدمها لك ، بصيت ما لفتكيش .

ودنا منها وقال لها :

— مشيتي ليه ؟ غرتي !

فقاتت وهي تشيح بوجهها عنه فى دلال :

— اللى بيحب لازم يغير •

ثم عادت ونظرت اليه فى اغراء ، وتعطلت لغة الكلام
وتخاطبت العيون ، فلف ذراعه حولها وقبلها قبلة طويلة حارة •
وأقبلت سوسن ورأتها وهما يتمانقان ، فصاحت وهي تهتم
بالعدو :

— ماما .. ماما .. الحقى •

وانفصلا فى فزع ، وفى مثل ملح البصر جرى جلال خلفها
حتى لحق بها ، فأمسكها ووضع يده فى جيبه وأخرج قطعة
نقود ، دسها فى راحتها وقال لها :

— خدى اشترى حاجه •

وفتح الباب ودفعها منه ، وضربها على مؤخرتها ، ثم أغلق
الباب وعاد الى غرفة الاستقبال وهو يزفر فى راحة •

وجاءت الأم تسعى ، وخلفها زوجها ، ودخلا غرفة
الاستقبال فألفيا أحلاما وجلالا يتناجيان فى ود ، فصافحا
جلالا وجلسا ، وراح الزوج ينظر الى زوجه وعلى شفثيه
بسمة ، وفى عينيه كلام ، لو ترجم لكان : « مش قلت لك •

ما تتحشيش بينهم ، سبيهم يصفوا مشاكلهم لوحدهم •
شفتى ! جالك كلامى ! » •

وراح جرس الباب يرن رنيناً متصلاً ، فقالت الأم :
— نفسى سوسن ما تحطش ايدها ع الجرس على طول ،
هى فاكرك البوابين واقفين ورا الباب ؟
وسمع صوت فتح الباب : واندفاع سوسن وهرجها ،
وما أن وصلت الى الغرفة حتى صاحبت :
— ماما •• ماما الحقى •

واتسعت عينا جلال رعبا . وأطرقت أحلام خجلا ، ثم
قامت لتغادر الغرفة قبل أن تشي سوسن بها ، واستشعرت
عرقا باردا يتفصد من وجهها ، وخيل اليها أن لونها قد غاض .
وقالت الأم :

— فيه ايه ؟

فقالت سوسن :

— عاطف شحت برتقاله من الجيران •

وارتمت أحلام فى مقعدها ، وزفر جلال فى راحة ، وهو
يوسع خناق الكرافاتة • وأقبل عاطف وهو يحمل البرتقالة •
وقال فى صوت ثابت ، لا أثر للخوف عليه :

— أنا ما شحتش •

وقال له أبوه :

منی قاتل کی مہنگین ریس بدھہ ••



أمال مين ادمالك ؟

— هم ما ادوواليش كده .

— آمال ادومالك ليه ؟

— عشان بجبت لهم سجاير .

فابتسم جلال وقال :

— ما ييقاش شحتها ، خدنا أجرة المشوار .

وجلست سوسن ، وراحت تتقل بصرها بين جلال وأحلام ،
ثم تضحك وتخفي وجهها في راحتها ، وخشيت أحلام أن
تسألها أمها عن سبب ضحكها . فتبوح بالسر الذي تشتئى أن
يكشف ستره ، فأشارت اليها بيدها أن تأتي ، فذهبت اليها ،
فأسرت أحلام في أذنها أن في درج ملابسها قطعة شيكولاتة ،
عليها أن تأخذها على ألا تعود حتى ينصرف جلال .

ودوى صوت كلاكس سيارة ، فقال جلال :

— ده شفيق ايه الى جابه ؟

فقال حسين . وهو ينهض :

— خليه يتفضل .

ولم يتحرك جلال ، وأسرع حسين الى النافذة المطلة على
الطريق ، وأطل منها وقال :

— اتفضل .

وقال شفيق وهو في السيارة .:

— جلال موجود ؟

— أيوه • اتفضل •

وصعد شفيق ، وقال لجلال وهو يصفح الموجودين :

— رحت لك البيت مالقتكس ، سألتهم رحت على فين ،
قالوا ما يعرفوش . قلت لروحي ضروري ح ييجى على هنا •
ح يروح فين ؟ الرجل تدب مطرح ما تحب •

وجلس شفيق وضحك حسبن وقال :

— انت غاوى أمثال انت رآخر ؟

فقال شفيق :

— ده المثل الوحيد اللي اعرفه •

وراح شفيق يقلب عينيه فى المكان ، ويشرب بعنقه ويمد
بصره الى الردهة ، كان يبحث عن نبيلة ، وهم أكثر من مرة
أن يسأل عنها ، ولكنه كان يكبح جماح نفسه •

ولاحت نبيلة فى الطريق مقبلة ، وقد وضعت حقيبة كتبها
على عجزها ، ولحت سيارة شفيق من بعيد ، فجملت تتفرس
فيها ، حتى اذا ما تيقنت منها وسعت من خطوها ، ولو طاولت
نفسها لراحت تعدو فى الطريق •

وبلغت الدار ، فألقت على السيارة نظرة وداد ، ثم دلفت
الى مدخل السلم ، وأخذت تصعد فى الدرج قفزا ، ووجدت

باب الشقة مفتوحا فانسابت منه الى غرفة الاستقبال .
وتريثت قليلا تلتقط أنفاسها ، وأخرجت من حقيبتها مشطا
وراحت تسرح به شعرها ، ثم تقدمت وقالت :

— السلام عليكم .

فقال جلال وشفيق :

— وعليكم السلام .

وتقدمت تصافحهما ، صافحت جلال فى عجل ، وبقيت يدها
فى يد شفيق برهة ، وقالت الأم :

— جيتى بايه ، يعنى ما سمعناش صوت عربية المدرسه ؟

— جيت فى الأتوبيس ، مش قلت لك الصبح عندنا

بروفه لحفلة التمثيل ؟

— لو قلتنى انك ح تيجى فى الأتوبيس كنا بعطنا لك

سامى .

— وفيها ايه يا ماما لما آجى لوحدى فى الأتوبيس ؟

— يا بنتى ما بقتيش صغيره .

ووجد شفيق الفرصة سانحة ليشارك فى الحديث ، فقال :

— أمال لما ح تروح الجامعه ح تروح فى ايه ؟

فقال الأم فى استنكار :

— الجامعه ! كلها السنه دى وتقع فى البيت .

فقال شفيق فى ارتياح :

— أحسن •

فقالت نبيلة :

— أنا لازم اروح الجامعه ، وابقى دكتوراه • ما تتكلم
يا بابا •

— ناخذ رأى الموجودين • ايه رأيك يا جلال ؟

فقال جلال وهو ينظر الى أحلام :

— أنا رأيى قلته عملى •

وابتسمت أحلام ، وسرت الأم ، كانت تحسب أن الأمر
لا يخرج عن معركة بينها وبين ابنتها ، ينبغى أن تفوز فيها
تحفظ كرامتها •

وقال الأب :

— وانت يا شفيق رأيك ايه ؟

— أفضل فى البيت واحدء عندها حلوه ، اتعلمت كفايه :
عن دكتوراه عندها هضعضه ونضاره تخن كده •

وبالغ فى سمك النظارة عندما أشار بأصبعيه ، حتى أن
نبيلة ابتسمت ، على الرغم من أن الرد لم يكن فى صفها :
وقالت :

— ضرورى كل دكتوراه تكون لابسه نضاره تخن كده !

وأقبل سلمى وهو يحمل الكلب على ذراعه ، ووقف بعيدا
يصفى الى الحديث الدائر ، وقال شفيق :

— أن ما كانتش نضارتها تخن كده بيكون وشها كرمش ،
شوفى بتتعد كام سنه فى الكليه .

وقال جلال :

— من رأى يعملوا كشف هيئه على البنات اللى تروح
الجامعه ، وما يسمحوش إلا بدخول الوحشين بس ! •

فقال سامى لنبيلة :

— خلاص • ضمننتى انك تخشى الجامعه •

والتفتت نبيلة اليه فى غضب وقالت :

— ايش حشر العيال فى الكلام ده ؟

فقالت الأم فى زجر :

— وبعدين معاكم • لازم تتناقروا • روحى يا نبيلة غيرى

هدومك وتعالى •

وغادرت نبيلة الغرفة وهى تنتظر الى سامى شذرا ،
وانطلقت الى غرفتها ، وراحت تخلع ثيابها ، وترتدى ثوبا
أخاذا ، وقبل أن تكمل زينتها تذكرت شيئا ، فأسرعت الى غرفة
الاستقبال وشعرها منفوش ، وقالت :

— بابا ، حفلة التمثيل بعد بكره ، ضرورى تحضرها •

فقال الأب :

- يا ريت ، مش فاضى ورايا شغل •
- فقالت نبيلة فى عتاب :
- هو كل سنة ما يحلاش الشغل الا يوم حفلة التمثيل ؟
- عندى لجنة •
- فالتفتت الى أمها وقالت : وانت يا ماما وراكى ايه ؟
- ولا حاجه •
- فقالت نبيلة فى فرح : خلاص • ح تيجى انت وأحلام
- وجلال •
- ثم التفتت الى شفيق وقالت :
- وانت •
- فقال شفيق :
- حاضر •
- الحفله ح تبتدى الساعة أربعه •
- وقال شفيق وهو يلتفت الى الأم :
- أفوت عليكو أنا وجلال الساعة تلاته ونص •
- فقالت الأم :
- لأ تيجو تتعدوا معانا وننزل سوا •
- فقال جلال :
- معلى • اعفونا من حكاية الغدا دى •
- فقال شفيق :

— لا • ح نيجى نتعدى بس بشرط •

فقالت الأم :

— آيه هو ؟

فقال شفيق :

— انكم تيجوا كلکم معايا ألعزبه يوم الجمعة ، نقضى اليوم

كله هناك •

فقال الأب فى استنكار :

— نيجى کلنا ؟؟ ازای ؟ •

— المسافه قريبة ، ح افوت عليكم الساعه سبعة الصبح

وآخذکم فى العربيه •

فقال الأب فى سخرية :

— يا بنى اعقل ، مالك ومال الشبكه دى ؟

فقال شفيق وهو يبتسم :

— أنا وانا بكامل عقلی ، باعزکم يوم الجمعة ومدمم

على العزومه دى •

فقالت الأم وهى تهز كتفها :

— آيه • ذنبك على جنبك •

وقال الأب :

— على نفسها جنت براقش •

الفصل الثالث عشر

شرعت الأم في دس قدمها في الجورب النايلون ، وراحت
تعالجه في حرص شديد : كأنما نسج من خيوط العنكبوت .
ولما تم لها لبسه ، انتصبت واقفة ، ودارت بعجزها ونظرت
لتطمئن الى استقامة خط الجورب الخلفي ، واذا « بسوزى »
يقفز من فوق السرير ، ويهرع اليها ويشب على ساقها فتتشب
أظافره في الجورب وتمزقه ، فدفعته بقدمها في غيظ وهي
تقول :

- كنا ناقصينك أنت راخر .. يا سامى .. ، يا مراد ..
- تعالوا خدوا الكلب ده من هنا .
- وأقبل سامى ، وقال :
- فيه ايه يا ماما ؟
- خد الكلب ده اللي من يوم ما جه ما شفنا يوم راحه .
- فقال سامى وهو ينحنى ليحمله :
- عمل ايه بس ؟ دا راجل طيب .
- فقالت وهي تخلع الجورب وتتنظر فيه :

— قطع الشراب الذى لسه تمنه ما بردش ، وامبارح طلع
قطن الكنبه ، وأول امبارح نزل الشارع مع عاطف جه وسخ
البياضات كلها ، وما زاد وعاد الا نومته على السرير على طول ،
هى بقت شقتنا ، دى بقت شقة أبوه •

وجاء حسين وقال :

— أبوه مين بس ؟ هو فيه أبو حد هنا غيرى ، ياللا ، انتى
لسه ما لبستيش ؟ الناس قلقوا •

فقالته وهى تشير فى غيظ الى الكلب :

— ما هو السبب ، هى اللى عطلتنى •

— دا انتى بتلبسى من بعد الغدا ، الساعة بقت ثلاثه
ونص ، فاضل نص ساعه ع الحفله •
— أنا خلصت أهو •

والتفتت اليه وقالت :

— انت ح تنزل امتى ؟

— الساعة سته •

— طب ان صحيت هاله لبنها عندك فى النمليه ، ولما تيجى

تخرج سلمها لسامى •

وتلفتت وقالت :

— آمال فين مراد ؟

فقال سامى :

— بيذاكر •

ونادت الأم :

— مراد .. مراد •

وجاء مراد وفي يده كتاب انجليزى وفي خده وشفتيه أثر
حبر ، فقالت له :

— أنا مش فاهمه ، انت بتشرب الحبر ؟ ايه الحبر دا اللي
فى بقبك ؟ •

فقال وهو يمسح فمه بيده :

— كنت باحل الحساب ، وأنا بافكر نسيت وخطيت سن
القلم فى بقى •

واقترب خطوة وقال :

— تعرفى يا ماما أنا صعبان على قوى الأولاد الانجليز
الصغيرين •
— ليه ؟

فقال وهو يرفع الكتاب الانجليزى فى يده :

— ازاي ينطقوا الكلام الانجليزى الصعب ده ؟ !
فقالت له أمه :

— ما يصعبش عليك غالى •

وقال له أبوه :

— والله انت اللي صعبان على •

ثم التفت الى الباب وقال :

— واللى مستنيين بره صعبانين على روخرين •

فقالت الأم :

— أنا خلاص لبست أهه •• خلى جلال وشفيق وأحلام
يسبقونى ع العرييه ، وأنا نازله على طول • وانت يا سامى خد
أخوك وع المطبخ اغسلوا الأطباق ، وشيلوهم محلهم •

فقال سامى :

— أمال ح نذاكر امتى ؟ ما تجييووا لكم خدامه تغسل
الأطباق وتكس وتمسح •

فقالت الأم :

— ان جينا بنت ح ندفع لها أجرتها م الفلوس اللى
بتروحوا بيها السينما ، واللى بتركبوا بيها عجل •

فقال مراد وهو يضع كتاب الانجليزى على التواليت :

— لا • دا احنا نغسل الأطباق قوى • ونلحسها بلسانة

كمان •

وخرج سامى ومراد من الغرفة ، وسمع صوت مغادرة
أحلام وجلال وشفيق الشقة ، والتقى الوالد ومراد وسامى فى
المطبخ ، واذا بالأوانى والصحاف والشوك والسكاكين
والأكواب مكدسة فى انتظار من يتفضل بغسلها •

ووضع سامى الكلب على الأرض ، فأسرع يلحق الصحاف ،

وارتدى سامى « فوطة » المطبخ ، وشمر عن ساعده . بينما راح
مراد يحمل الأوانى على صدره ، دون أن يحفل بثيابه •
وجاء عاطف يصيح ، وفى يده غصن شجرة ، يضرب بها
الأرض :

- جلال وأحلام رايعين غين ؟ أروح معاهم •
- خرجت الأم من غرفتها بعد أن اطمأنت الى أناقتها ،
والتقت بعاطف فى الردهة ، وم ان وقع نظره عليها حتى قال •
- وانتى خارجه معاهم ؟ وأنا ح اروح معاكم •
- فقالته الأم وهى تبعد يديه عن ثوبها :
- خليك هنا ، وح اجيب لك حاجه حلوه •
- ح تجيبى لى ابيه ؟
- ح اجيب لك عروسه •
- لا • أنا مش عايز عروسه ، انا عايز عريس زى أحلام •
- فقالته له وهى تبتسم :
- انت راجل • تجيى لك عروسه •
- لا • أنا عايز عريس ، عريس يركبنى أتومبيل •
- طيب • بس اسكت ••
- وهمت بالخروج ، واذا به يعترض طريقها وقد بسط ذراعيه
يحول بينها وبين السير ، وغصن الشجرة يسد الطريق :
- مش ح تنزلى الا لما تدينى قرش قبله •

وفتحت حقيبة يدها ، وأخرجت منها قرشا ودفعت به اليه وانطلقت في سبيلها ، وهي تنتظر الى المطبخ وترى زوجها وسامى ومراد منهمكين في غسل الأواني والأدوات •

وهبطت الى الطريق ، وتقدمت الى السيارة ، فاذا بجلال قد جلس خلف عجلة القيادة وأحلام الى جواره ، ووقف شفيق عند الباب وقد فتحه ينتظر ركوبها ، فصعدت الى المقعد الخلفى ، وصعد شفيق في أثرها ، ثم انطلقت السيارة بهم • وبلغوا المدرسة ، وراحوا يصعدون في درج دائرى ، ورأت الطالبات أحلام فخف اليها بعضهن يصافحنها ، وان كانت عيونهن تتفكرس في جلال وشفيق •

ودلفوا الى قاعة واسعة ، أقيم المسرح في صدرها ، وصفت فيها كراسى خيزران ، فاتجهوا الى الصفوف الأمامية ، والأنظار تتبعهم ، كانت الطالبات في شوق الى معرفة خطيب أحلام ، فلما جلست أحلام والى جوارها جلال ، سلطت الأنظار عليه تفحصه من قمة رأسه الى أخمص القدم •

وراحت مدرستان تديمان انظر اليهم ، ومالت احدهما على الأخرى وقالت :

— الثانى أحلى من خطيبها •

— والنبي ياختى راخر شريات • ما وحش الاقلته •

ونهضت ، وراحت تصلح هندامها ، فقالت لها زميلتها :

- على فدين ؟
- رايحه أسلم على أحلام : واتفرج •
- فنهضت الثانية وقالت :
- خدينى ياختى مملكى •
- وانطلقتا الى أحلام ، فلما رأتهما ارتبكت ، وقامت تحية لهما ، وقد توردت وجنتاها بلون النور •
- وقالت الأولى :
- ازيك يا أحلام ؟
- الله يسلمك يا ابله منيره •
- وقالت الثانية :
- سنه طويله ما حدش يشوفك • يخونك العيش والملح •
- والله ما باخرجش يا ابله وداد •
- وسكن اضطرابها ، فالتفتت الى أمها وقالت تقدمها اليهما :
- ماما •
- أهلا وسهلا •
- وقالت وداد متعلقة :
- والله ما افكرنا هاش ماما ، افكرناها أخذك الكبيره !
- وأرضى ذلك الملق غرور الأم ، فقالت :
- الناس كلها بتفتكر كده •
- وقالت أحلام وهى تشير الى جلال وشفيق :

— جلال والأستاذ شفيق •
 رمدت المدرستان أيديهما ليتمتعا بالمصافحة ، وعيونهما
 تتجول في وجهي !شابين ، وقالتا :
 — انشرفنا •• فرسه سعيدة خالص •
 وقالت منيرة :
 — أحلام دى •• دى •• دى أختنا •
 وقالت أحلام وهي تشير الى مقعدين خاليين الى جوارهما :
 — ما تفضلوا جنبنا هنا •
 — متشكرين ، انت عارغه ما نقدرش نقعد النهارده في
 حته واحده ، أورفوار مؤقتا •
 وانصرفتا وما ان ابتعدتا عنهم ، حتى قالت منيرة في
 مرارة :
 — بنت امبارح بقت عروسه النهارده ، آمال احنا مالنا •
 فقالت وداد وهي تمصص بشفتيها :
 — قسم •
 ثم رفعت بصرها الى السقف وقالت في ابتهاج :
 — يا رب ارزقنا بقى بعدلنا •
 فقالت منيرة :
 — ان شاء الله يا وداد يا اختى • من بقلك لباب السما •
 وراح جلال يتفرس في المسرح ، فالفاه مكونا من موائد

المطعم ، وقد شددت جوانبه بالخيش ، أما الستارة فكانت من مفارش سرر شبك بعضها الى بعض بدبابيس ابرة ، والتفت الى أحلام وقالت :

— أظن انتو ساهمتوا فى بنا المسرح ده •

فقالت أحلام وهى تبتسم وتشير بأصبعها الى الستارة :

— طبعا ! مفرش السرير التالت ده بتاعنا •

وقالت لها أمها همسا :

— نفسى يا أحلام ما تشوريش بصباغك وانتى بتتكلمى •

فقالت لها أحلام :

— يا ماما انتى نفسك فى حاجات كثير : مش ممكن تتعمل •

وظهر الميكروفون أمام الستارة ، فقال شفيق فى تأوه :

— آه • ح نشرب أكبر مقلب ، الخطبة ، نفبى يطلع قانون

يحرم الخطابة فى الحفلات •

فقالت أحلام وهى ترنو الى جلال فى حب :

— كلهم نفسهم مفتوحة النهارده ، عمالين يتمنوا ، ماما

تالت نفسى ، وشفيق قال نفسى ، وانت ما نفسكش فى حاجة ؟

فقال وهو ينظر اليها فى حب :

— نفسى فى حاجات كثير قوى •

— نفسك فى ايه ؟ قول •

فقال وهو يرمقها بطرف عينه فى خبث :

— ما اقولش ، وان كنت عارف انك عارفه اللي نفسى فيه •
وأسبلت جفنيها دلالا ، ورفعت على شفتيها بسمة عذبة ،
واقترب رأسه من رأسها ، وإذا بصوت الناظرة يرن فى جنبات
القاعة ، فيفيقان من حلم لحظتهما •

وراحت الناظرة ترحب بالمدعوين ، فى أسلوب متحذلق -
فمال شفيق على جلال وقال :

— أراهن ان اللي كتب الخطبه دى مدرس لغه عرب •
عتيق •

فقال له جلال :

— أمال ح يكون مدرس انجليزى !

— مش قصدى • قصدى انه مدرس يهتم باللفظ بس ،
بيفضل اللفظ 'لرنان' ولو شوه المعنى •

وقالت أحلام :

— اللي بيكتب الخطب كلها أبو الأسود الدؤلى •

— يدوب كده ، باين على انخطبه انها من أيام سيدنا على
وضحكت أحلام وقالت :

— مش أمو الأسود بتاع أيام سيدنا على ، دا الشيخ اللي
قاعد هناك ده ، البنات مسمينه كده •

ونظر جلال وشفيق الى حيث أشارت أحلام ، فاذا بشيخ

معمم يصغى الى الناظرة فى انتباه ، وهو يهز رأسه أعجابا ،
كأنما يصغى الى مطربة ، فقال شفيق فى حماسة :

— مؤكّد هو الى كاتب الخطبه دى ، لأن كل كلمه فيها
لأبسه عمه وكاكولا •

— وانتهت الناظره من خطبتها ، فصفق شفيق فى شدة ،
وقال له جلال :

— ايه الاعجاب ده ؟

— ده اعجاب بأنها خلصت الخطبه •

وفتحت الستارة ، وإذا بطالبة فى ملابس « بلياتشو »
فخرج الفتيات بالضحك • فراحت ترقص حاجبيها ، ثم قامت
ببعض ألعاب بهلوانية . وقفزت الى أعلى ، فإذا بها ترتفع حتى
وصلت الى سقف الغرفة ، كان فى وسطها حبل متصل ببكرة
حديد قرب السقف ، فلما قفزت جذب بعض زميلاتها المختفيات
خلف المسرح طرف الحبل الآخر •

وبقيت متعاقبة فى الهواء ، تحرك ساقيهما وذراعيهما فى
حركات مضحكة ، بين ضجيج المدعويين وضحكهم •

وأغلقت الستارة ، ودوى التصفيق ، ففتحت الستارة
ثانيا ، وأرعى الفتيات المختفيات خلف المسرح الحبل قليلا ، ثم
جذبته ثانية فبدت الفتاة كأنها تتحنى للمصفيقين ردا على
تحيتهم ثم تتصب قائمة •

وسرى فى القاعة مهمة ، بعد انتهاء ذلك المشهد ، وارتفعت
الضوضاء ، واذا بدقات متتالفة على خشبة المسرح تعلن بدء
المشهد التالى ، وفتحت الستارة وانبعثت من الفونوغراف
موسيقى راقصة ، وظهرت على المسرح فتيات فى ثياب قصيرة
بيضاء فبدت سيقانهن وأفخاذهن ، ورجن يرقصن على الأنغام ،
وحملت الأم فيهن وهى يتمايلن ، كانت تبحث بعيونها عن
نبيلة وهى مبهورة النفس ، وفى وجهها قلق وضيق .

ودخلت نبيلة المسرح وحدها تسير على أطراف أصابع
قدميها لتتقدم المجموعة ، كانت فى ثوب وردى قصير غاية
القصر ، وكان صدرها عاريا ، ولا يستتر ساقها وغفذيها
الاجورب أبيض قصير ، وطرف الثوب الذى كان على شكل
دائرة .

وشهقت أمها فى صوت خافت :

— يادى الفضيحة !

ولم يلتفت أحد الى اعتراضها ، كان شفيق يرمقها فى
اعجاب ، وقد غمر فاه ، وراح جلال يرقب الرقصة فى شغف ،
أما أحلام فقد راحت تهز رأسها فى نشوة .

وتحركت الأم فى مقعدها فى ضيق ، وقالت :

— ليه نبيله تعمل كده ؟

فقال شفيق فى نبرات حاملة :

— مدهشة •

وتألق ضوء خاطف ، وقالت الأم فى فرع :
— صورها ! تبقى ناييه لو نشر صورتها فى مجله وهى
بالشكل ده ، مش ح تتجوز أبدا ، قوم يا جلال هات الصورة
منه •• دى فضيحة •• ح يضيع مستقبل البنت ، مش ح تتجوز
أبدا •

فقال شفيق ، وهو يحلق فى نبيلة ويتبعها بعينه :
— اطمنى ما تخافيش ، أنا هنا •
وحسبت الأم أن شفيقا يعدها بأنه سيستولى على الصورة
ويمنع نشرها ، فقالت له :
— ربنا يسترک •
وانتهت الرقصة ، وأقفلت الستارة ، وأقبلت المدرسات على
الأم يصافحنها وبهنئتها :

— مبروك •• يا سلام على نبيلة • كانت مدهشة •
وراحت الأم تحلق فيهن وهى فى حيرة من أمرها ، وجاءت
نبيلة بملابس الرقص ، والفتيات يرمقنها فى حسد ، ويقولن :
— ايه ده كله ؟ •

وابتسمت فى زهو • ولحقتها أمها فصاحت فيها :
— وجابه عريانه ؟ مش مكسوفه ؟ ياللا ع البيت ياللا •
وخف اليها شفيق وقال لها وهو يصافحها :

— مذهشه .. جنان •

فقالت الأم فى ضيق :

— صحيح جنان ، واللى يطاوعكوا يستاهل أكثر من كده •

والتفت شفيق الى الأم وقال لها :

— انت زعلانه ؟

— آمال عايزين أفرح ؟

— ايه اللى مزعلك •

— عاجبك كده ؟ عاجبك واقفتها عريانه ؟ !

والتفتت الى نبيلة وقالت فى عزم :

— نبيلة — روحى البسى هدومك وياللا ع البيت •

وانسحبت نبيلة ، وقالت أحلام لأمها :

— مش ح نقعد لآخر الحفلة ؟ !

فقالت الأم :

— ع البيت على طول .. با نيتى لو طلعت الصورة سى

الجرانين ح يتوقف حالها • • مش ح تتجوز أبدا • • مين اللى

يرضى يتجوز واحده عريانه بالشكل ده ؟

فقال شفيق وهو يبتسم :

— ما قلت لك ! طمنى انا هنا •

وفهم جلال وأحلام ما يرمى اليه فابتسما ، أما الأم فلم

تفهم قصده ، وقالت فى ضيق :

— ما قلت لى اطفنى قبل كده ، ولا جيت الصورة
ولا حاجه ، وأهو المصوراتى دابر يصور فى البنات ، أروح انا
أجيبها منه ؟

وتيقن شفيق أنها لم تفهم غرضه ، وأراد أن يرضيها
فقال لها :

— أنا رايع للمصوراتى أجيب الفيلم منه •
وذهب الى الرجل واتفق معه أن يبعث اليه بصورة نبيلة فى
حجم كبير ، والصورة السلبية ، وأعطاه عنوانه ودفع له القيمة
مقدما •

وأقبلت نبيلة بعد أن استبدلت ثيابها ، وما ان رأتها أمها
حتى قالت لها :

— ع البيت قدامى •
وسارت نبيلة وشفيق وأحلام وجلال وانطلقت الأم
خلفهم وهى تغنم :

— دا مجنون اللى يسيب بناته على حل شعرهم •• قال على
رأى المثل : « كنا فى جره وطلعنا بره » •

الفصل الرابع عشر

استيقظ الأولاد مبكرين . وراحوا يغدون ويروحون في
الردة مسرعين ، هذا يخلع ثيابه ليتردى ثياب الخروج ، وذلك
يمشيط شعره وهو يدور بعينيه في المكان ويقول : *

— أمال الجزمه فمين ؟

وذهبت نبيلة إلى الساعة ونظرت فيها ، ثم اتجهت إلى غرفة
أبويها وطرقت الباب في رفق وهي تقول :

— اصحوا بقي ما فيش وقت ، زمان شفيق جاي .

وقالت الأم من الداخل وهي راقدة في فراشها :

— افتحي وخدي هاله لبسيها .

وفتحت نبيلة واتجهت إلى سرير هالة وحملتها وقالت لها
مداعبة :

— تعالى يا ستي عشان تروحي العزبه ، ياللى عمرك

ما شفتي عزبه .

فقالت لها أمها :

— يعنى أنتى اللى شفتيها ؟

— طبعا شفتها •

— شفتيها فين بقى ؟ •

— فى السيئنا •

• غاديت نبيلة الغرفة وقال الزوج :

— يا لالا ما غبش وقت يا دوب تلبسى •

ونفضت ردى تنعدى • وتركت الشرفة • فالكنت أحلام قد
انتهت من عاطف • وبدأت فى تهشيد شعر سوسر • فقالت :

— ما غبش خروج قبل الشقه ما تتنصف • سامعين ؟

فقال مراد :

— أنا ح اكس الأوده المفروشه •

وقال سامى :

— وأنا ح امسح المطبخ •

وقالت الأم :

— وانتى يا نبياه املئ القل وحطى هدوم هاله فى شنطتها ،

وما تنسش تاخذى هدوم لعاطف ومراد •

فقالت نبيه وهى تبدل ثياب هالة :

— حاضر •

ودلفت الأم الى الحمام وهى مسرورة ، لم تسمع

- اعتراضا ، ولم تر تذمرا ، كانوا جميعا سامعين مطيعين •
 وذهب عاطف الى أبيه وهو يحمل كلبه ، وقال له :
 — يا بابا احنا رايعين العزبه ؟
 — أيوه •
 — وح ناخذ سوزى معانا العزبه ؟ •
 — أيوه •
 — الا يا بابا العزبه يعنى ايه ؟
 وحك الأب رأسه بخفوه ، وشرذ يفكر برهة ثم قال :
 — العزبه يعنى بيت كبير حواليه غيطان •
 — غيطان يعنى ايه يا بابا ؟
 — يعنى جنينه واسعه تزرع كوسه وكرنب وبرتقال وموز
 وكل الخضار والفاكهه اللى بتاكلها •
 — آه •
 فقال الأب وهو يعبث فى رأسه فى حنان :
 — عايز حاجه تانى ؟ !
 — أيوه • عايز قرش •
 ومد الأب يده فى جيب البنطلون وناولوه قرشسا ، فأطبق
 عاطف يده عليه وقال :
 — وسوزى عايز يضيع •
 ودفعه أبوه فى رفق يخرججه من الغرفة وهو يقول له :

— بره يا بكاش •

وخرج عاطف من الغرفة وهو يضحك ضحكة تتم عن مكر ودهاء ، وعادت الأم ، فقال لها حسين :

— شلهى شوبه ما فيش وقت •

— دنا ح البس قبلك •

ووقفت تفكر برهة ، ثم قالت له :

— قل لى ألبس ايه ؟

فقال وهو يطوح ذراعه فى حلق :

— أوه • انت لسه ما فكرتيش ح تلبس ايه ؟ يبقى مش

ح نخرج قبل الظهر • البسى أى حاجة ، انتى رايحه فىن يعنى !

وفتحت الصوان وراحت تقلب ثيابها لتختار منها

ما ترتديه ، وهى تقول :

— أنا عارفه أتوميل ايه ده اللى ح يساعنا كلنا ! • •

وأقبلت نبيلة تحمل هالة ، وجاءت أحلام وقد ناهبت

للخروج ونظرتا ثم قاتا معا :

— لسه ما لبستيش يا ماما !

— ناولونى الجزمه •

— حاضر •

— طلعى لى يا أحلام الشراب الأسود •

— حاضر •

— جهزتى شئطه هاله يا نبيله ؟

— 'جهزتها • فيه حاجه ثانيه ؟

وأثلجت تلك الطاعة صدر الأم ، فتمنت أن يصبح ذلك
حالهم على الدوام ، وشاعت أن تنعم بتلك الطاعة الطارئة
فقالته :

— روى يا نبيله شوفى مراد مسخ جزمته وخذ مناديل
نضيفه واللا عمل آيه ؟
— حاضر •

وتحركت نبيلة ، وذهبت أحلام وسوسن وعاطف الى
الشرفه ليرقبوا الطريق •
وقالت الأم :

— عيني بارده ع الأولاد النهارده ، آيه اللى جرى لهم ،
متشطين من بدرى وكل ما نقول لهم حاجه ، يقولوا :
حاضر •

— مش فاضيين للزعيق والخناق ، عايزين يخلصوا •
نفسهم يغمضوا ويفتحوا يلاقوا نفسهم فى العزبه •
— أنا عارفه ما كانش لك عزبه ليه • •
— الحمد لله على كده •

وسمع نداء كلاكس سيارة ، وأذا بأحلام وسوسن وعاطف

يقبلون مهرولين، بتصايحون ، وبلغت أحلام غرفة والديهما
فقالت :

— جلال جاب عرييه وشفيق بعرييته •

فقالت الأم في راحة :

— أيوه كده ، مش كنا ح نندس في عريية زى علية
السردين !

ووقف جميع الأولاد على باب الغرفة يحنون أهمهم على
الاسراع :

— ياللا يا ماما •• ياللا يا ماما •

— انزلوا انتو وأنا محصلاكو •

وقال الأب :

— سوسن ومراد ونبيلة وماما يركبوا مع شفيق • وأحلام
وسامى وعاطف وأنا نركب مع جلال •

وانطلق الأولاد يعدون في مرح ، وقال عاطف لسامى :

— خد سوزى •

— أنا مالى •

وتناولت أحلام يد عاطف ، وحملت الكلب وانطلقت وكل
خالجة فيها تنطق بالغبطة والسرور •

وخلت الشقة الا من الزوجين ، والتفتت زينب الى زوجها
وهي في طريقها للهبوط وقالت :

— يا راجل ايه تفرق بينا ، كنا ركبنا سوا فى عربيه
واحد •

— كل واحد منا ف عربيه عشان نأخذ بالناس العيال •
فقال فى دلال :

— قول انك زهقت منى •

فلف ذراعه حول ظهرها ، وضغط على كتفها البعيدة بيده
فى حب وقال :

— مش معقول •• تصدق • متياللى اننا متجوزين من كام
شهر بس •

— والأولاد دول كلهم •

— أنا عارف جم امتى ؟

وهبطا الى الطريق ، فحف اليهما جلال وشفيق وراهما
يصافحانهما ونظر الأب فالفى أحلاما قد جلست فى المقعد
الأمامى فى العربيه الأولى ، ونبيلة قد جلست فى المقعد الأمامى
فى عربيه شفيق ، وقد أعطت هالة لسوسن ، فقال :

— مراد يركب قدام جنب نبيله •

وقفز مراد فى مثل لمح البصر من المقعد الخلفى الى المقعد
الأمامى ، فافسحت له نبيلة مكانا الى جوارها ، وان كانت
ملاحها تتنطق بعدم رضاها •

وقال الأب لسنمى ، قبل أن يهيم بالصعود الى السيارة :

— سامى • عد اخوانك •

فراح سامى يعدمهم ثم قال :

— سته والكلب •

فقال الأب فى انكار :

— سته ازاي ! ييقوا ناقصين واحد عدهم تانى •

فراح سامى يعدمهم مرة أخرى وقال :

— برضه سته والكلب •

وأخذ الأب فى عدهم وهو يشير بأصبعه الى كل منهم ،
فلما أشار الى سامى فغر فاه ، فقد عرف خطأ نفسه ، وقال
الأب :

— مش عارف تعدهم ؟ ! سبعة والكلب •

— آه • أصلى نسييت أعد نفسى •

وقال الأب :

— مش ناسيين حاجه قبل ما نمشى ؟

وقال الجميع :

— مش ناسيين حاجه • يا يلا بقى •

وركب الجميع ، واطلقت السيارتان ، حتى اذا بلغتا محطة
بنزين عرجتا للترود بالوقود وأطلقت سوسن من نافذة السيارة
وقالت :

— بابا •• بابا • أنا ما خدتش قرش • خليه معاك
لما نوصل •

وقال عاطف وهو يعطى الكلب لأبيه :

— بابا • خد سوزى شويه •

— حاضر ••

والتفتت أحلام الى أبيها وقالت :

— بابا ما قتلتيش • لما فت ع الصايغ قال لك إيه ؟

— قال بعد بك • ح يسلمنا كل حاجه •

وقرعت « بابا » المتناثرة من السيارتين أذن عامل المحطة

عاقترب من النافذة الجالس عندها حسين وقال له :

— اسم النبى حارسهم كلهم ولادك ؟

فقال له حسين وهو يبتسم :

— أيوه • والباقي سبتهم فى البيت •

فقال له الرجل فى رثاء :

— الله يكون فى عونك • دنا عندي تلاته عقلى ح يشت •

فقال له حسين فى بساطة :

— تلاته يبقوا صعب ، لكن لما بيزيدوا عن كده أمرهم

•••

واستأنفت السيارتان رحلتهما ، كان شفيق فى المقدمة

وجلال خلفه ، وكان السكون مسيطرًا على سيارة جلال ، الأب

جالس يعبث فى شعر الكلب وعاطف واقف ينظر من زجاج
السيارة الخلفى بشاهد الحقول والترع والأشجار الممتدة
على جانبى الطريق وهو مأخوذ . كانت أول مرة يشاهد فيها ذلك
القضاء العريض . ووضعت أحلام رأسها على حافة المسند
وشردت ببصرها ، وهامت فى عالم من الأحلام : كانت السعادة
تغمرها ما دامت بالقرب من جلال .

وضاق سامى بذلك انصبت ، فقال :

— تعرف العربيه يا جلال ؟

— طبعا .

— طب ياللا مطلع من شفيق .

وزادت سرعة السيارة ، وانحرفت الى اليسار قليلا ،
واستمرت فى تقدمها حتى أصبحت فى محاذاة سيارة شفيق
فصاح سامى فى نشوة :

— هيه .

وشاركته أحلام فى صياحه ، ثم التفت عاطف وشاركهما فى
التهيل ونظر الأب قائل فى الأم ناحيته لم يكن يفصل بينهما
اللا لوجا زجاج السيارتين ، فأخرج لسانه لزوجه ، وانسابت
السيارة حتى أصبحت فى المقدمة .

وضايق ذلك ركاب السيارة الأخرى ، فقال مراد :

— ياللا نسبقهم .

وقالت نبيلة :

— ياللا يا شفيق •

ولم تعترض الأم ، كانت تفكر فى طريقة ترد بها على
مداعبة حسين •

واندفعت السيارة فى عدوها تنهب الأرض ، ومرق شفيق
بمهارة من جوار سيارة جلال ، ونبيلة ومراد وسوسن
يتصايحون مسرورين أما الأم فقد وضعت ابهامها على أنفها
وراحت تحرك أصابعها فى الهواء زراية وسخرية • •

وانسابت السيارتان فى طريق زراعى ضيق ، الحقول
الخضر متراصة عن يمينه ، قامت فيها بيوت متواضعة من طين ،
وامتدت التربة عن يساره ، تتدفق بالأمل والحياة • وأحست
الدواجن والطيور التى كانت تمشى فى تؤدة واطمئنان على
شاطئ التربة أقبال السيارتين ، فراحت تفسح الطريق ناشرة
أجنحتها وقد ارتفعت صيحات الأوز ، حتى كادت تغطى على
صوت السيارة •

ونظرت الأم ، فلمحت فلاحا مقبلا على ظهر حماره ، يسير
فى عرض الطريق ، فقالت :

— حاسب يا شفيق الحمار

والتفتت سوسن ، وراحت ترقب الحمار فى انتباه ، ثم
قالت :

— ماما • بابا بيقول لمراد يا حمار ليه ؟ دا الحمار كبير
وبيمشى على ايديه ورجليه وله ديل وودان طويله !
ومد مراد يده وقبض على ذراعها وقال :
— وبعدن معاكى ؟
ولم تأبه به ، بل قالت :
— ماما •• نفسى أركب حمار •
فقال شفيق :

— دلوقت أركبك حمار • أدى احنا وصلنا •
ووقفت السيارة أمام باب كبير ، يتوسط سورا من اللبن ،
مطلو بالجير ، وضغط شفيق غنى الكلاكس ، واذا بالباب يفتح
وانطلق شفيق فى ممر بين الخضرة والأزهار والأشجار العالية ،
وجلال فى أثره ، حتى بلغ سلاكم الدار فوقف عندها •
وهبطت نبيلة والأم تحمل هالة ، وسوسن وعاطف ومراد ،
وصعدوا فى الدرج قليلا ، ثم وقفوا ينظرون الى فناء الدار
الواسع ، وفى وجوههم أعجاب • كانت الأشجار العالية كمردة
حارسة على حوافه ، بينما غطت الخضرة المكان ، تتخللها ممرات
نسقت تنسيقا بديعا ، ونبتت الورود والزهور فى أحواض تحف
بها خضرة أزهى من الخضرة التى تغطي المكان جميعا •
ووقفت سيارة جلال ، وهبطت أحلام ووالدها وسامى
وعاطف يحمل كلبه ، وخف اليهم شفيق وقال :

— حمدا الله ع السلامه •

وصعدوا بضع درجات ونظر الأب وقال :
— حاجه جمينه •

فقال جلال وهو ينظر الى شفيق :

— مهندس زراعى ، ان ما كنش يهندس بيته ؛ ح يهندس
بيت مين !

وسار شفيق أمامهم وقال :
— اتفضلوا •

وبلغوا ردهه تؤدى الى بعض غرف ، وفى جانبها الأيسر
درج يقود الى الطبقة العليا وقال :

— اتفضلوا فوق استريحو وأنا وسامى وجلال وعاطف
ح نستريح ونغير هودونا هنا • وح نتقابل فى الجنينه تحت •
وصعدوا فى الدرج ، وقد ارتفعت الضوضاء ، سوسن
تطلب ركوب الحمار وعاطف يقلدها : ونبيلة تحت أحلام على
الاسراع حتى لا يفوتهم التمتع باليوم كاملا •

وبدلوا شبابهم والتقوا فى الحديقة . وقد تركت الأم هالة
مع خادم قروية ، وقال شفيق :
— تعالوا أفرجكوا الجنانين بتاعتنا •

وغادروا الدار ، وانطلقوا فى حقول الفواكه ، وراحت نبيلة
تملأ رثتها بالهواء ، وشفيق يسترق النظر اليها ، وسار جلال

الى جوار أحلام وقد أمسك يده فى يدها ، وراح سامى ومراد
يعدوان ، وعاطف وسوسن يجريان فى أثرهما •
وقال جلال :

— ايه رأيك نبقى شهر النسل هنا ؟

وقالت نبيلة :

— ياريت يا أحلام ، دى جنبه •

وقال شفيق :

— اتفضلوا • العزبه واللى فيها وصاحبها تحت أمركم •
والتقت عيناه بعينى نبيلة ، فأحست أن حديثه لها ، فتفتحت
نفسها ومست أوتار قلبها يد حنونة ، راحت تعزف أنشودة
الحب الخالدة •

— وبلغوا حديقة المانجو . فوقف الجميع ينظرون فاغرى
الأفواه ، حتى الأب سال لعبه ، ومد شفيق يده وقطف واحدة ،
وقال :

— دوقوا مانجتنا ، مانجه حلوه •

وهجم الجميع على المنجو ، وغاصت أقدامهم فى الطين ،
ولكنهم لم يحفلوا بذلك ، وامتدت الأيدي ، وقطفت الثمر
المتدلى ، وتلوثت الأكف والوجنات والذقون وراح عاطف يمسح
يديه فى صدره ، ونهرته أمه ، واعتبر مراد فلم يمد يديه الى
شبابه ، بل راح يمسحها فى ورقة من أوراق الشجر ، فاخترط

عصير المانجو بالتراب ، ومرر يده على فمه وذقنه وخديه ،
فاذاً بوجهه يتلوث بالطين ، ولمحته نبيلة ، فراحت تضحك وهي
تشير اليه بأصبعها ، وسدد الجميع اليه نظراتهم ثم انفجروا
ضاحكين :

واستمروا في تجوالهم ، وفي عودتهم الى الدار مروا
بالخطيرة ، فالفوا حصانين وبعض أبقار ، وراح شفيق يمرر
يده على رقبة الحصان وقال سامي لأبيه :

— مره يا بابا حكيت لنا انك ركبت حصان في الهرم
وسبقت فيه أتومبيل • الحصان أه ، ورينا يا بابا بتركبه
ازاي ؟

والثقت الأولاد جميعاً حول أبيهم وقالوا :

— والنبي يا بابا عايزين نشوفك وانت راكب الحصان •
واتسعت عينا الأب ، وبلغ ريقه ونظر الى زوجته يتوسل
اليها أن تتقذه ، ولكنها أعرضت عنه ، فلم ير مفراً من التهرب
والتماس المعاذير ، فقال :

— مش دلوقت • تعبنام المشي •

فقال سامي :

— والعصر يا بابا بعد ما تستريح نحضر لك الحصان •

وقالت سوسن لشفيق :

— عايزه أركب الحمار •

— حاضر •

وأمر خادمه أن يحضر حمارين •

وعادوا الى فناء الدار وجلسوا على كراسى خيزران صفت

فوق الحشيش ، وجيء بالحمارين ، فهرع مراد وسوسن

وعاطف اليهما ، وبكب مراد حمارا ، وركب عاطف وسوسن .

الحمار الآخر ، وقال الأب :

— طالع فوق سويه أستريح •

وقالت الأم :

— لما اطلع أنيم هاله •

وانصرف الوالدان ، وذهب شفيق وأحضر فونوغرافا ،

وجلس على الحشيش ، فترك جلال وأحلام ونبيلة وسامى

كراسيهم وجلسوا على الأرض •

وانبعثت الموسيقى ، كانت نفس الموسيقى الراقصة التي

انسابت يوم حفلة المدرسة ورقصت عليها نبيلة •

ونظر شفيق الى نبيلة وقد توجت فمه بسمه ، فأطرقت

نبيلة حياء ، وقال جلال :

— ياللا يا نبيله •

فأدارت وجهها ، وقالت :

— لا •

وقالت أحلام :

— وش كسوف قوى • ياللا •

وقالت لشفيق :

— دور الأسطوانه م الأول •

ونفضت نبيلة ، وبدأت فى الرقص ، وتعلقت عينا شفيق بها ، وراح يمرر لسانه على شفتيه •

وانتهت نبيلة من رقصتها ، وارتمت على الأرض ، وشفيق يتفرس فيها • ونفض جلال وجذب أحلام من يدها ، وقال وهو ينظر الى الحمارين :

— تعالى ناخذ لنا دور •

وقامت أحلام • ونفض سامى وقال :

— وأنا جاى آخذ دور كمان •

وهبط مراد عن ظهر الحمار ، وراح جلال يعاون أحلام على امتطائه ، وهى تميل على صدره وتضحك ، حتى اذا ما استوت على ظهره وأمسكت باللجام ، لكزه فى بطنه فهول وأحلام تصيح وتضحك وتطلب النجدة •

وركب جلال الحمار الآخر وراح يعدو فى أثرها ، ويضرب حمارها وهى تتوسل اليه أن يكف • وانطلق مراد وسوسن وعاطف يجرون خلفهم ، بينا وقف سامى يرصد أحلام وينتظر عودتها ليأخذ الحمار منها •

وبقى شفيق ونبيلة وحدهما على الأرض ، راحا يتبادلان

النظرات ويتتاجيان بأرق حديث وأعذبه وإن لم تتفرج لأحدهما
شفة • كأننا يتحدثان حديث روح لروح • وقلب لقلب •

ومر الوقت ، وجاء العصر ، فإذا بشفيق قد أقبل يقود
الحصان من لجامه • وقد أسرجه ، ونبيلة تسير إلى جواره
وأحلام وجلال والأولاد جميعاً خلفه • وقد اتسخت ثيابهم ،
وكان مراد أكثرهم قذارة •

ووقف شفيق عند درج المنار • وصعد مراد وسامي
يهولان • حتى إذا بلغا العرصة انتى بها والداهما قال سامي
لأبيه :

— بابا الحصان جاهز تحت •

ونظر الأب من النافذة : ورأى الحصان يهز ذيله ويضرب
الأرض بحافزه • ويصهل • فعاد وهو يمرر يده على بطنه
ويقول :

— بطنى ح نطق ، كلنا كثير ع الغدا • مش قادر أتحرك ،
بلاش النهارده • مره ثانيه •

وأرادت زه جته أن تداعبه ، فقالت له :

— يا راجل انزل اركب شويه •

ورمقها فى عتاب ، ثم اتجه إلى السرير وتمدد فيه وقال :

— مش قادر أتحرك النهارده • مره ثانيه •

ويئس أبناؤه منه ، فغادره وهبطا ، وانصرف السائس
بالحضنان ، وقال سامي :

— عايزين نلعب حاجه •

فقال مراد :

— نلعب الكوره •

فقالت نبيلة :

— لا • نلعب حاجه ثانيه •

فقال شفيق :

— نلعب استغمايه •

وقال الجميع :

— موافقون •

— أيوه ، نلعب استغمايه •

وقال جلال :

— مين الحفاء ؟ •

فقال مراد :

— أنا •

وقال سامي :

— لا • أنا •

وقال شفيق وجلال :

— خلي سامي الحفاء •

وأغمض سامى عينيه ، وأخذ الجميع يتسللون ليختفوا منه ،
وجرى مراد بعيدا ، وقالت أحلام لسوسن وعاطف همسا :
— اطلعوا فوق استخبوا عند ماما •

وأطاعاها ، وصعدا فى الدرج ، وذهب جلال وأحلام ليختفيا
خلف الدار بينا خرج شفيق ونبيلة من الباب الكبير ، وصاح
سامى :

— خلاص ؟ •

وجاءه صوت شفيق من بعيد :

— لسه •

ودلف شفيق ونبيلة الى الحظيرة ، ووصل الحصان ، وأشار
له شفيق أن يصمت وهو يقول :

— هس •

ووقف شفيق والى جواره نبيلة ، ومس شعرها خده ، وملا
عبيرها أنفه ، فانبثقت فى أغواره مشاعر رقيقة ، واستشعر
غيبوبة لذیذة تغلفه ، وحنانا طاغيا آمرا ، يستبد به فلا يستطيع
أن يعصى أمره ، فمد يده وجذبها من يدها فاستدارت له ،
وتألفت عيناه بالرغبة ، وضمها إليه وقبلها ، فنظرت اليه بعينين
ترقرقت فيهما الدموع ، فقال لها فى وجد :

— تروحي الجامعه ، واللا تتجوزينى وتقعدى فى البيت ؟
فقالته وهى هائمة فى عالم بهيج من الأحلام :

— لا • البيت أحسن •

الفصل الخامس عشر

وضعت أحلام حقيبة كبيرة على سريرها ، وراحت تصف فيها ملابسها الداخلية والمنزلية ، وأخذت نبيلة تعاونها ، فأخرجت من الصوان بعض قمصان النوم والقطع الدقيقة التي تفتق ذهن صانعي الجمال عنها : لرفع الثديين ، وبعض القطع الصغيرة من الثياب ، التي تسدل القمصان فوقها ، ولحبتها أحلام وهي ترفع رأسها عن الحقيبة ، فقالت لها :

— خلى الهدوم دى عندك •

— ليه ؟ •

— مش ح اخدها دنوقت • ح البسها فى الخمس أيام اللي

فاضلين لى هنا •

— خديهم معاكى بالمرة ، وابقى البسى من هدومى •

فقالت أحلام وهي تحاول أن تغلق الحقيبة :

— يمكن أسببهم هنا على طول ، أبقى ألبسهم لما آجى

أزوركم •

فقالت نبيلة وهى تعيد الثياب مكانها :
 — خليهم زى مسمار جحا !
 وارتفع صوت سوسن :
 — ماما .. ماما .. انحقى • عاطف غرق هدومه فيه وهو
 بيحلمى سوزى •
 فصاحت الأم من غرفتها :
 — عاطف ، اقل الحنفية دى ، واخرج من عندك •
 وصاح عاطف :
 — سوزى اتمرغ فى الوحل باحميه •
 — اخرج من الحمام أحسن ان قمت لك ح اقصف رقبك •
 وخرج عاطف من الحمام ، وقد ابتث ملابسه ، وهو يحمل
 سوزى ويضمه الى صدره ، والماء يتقاطر من جسمه ، ولحته
 أمه فهرعت اليه وهى تصيح :
 — هو انتو قرود • دوختومى •
 وجذبتة من يده وقالت وهى تذهب به الى غرفته :
 — تمال غير هدومك الللى بتلث دى .. ح تعيبى وتموت •
 فقال وهو يهز كتفيه فى زراية :
 — بتضحكى على • مش ح اموت • الصغيرين مايومتوش •
 — مين ! اللى قال لك كده ؟
 — مراد •

وأطلت نبيلة برأسها وضحكت ، ثم دارت على عقيبها
ونظرت فألقت أحلام تديم النظر الى سريرها وقد شردت فى
تفكير ، فرمقتها فى صمت ، أحست ما يعتل فى صدر أختها من
مشاعر ، وفطنت أحلام الى وقفة نبيلة ، فالتفتت اليها وقالت
وهي تقبض بيدها على السرير :

— أول سرير انتصب هنا أول سرير ح يتفك •

فخطت نبيلة خطوة حتى لمست كفها كف أختها وقالت :

— مش ح يتفك أبدا ، ح يفضل منصوب على طول ، لما
تجينا تبقى تريحى فيه ، ويكره هاله تكبر وتنم فيه •
ولفت نبيلة يدها حول كف أختها وقالت :

— ح توحشنا •

ونظرت أحلام الى أختها وقد اغرورقت عينها بالدموع •
وخرج سامى من غرفته وفى يده كرفاته يقلبها فى زراية ،
وقد لوى شفته السفلى ، وانطلق الى غرفة أبيه ، فوجد أباه
مطرقا فى صمت ، فلم يحترم خلوته ، وقال :

— الكرافاته الللى جبتها لى مش حاجه •• مش ماشيه مع
البدله • عندك كرافته تبقى على بدلتى الجديده شيك خالص •
فقال الأب فى استسلام :

— الكرافاتات كلها عندك ، خد الللى انت عايزه •

وعادت الأم ، ورأت سامى يقلب فى كرافتات أبنيه ،
فقالته له :

— انت مش ح تبطل الطمع ده ، ياللا بره بلاش دلح •
ولم يحفل بها ، أخذ الكرافته التى يريدتها ووضعها على
كتفه ، وخرج فى تؤدة ، وقد صم أذنيه عند تأنيب أمه •
ورمقت الأم زوجها ، فاذا به صامت ، فقامت له :
— مالك سرحان النهارده ؟ •

— تعبت • ادينت ومايقاش معايا حاجه أبدا •
— الحمد لله البنيت اتجهزت • وكلها يومين وتتستر ، وبعدها
يعدلها ربنا •

— اترنقت قوى •
— برضه انت اللى زنقت روحك • لو خليتته يجيب المشمع
والنخف والنملية ، أدوات المطبخ وملة السرير زى الناس كلها
ما بتعمل ، ما كنتش ازنقت كده •
— دى كلها حاجات فارغه •

— أهو برضه كان تمنها نفع دلوقتى •
ورفع بصره اليها وقال :
— اسمعى يا زينب ، عايزين نلم نفسنا ، نكتب الكتاب
ع الضيق لو اتفخرناح نتفضح •

— وأنا ليه مبن يا حصره ، ح اقتصر ع العيله وبس •

— سوا العريس لا ؟

— العريس اذا كان ح يعزم يعزم على بيته ... ما قلتيش
اتفقت على ايه مع أبوه ؟ • •

— ح ييجوا بعد صلاة العشا يكتبوا الكتاب ، وبعدها
ياخد العريس عروسته ويمشى •

— كله بيتقضى ، كلها كام يوم ونفوق على طول •

ورن الجرس ونينا متصلا ، فخفت سوسن تفتح الباب ،
فقرع أذنيها صوت خروف ، فاذا بها تعود مهولة وهى تصيح :
— ماما • ماما • الحقى • خروف •

وقال الأب فى تساؤل :

— خروف ايه يا بت ؟

— والننى خروف يا بابا •

أسرع سامى وعاطف وأحلام ونبيلة الى الباب وقامت الأم
وخرج الأب خلفها ، وقد اختفت خلفه سوسن ، وفتح الباب ،
واذا بأربعة ديوك رومى تتدقق فى كبرياء ، وفى أثرها خروف
سمين يدفعه مراد •

وقفز سوزى من يد عاطف ، وراح ينبج ، وأسرع عاطف
يقبض على ديك ، بينا صرخت سوسن رعبا من الخروف •
وارتفعت أصوات سامى وأحلام ونبيلة ، فأصبحت الشقة أشبه
بحمام عام قطعت عنه المياه •

معمور • دبیر و معاونان معتمد حاجه آید



- وصاح الأب فى ضيق :
- بس بقى • ايه الزيته دى ؟ !
- وخفقت الأصوات ، وقال الأب لمراد :
- ايه ده ؟ •
- فقال مراد وهو يدفع الخروف :
- شفيق بعثهم •
- ايش عرفك ؟
- الرجل اللى جابهم واقف تحت ، كان معاه الاسم والعنوان ، وقال 'ن سى شفيق اللى باعهم •
- وقال الأب فى مرارة :
- وليه بعثهم بس ؟
- فقالت نبيلة فى زهو :
- بعثهم هدية يا بابا •
- وقالت الأم •
- طب ياللا ظلموهم ع السطح •
- وأخذ الأولاد يدفعون الخروف أمامهم ، وسنوزى ينبج ، وراح سامى يهشر الديوك لتشق طريقها خلف الخروف •
- وقالت الأم للاب :
- مش ح ندى الرجل حاجه ؟ •
- وتحرك الأب نحو غرفته ، وقالت الأم لسوسن •

— وائیںی حروف با دیا •



تعالى يا سوسن ادى الفلوس دى للراجل اللى واقف
تحت •

ومد الالب يده فى جيب جاكته المعقاة فى المشجب ، وأخرج
ريالا أعطاء سوسن فانطلقت تمدو ، ورفعت الأم بصرها وقالت
وهى تصيحخ السمع :

— لو فيه مكان واسع فى الشقة كنت خلتهم فيها ، يا خوضى
لحرامى يسرقهم •

فقال حسين وهو يرغع بكف لاضراعة .

— يا ريت ! •

— ليه بس ؟ •

— كنت اسنريحت م الفتحة اللى ح تتفتح عليه دى •
— فتحة ايه ؟

— الخروف والديوك دى مش عايزه طباخ ؟ !

— مش فيه ناس م العيله ح ييجوا من أول النهار . أهو
الطباخ يعديهم ، واللامين كان ح يعديهم ؟

— كنا ح فطبخ لهم حلتين •

— أهو الطباخ ح يطبخ لهم الحلتين دول •

— والطباخ معوز قراش •

— مش كنا ح نجيب كرسيين للناس يقعدو عليهم . ايه
اللى ح يزيد علينا ؟

فقال الرجل وهو يهز رأسه أسفا :

— جت رجلى وخلاص •

فدنت منه وقالت مواسية :

— ربنا يخليك لهم ، وتفرحهم : هم لهم مين غيرك ؟

فقال الرجل فى استسلام :

— لو كان فيه معلش ، أنما ما فيش خالص ، الفلوس

كلها طارت •

— كله يدبر •

وعادت سوسن ، فقالت الأم :

— اديتي الفلوس لئراجل ؟

— أيوه •

— وقال لك ايه ؟

— قال لى : قولى لأم العروسة : مبروك •

وأشرق ميهج الأم ، ورمقها زوجها من طرف عينه ،

فانبسطت تجعدات جبهته ، ولم تتفرج شفتاه •

وعادت النوضاء الى الشقة ، ارتفع صوت نبيلة وسامى ،

قالت نبيلة :

— انت مالك ما تسييه •

— اسنيه ازاي لما يتمور ؟

وقالت الأم :

— فيه إيه ؟

فقال سامى :

— عاطف مش عايز ينزل • قاعد جنب الخروف فوق •

— سييه •

وساء سامى أن يهزم ، فقال :

— ح يموت الديوك •

فقالت الأم :

— ما لكش دعوه بيه ، وريح نفسك انت •

وانسابت نبيلة على أطراف أصابع قدميها وهى ترنو الى
سامى من فوق ككفيها ، ولحت أحلام الشرر فى عيني سامى ،
فقالته :

— عايز تغيظها ، ما تسألش عنها •

ونفض الأب يرتدى ثيابه ، فقالته له الأم :

— على فين ؟

— أروح أشوف الطباخ والفراش •

— وأنا ح أخرج مع أحلام نعزم العيلة •

وبلغ ذلك مسامع أحلام ففعلت :

— مش ح أقدر أخرج معاكى يا ماما عشان فايزه أخت
جلال جايه تشوف الجزمه اللي ح البسها ليلة الفرح تشتري
زيها •

— فليز به جايه ؟ والله احنا ما فينا خير ، اللى ما سالنا عنها ،
ويوم ما رحنا العزبه اللى ما قلنا لها تيجنى •
فقال نبيلة :

— احنا كنا معزومين ح نعزم غيرنا ! اذا كان جلال عايز
يجيبها كان جابها معاه •
فقال سامى وهو ينظر الى احلام :

— هو جلال فاضى لها ؟

ورمقته احلام فى شزر ، فاضطر الى كبج جماح لسانه •
ودار على عقبه وانصرف وقالت الام :

— آخذ نبيله معايه ، ياللا يا نبيله البسى ما تعطلنيش •
فضحكت نبيلة ضحكة طويلة ممدودة ، حتى ان عداوها
قد سرت الى احلام وسوسن • وقالت وهى تقلد امها :

— انا الى ح اعطلك ! قال على رأى المثل : لو الجمل حس
بصنمه ••

فقال الام فى عصبية :

— ما باحبش اخرج معاكى يا بت انتى من لسانك الطويل •

وانطلق حسين الى طباخ ورثه عن ابيه ، كان يقيم موائد
افراحهم واطقم ماآتهم ، وانتقل موقده الى أسطح بيوت
الأسرة جميعها ، واحتل أفنية مدافنها ، وما كان فى اعداد
طعامه يفرق كثير ! بين ما يقدمه فى الأفراح وفى الأتراح •

وحياة حسين وجلس ، وقال له :
 — عندى كتب كتاب أحلام يوم الخميس ، وعزيزنك تيجى
 تطبخ لانا حلوتين ع الضيق •
 فاعتدل الطباخ وقال :
 — انت مش عازم حد أبدا ؟ •
 — يا دوب العبله ح تيجى وبس •
 — يبقى الكلام اللى بتقوله مش ح ينفع ، اسألنى أنا
 ع العيله •
 — أنا عندى خروف وأربع ديوك رومى ، عشره ••
 خمستاشر ح يتغدوا والباقي للمشا •
 فضحك الطباخ وقال :
 — عشره خمستاشر ؟ ! دول يدوب أهل البيت • الكلام
 ده ما ينفعش •
 وأحضر ورقة وقلمًا وناولهما لحسين وقال :
 — أول ما نبدى نبدى بالمورد ، اللهم اجعله ورد ، اكتب
 يا سيدي عندك تمزاة ماورد ر ٢٠٠ بيضه وعشرين وقه دقيق
 أمريكانى •
 فقال حسين معترضا :
 — عشرين وقه دقيق أمريكانى ليه ؟ مش ناوى تشتري
 عيش ولا ايه ؟ •
 — والنمى يا حسين بيه نكتب ، اياك يكفو الفطاير اللى
 ح نعملها •

واستأنف املاء ما يريد كأنما يقرأ فى صفحة مكتوبة :
 — وقفة شعريه ، سبع أقداح رز ، ميت رطل لحمه عجالى •
 فقال حسين معترضا :
 — واللحمه العجالى ليه ؟ ما عندنا الخروف !
 فقال الطباخ فى بساطة :

— ح نعمل م الخروف كفتة والا لحمه عصاج ؟ والنبي
 تكتب قبله وبعدين شوف اللي عايز تقوله ايه •• أربع مراوح
 ضانى ، خمستاشر جوز حمام •• خد الخضار : عشرة أرطال
 كوسه صغيره للخشو • خمسة أرطال ورق عنب • خمسة أرطال
 فاصوليا خضره ، علبتين بسله نشفه • خد عندك الحاجات
 دى عشان الحلويات : انتين كيلو شيكولاتة كتل ، وائتين كيلو
 شيكولاتة مجروشه ، وتلت وقات كرز وخمس علب أناناس
 وخمس وقات موز ، وخمسه كيلو كريمه وعشر وقيات فسدق :
 وعشرين لمونه •

ورفع حسين القلم عن الورقه وقال :
 — ح تعمل ايه بالحاجات دى كلها ؟
 — طرطات وهريسه وخشاف والمظيه ومهليه •
 — ما كفايه صنفين •
 — لو الحاجات دى كفت يبقى ستر من عند ربنا •
 — أنا مش عامل حاجه ومش عازم حد ، و ••• و •••
 — والنبي تكتب قبل ما انسى •
 — لسه فيه كتابه ؟

- عشرين رطل سمن ، والبصل والفلفل والملح •
- الحاجات دى فى البيت •
- وحملين خشب رواجع ونص قنطار فحم وسلامتك •
- ورفع حسين رأسه وقال
- خلاص خلصت ، اسمع يا سيدى • أنا مش ح اجيب
- الانص الحاجات دى •
- يا ريت ! •
- ودنا من حسين وقال له كصديق يهमे مصلحته :
- بقى نصرف المصاريف دى كلها ونيجى ع الآخر ونفضح
- نفسنا ؟
- فقال حسين وهو ينظر الى الأرض :
- بس الواحد ح يجيب منين ؟
- كله برزقه •
- أراد أن ينهى هذا الحديث ، ويتحدث فى موضوع آخر
- فقال :
- واتفقت ع الفراشة مع مين ؟
- فقال حسين فى استسلام :
- والله لسه ما اتفقتش مع حد ، لكن ما فيش الا عماره ،
- على قدنا وابن حلال •
- فقال الطباخ :
- واهو الراجل بتاعنا برضه •• ح تروح له امتى ؟

— بكره •

— وليه بكره ما تياللا نفوت عليه دلوقت •

وسارا يتحدثان حتى بلغا مخزن فراشة الحاج عمارة ، وكان
الحاج جالسا خلف مكتب والى جواره بعض المقاعد الخشبية ،
بينما وضعت الكراسى المذهبة فى صدر المخزن فى عناية •
وقال حسين :

— السلام عليكم يا معلم عماره •

— وعليكم السلام حسين بيه • اتفضل •

وجلس حسين وجلس الطباخ ، ولم يشأ حسين أن يضيع
وقتا ، فقال :

— يوم الخميس كتب كتاب بنتى ، عايزين كام كرسى •

فقال الطباخ •

— الكلام ده ما ينفعش ، نقوم نشوف المكان اللى

ح يتفرش أحسن •

وقال المعلم عمارة :

— أحسن •

ثم نهض وقام الطباخ وحسين وانطلقوا الى الشقة •
وراجو ، يجوسون خلالها ويدخلون غرفها غرفة غرفة ،
والفراش يقلب عينيه فى الأثاث ويلوى شفته السفلى ، ولما
انتهوا من طوافهم ، قال الفراش :

— العفش اللي في الشقة لازم يتكوم في أوده واحدة
ويسك عليها •

فقال حسين في فزع :

— يتكوم في أوده واحدة ؟ وليه كده ؟ ! •

فقال الفراش :

— لو فضل العفش ده ، الناس ح تقعد فين ؟ ح نفرش
الأرض سجاجيد ونرص الكراسي في الأوض • نجيب كام
كرسي مذهب ؟

فقال حسين :

— كفايه دسته •

فقال الطباخ :

— دسته تعمل ايه ؟ ع الأقل دستتين •

وقال حسين :

— ولا ح تملا الأوض كلها كراسي ، الناس ح تاكل فين ؟

فقال الطباخ في بساطة :

— ح نشد تركين قمائش وننصب البوفيه في السطح •

وانتهت المناقشات ، وشد الطباخ والفراش على يد حسين ،

وهما يقولان :

— ربنا يتمم بخير •

وانصرفا وارتمى حسين على الأريكة فى الردهة ، وقد
شرد ببصره ثم راح يدلك جبهته بيطن كفه •

ورن الجرس ، وأسرعت أحلام تفتح الباب ، ودخلت الأم
ونبيلة ، يلوح التعب فى وجهيهما ولكن ما أن وقعت عينا الأم
على أحلام ، حتى قالت :
— فايذه عندك ؟

— لا والله • نزلت قبل ما ييجى بابا •
— هو بابا جه ؟

ودخلت الأم • وجلست على الأريكة بجوار زوجها وقالت
وهى تخلع حذاءها رحمة بقدمها :
— خير • هه عملت ايه ؟
فقال فى صوت خافت :
— خير •

وأحس أن نبرات صوته توحى بالضيق ، وخشى أن يتسبب
فى انقباض صدر أهل بيته فى أيام فرحهم ، فتظاهر بالنشوة ،
وقال لزوجته :

— هيه • عملتوا ايه ؟

فقالت الأم :

— عزمنا الناس اللى حوالينا •

— عزمتموا كثير ؟

— لا مش كثير •

فقال نبيلة في استنكار :

— مش كثير ؟ مش كثير ازاي ؟ ! دا ما فيش بيت

ما دخلناش •

فالتفتت الأم اليها وقالت :

— يا بت بلاش تهويل •

فقال نبيلة وهي تتململ في وقفها :

— لو رجلينا تعرف تتكلم ، كانت حكت اللي جري لها •

والتفتت الى أبيها وقالت :

— تعرف يا بابا لو اللي عزمناهم كلهم جم ، ح يبقى الناس

على بعضهم •

فقال الأم :

— هو معقول كل اللي عزمناهم ح ييجوا •

فقال نبيلة :

— هو معقول حد يتعزم ولا يجيش • والله اللي ح ييجوا

أكثر م اللي عزمتهم • يا ما ننس بتيجي من غير عزومه •

وقامت الأم وهي تقول :

— يا بت انتي هوالة ، ما تبقيش تخرجي معايا أبدا •

وانصرفت الأم الى غرفتها ونبيلة تقول :

— بكره ح نشوف •

الفصل السادس عشر

وأشرقت شمس يوم الأربعاء ، اليوم السابق لليلة الخطيرة المرتقبة ليلة الزفاف ، فهدبت الحياة فى الشقة مبكرا ، استيقظت الأم وأحلام ونبيلة ، ورحن يرقبن عمال الفراش ، وهم يكدسون الأثاث فى الردهة التى كانت معدة لاستقبال الضيوف ، وأخذ سامى ومراد وسوسن يحملون الكراسى الخيزران على رءوسهم ، ويقومون بصفها فى الغرف التى فرشت بسجاجيد الفراش الكبيرة الحمراء ، التى نمقت بزخارف عربية زرقاء وصفراء وبيضاء ، استوحيت من غصون الشجر والأوراق والأزهار .

وراح عاطف يقفز فوق الكراسى ، والكلب فى أثره ، يصعد اذا صعد ، ويهبط اذا هبط ، وجاء الأب يحمل هالة على ذراعه . ولم يكن منسبط الوجه ، كان ينفوح عليه آى التفكير .
ورأى هبوط عاطف وصعوده وحركته الدائبة بين الكراسى ، فقال له :

— أنت هنا بتعمل ايه ، اطلع السطح اتفرج • الطباخ ج
يدبح الخروف •

والتفتت سوسن وأصاحت سمعها ، ووضع مراد الكرسي
الذى يحمله والتفت ، بينما جلس سامى على أحد الكراسى
المصفوفة ، وربع يديه فوق صدره العارى • كان يرتدى بنطلونه
القصير الأبيض وحذاء أبيض من المطاط ، وأشرأب بعنقه
بنظر •

وذهب عاطف إلى أبيه وقال ، وعيناه تتمان عن خبث :
— عايزنى أطلع السطح وأتفرج على الخروف لما يدبح ؟
— آه •

— هات قرش قبله •

وأخرج الأب قرشا من جيب بنطلونه ، فالتقطه عاطف فى
خفة الحداة التى تلتقط حشايا طير مذبوح ملقاة فى خربة ،
واقتربت سوسن من أبيها وقالت :

— بتجيب الفلوس منين يا بابا ؟ •

وقفزت إلى ذهنه اجابات كثيرة ، ولكنها ما كانت تصلح
اجابة عن سؤال طفلة لا تدري ما الحياة وقسوتها ، أيقول لها
من عرق الجبين المترج بتحمل سخافات رؤساء تافهين ؟ أيقول
لها من الملق والرياء ؟ أيقول لها من كتم أنفاس صوت الضمير
والسير فى مواكب النفاق ؟

وشرد قليلا وقد ازدهمت فى رأسه صور معتمة بغیضة ،
نكأت جرح نفسه ، وحركت أساه ، حتى أنه أحس مرارة فى
فمه ، ولكنه كبث مشاعره وقآن :

— من الحكومة •

وقالت سوسن :

— والحكومة بتجيب الفلوس مينين ؟

— من الناس • اللي عنده دكان تاخذ الحكومة من مكسبه ،
واللى عنده بيت تاخذ الحكومة من الأجره اللي بيلمها
م السكان •

فقال مراد :

— الحمد لله لا عندنا بيت ولا دكان • مش ح تاخذ مننا
الحكومة حاجه •

وقال سامى :

— يا ريت كان عندنا وكانت خدت •

وقالت سوسن :

— مش الحكومة بتديك فلوس كتير قوى يا بابا ؟

وتجمدت جبهته ، ولاحت فى وجهه مسحة من الحزن ،
ورأى أن يثد ذلك الحديث الذى يخز روحه ويضنيه ، فقال :

— مش ح تطلعوا تتفرجوا ع الخروف لما يدبح ؟

ورن صوته غريبا فى أذنيه ، خيل اليه أن فيه نبرة أسى

ساخرة توميء الى العلاقة بين ذبحه وذبح الخروف ، فوقف
مشدوها برهة ، وقال سامى وهو ينهض :

— يلاع السطح •

واندفع الأولاد يصيحون ، والكلب يجرى خلفهم ، والتفت
عاطف وقال :

— وهاله مش ح تتفرج ع الخروف لما يدبح ؟ .

فقال الأب ساخرا :

— هاله لسه صغيره ، لما تكبر ح تدبجه •

واختفى الأولاد عن عينيه ، ولكن أصواتهم كانت ترن فى
أذنيه عالية مدوية ، وضم هالة الى صدره فى جنان وقال
بناجيتها :

— لما تكبرى ح تدبجى بابا ؟ ! ح تفلسيه كده ؟ ! لكن انت

ذنبك ايه ، حد خد رأيك قبل ما تيجى ؟ احنا اللي جبناكى
غصب عنك •

وراح يمرر شفتيه على صفحة خدها ويفمغم :

— اكبرى وفلسى بابا •

ولمح نبيلة قادمة ترتدى بيجاما ضيقة ، تفضح مفاتن

جسمها ، فأربد وجهه ، ورفع شفتيه عن خد هالة ، وقال :

— واقفه يا نبيلة قدام الرجاله الغرب بالشكل ده ؟

ونظرت الى نفسها فى دهش وقالت :

— فيه ايه يا بابا ؟ درعاتى متغطيه ورجليه متغطيه •
فقال وهو ينظر الى صدرها البارز ، الذى يكاد يقفز من
البيجاما :

— لكن •• لكن •

— لكن ايه بس يا بابا ! اذا لبسنا فستان بكم جابونيز
قلقم ذراعاتكو عريانه ، وان لبسنا فستان قصير قلتو : عيب
رجليكو عريانه ، وان غطينا ذراعتنا ورجليننا ما نعجبش •
أمال نعمل ايه بس •

ورن جرس الباب الخارجى ، فدارت نبيلة على عقبيها ،
وقال لها أبوها :

— ما تفتحيش انتى • خشى جوه • أنا اللي ح افتح •
وانطلق الى الباب وفتحه ، واذا بثلاث سيدات من الأسرة
وأولادهن ، وخادم تحمل بقجة كبيرة ، فيها ثياب منزلية كثيرة ،
وحملت فى يدها مشجبا به فستان للسهرة ، كانت هيئتهم تدل
على أنهم جاءوا ليستقروا ، وما أن لحهم حتى قال مرحبا :
— أهلا وسهلا • اتفضلوا •

وارتفعت الأصوات من هنا وهناك :

— ألف مبروك • والله فرحنا قوى • أحلام دى بنتنا •
واندفعوا داخلين ، وما أن اجتازت الخادم الباب حتى

أطلقت زغرودة مدوية ، جعلت الأم وأحلام تهرعان الى
الردهة •

ودارت القبلات ، وترددت التمنيات ، وقالت النسوة وهن
يضربن ظهر أحلام فى حنان :

— أهلا بعروستنا •

وانطلقوا الى الغرف الداخلية ، وقال الأولاد :

— أمال فين سامى ومراد وعاطف ؟

وتلفتت الأم ، فلما لم تجد أولادها قالت بصوت عال :

— أمال الأولاد فين ؟

فقال الأب من بعيد :

— طلعو! السطح يتقرجوا ع الخروف لما يدبح •

ولم ينتظر الأولاد حتى تدعوهم الأم الى اللحاق بأولادها ،
بل انطلقوا مهرولين وهم يتصايحون •

ورن الجرس الخارجى ، فقالت الأم :

— افتحوا الباب على طول ، هو الباب يتقفل النهارده !

وخف الأب الى الباب وفتحه ، فاذا بسيدة ويناتها
وأولادها وقد حمل الأولاد تحت ابطهم لفائف فيها ثيابهم
المنزلية ، بينما حملت احدى الفتيات فى يدها بقجة •

وابتسم ورحب بهم ، وأفسح لهم الطريق ، وأسرعت

الأم لاستقبالهم وقادتهم الى الغرف الداخلية ، ليبدلوا
ثيابهم ، وليرتدوا ما حملوه فى اللفائف والبججة •

وأخذت أم العروسة تغدو وتروح فى الشقة ، دون أن
يكون لها هدف ، والتقت بزوجها بالقرب من الباب ، فقال لها :

— مالهم مبشرين كده ؟

فقالَت الأم وهى تأخذ منه حالة :

— العاده كده • يياتوا معاها ليلة الحنه •• آخر ليله لها

فى بيت أبوها •

— يياتوا معاها من ييجوا م النجمه •

واتجه الأب الى بئر السلم ونادى :

— سامى •• سامى •• انزل •

— حاضر •

وهبط سامى فى الدرج قفزا ، حتى بلغ أباه ، فقال :

— نعم ؟

فقال الأب فى صوت خافت :

— قول للطباخ يعمل حسابه ان ثلاثين ع الأقل ح يتغدوا

ويتعشوا النهارده •

فقال سامى وهو يبتسم :

— هو عامل حسابه : قال لى انه عارف العيله كويس •

ولاح فى عينى سامى كلام ، فقال له الأب يستدرجه
للبلوح له بما يحاول أن يكتبه :
— وقال لك ايه كمان ؟

فقأن سامى وهو يخفض عينيه :

— وقال لى انه يعرف العيله أكثر منك • كنت عايز تعمل
حاجه ع الضيق ، وهو ما وافقكش • ما حبش يكسبك •
— طب اجرى حصله فوق وبلاش لت معاه •

وعاد الأب الى الشقه ، وجلس فى غرفة المكتب على
كرسى من كراسى الفرائش ، بحيث يرى ما يجرى فى الردهة ،
ولمح زوجته فى غده ورواح دون أن تفعل شيئاً ، وسعت اليها
الخدم الكبيرة ، التى جاءت مع الفوج الأول من الأسرة ،
وقالت :

— قال يا ستى مش ح تعجنوا الليله دى حنه ؟

فقالت الأم فى استنكار :

— حنه ! الحاجات دى ما قدمت بقى •

فقالت الخادم فى استنكار :

— هو يبقى فرح من غير حنه ! اذا كنتو مش ح تتحنوا
نتحننا احنا •

— والله ما عرف الحنه بتتباع فين !

— عند العطارين •

ورنت إليها رنوة معبرة ، لم يفت الأم مدلولها ، فأخرجت ورقة مالية صغيرة دفعت بها إليها وهي تقول :

— أشتري الحنة اللي عايزاها •

وارتفع صوت نسوى ينادى :

— يا ست يا أم العروسة •

فقالَت الأم :

— حاضر • جايه •

وظل الأب يرقب ما يجرى فى الشقة ، وهو جالس فى مكانه •

وراحت ساعات النهار تمر وثيدة ، حتى ان حسينا ضاق بنفسه ، واستشعر ملامحاً ، ومالت الشمس للغروب ، فاجتمعت الخادومات فى الردهة ، ورحن يغنين ، ويرقصن على نغمات طيلة ورق ، وخف الأولاد اليهم ينظرون •

ونظرت سوسن الى الفتاة التى كانت ترقص شزرا ، وقالت فى ازدراء :

— هو دا رقص ؟

وسمعت الفتاة بسخرية سوسن فتوقفت وقالت :

— مش عاجبك رقصى ؟ ! نعالى فرجيننا •

وقبلت سوسن التحدى ، وتوسطت الحلقة وراحت ترقص ، وجعلت تهز كل عضلة فى جسمها ، حتى ان الفتاة

راحت ترمقها فى غيظ ، وارتفع تصفيق الأولاد ، فخفت
النسوة ينظرن مشدوهات ، ونظر الأب من بعيد ، ولأول مرة
منذ الصباح رفت على شفتيه بسمه •

والتفتت سيدة الى أحلام وقالت لها :

— لو كانت كبيره شويه كانت لهفت العريس منك •

فقالت أحلام وهى تبسم :

— ما انا لحقت اتجوزت قبل ما تكبر •

ومر الوقت فى ضحك ورقص وغناء وأكل ، وجاء الليل
ومشت الأم الى حيث كان زوجها ، وراها يتناجيان ، قال :

— فيه حد ما اتعشاش ؟

— كلهم كلوا •

— وح يناموا فين دول كلهم ؟

— ما تحملش مهم • دلوقت يناموا مطرح ما هم قاعدين •

ليه وتتفض •

— عايزه الحق ؟ أنا تعبت خالص •

— كلها الليله دى وبكره • ونستريح بعدها على طول •

استحمل شويه •

فقال مواسيا نفسه :

— خالص الكثير ما بقى الا القليل •

وارتفع صوت الخادم تتادى :

— يا ست يا أم العروسة •

— حاضر • جايه •

وانطلقت اليها ، فقللت الخادم :

— ح نعجن الحنة فى ايه ؟

— عندك قروانه صغيره فى الحمام اعجنيتها فيها •

وجيء بالقروانه ، ووضعت فى الردهة ، وتحلق الخدم حولها ، ووقف الأولاد ينظرون وراحت كل فتاة تلف حول كف زميلتها أشرطة فى تقاطع هندسى ساذج ، حتى اذا وضعت الحناء فى قبضة اليد ، بقى مكان الأشرطة دون خضاب ، فتبدو الكف منقوشة •

وتم لف الأشرطة ، وأغلقت الأكف على الحناء ، ثم ربطت القبضات بقطع من القماش الأبيض فبذت كرعوس النوم الكبيرة !

ومشى الوسن الى جفون الصغار ، فتمددوا فى أماكنهم حيث كانوا جالسين ، ولحقتهم أم العروسة فى دورانها الدائب فى الشقة ، فقالت :

— يا عيني ! النوم غلبهم •

ونادت على الخدم وقالت لهم :

— تعالوا افرثلوا المراتب ونيموا الأولاد •

وذهبت الفتيات خلفها حيث صفت الحشايا ، بعضها فوق بعض ، وقبضاتهن ملفوفة بالقماش ، والتفتت اليهن وقالت :
— شيلوا •

وتقدمت احداهن ، وحاولت أن تحمل حشية بين ذراعيها ، ولكنها أخفقت ، فقالت لها الأم :
— أنا عارفه كفتوا مستعجلين على الحنة ليه ! استنى لما أساعدك •

وتقدمت الأم ورفعت الحشية ووضعتها على عاتق الخادم ، وفعلت مثل ذلك مع الأخريات •

وأحس الأب التعب يمشى فى أوصاله ، فأخذ وسادة فى يده وانطلق الى الغرفة التى كدس فيها الأثاث ، ووضع الوسادة على مسند كرسى طويل ، ثم تمدد لينام •

وتلملم فى رقدته ، وأحس ألما فى رقبته ، فراح يتحسسها بيده ، ولم يحتمل ما يقاسيه من تعب فى نومه ، فانتصب واقفا وأخذ الوسادة ووضعها على الأرض ، ثم رقد على البساط •
وحن جسمه الى الراحة فراح فى سبات •

وانقضى الليل • وجاء النهار ، وخيل اليه أنه يسمع رنين جرس الباب الخارجى ، كان ما يسمعه أشبه بما يستشعره المستغرق فى حلمه : ولكنه فتح عينيه ، فاذا برنين الجرس يصك أذنيه •

ونهب لينطلق كمادته الى المطبخ يأخذ وعاء اللبن ، فاذا به
يحس ألما شديدا فى ظهره فتأوه ، وكاد يضطجع على المقعد
الطويل ، ولكن رنين النجس دفعه الى السير •

وأشرف على الردة ونظر : فاذا بأرضها قد غطيت بأجساد
بشرية ، فاضطر أن يسير على أطراف أصابع قدميه ، وأن يقدر
لرجله قبل الخطو موضعها ، حتى لا يعلو جسم سيدة ،
أو يدوس فى بطن غلام !

وبلغ المطبخ بسلام ، وتناول الوعاء ، وعاد يشق طريقه فى
مهارة وحرص بين الأجساد المتناثرة على الأرض ، المتشابهة
من الأقدام ، حتى اذا بلغ الباب فتحه ، ومد يده بالوعاء ، فقال
له الرجل :

— ربنا بتمم بخير يا بيه •

— مشكر •

وعاد يتلمس طريقه ، واذا بالثياب قد انحسرت عن
السيقان الممتلئة ، فنظر ، وانشغل بالنظر عن اكتشاف
الطريق ، فكادت قدمه تتعثر ، وارتج اللبن فى الوعاء ، فانتبه ،
وراح يتقدم فى حرص شديد •

ووقف يغلى اللبن ، وأخرج من النملية الزجاجية وراح
يغسلها ، حتى اذا ما فار اللبن صبه فيها وأغلقها بالحلمة

المطاط ، ثم اتجه الى الصنبور وفتحه ، ووضع الزجاجاة تحت الماء المتدفق •

وكان يمص الحلمة مصة بين لحظة وأخرى ليطمئن الى مناسبة حرارة اللبن ، وخرج الى الردهة ، وراح يجوس خلال النائمين وهو ينتقب عن حالة ، ويده ممدودة بالزجاجاة •

ولاح مراد نائما على الأرض وقد رفع رجله وأسندهما الى الحائط ، ورأى سوسن عارية البطن كمادتها ، فمد يده وأسدل ثيابها على بطنها ، وأخيرا عثر بزوجته وقد نامت على فخراها والى جوارها حالة ، فوضع الحلمة فى فم ابنته ، فاذا بها ترفع يديها وتقبض على الزجاجاة ، فنظر مليا ثم انسل هاربا من المكان •

ودبت الحياة فى الشقة وارتفعت الأصوات وتداخلت وامترجت فانقلبت الى ضوضاء تحطم الأعصاب ، وأقبل سامى على أبيه وقال :

— ح اعمل لهم شاي فى آيه ؟

فقال له أبوه فى ضيق :

— ضرورى يشربوا شاي ! إياك نفطرهم احنا •

— فيه ناس طلبت شاي ؟

فغمغم الأب مندهشا :

— طلبت ؟ ! هى قهوه ؟ !

ثم رفع صوته وقال :

— روح اعمل لهم شاي فى حلة .. فى طشت الغليه •

— وح اجيب لهم شاي وسكر مفين ؟!

— خد من ملما •

وتحرك سامى لينصرف ، واذا بأبيه يقول له :

— اسمع • قبل ما تعمل الشاي اطلع للطباخ قول له يحضر

لهم الفطور •

— حاضر •

وانصرف سامى وبقي الأب وحده فى الغرفة ، فراح يعد

على أصابعه وهو يحدث نفسه بصوت مسموع :

— غدا وعشا وفطور وغدا وعشا •

ولوى شفته السفلى فى ضيق ، وهز كتفيه فى استسلام :

وقال وهو يدور على عقبيه •

— واحد مصارينه خرجت ، كل واحد قال حته لقطتى •

الفصل السابع عشر

راح الأب يدور فى الغرفات ، ويلقى نظرة أخيرة على المكان ، فعما قليل تغيب الشمس ويتقاطر المدعون من كل حذب وصوب ، وأقبل سامى يرتدى بذلة أنيقة ، وكرفاته غالية ، يتيه فى مشيته ، وأطل من الشباك ينظر ، فبدأ عليه أنه ينتظر أمرا .

وجاء مراد غريبا لأول مرة ، فوجهه نظيف ، لا أثر للحبر فى أصابعه ، يرتدى بنطلونا ، وقميصا من الحرير الهفاهف ، وحذاء أسود يتألق ، وكأنما استشعر التغير الذى طرأ عليه ، فقال بصوت خافت :

— الطباخ يقول عايز حمل خشب كمان .

فقال الأب فى تبرم :

— أنا تعبت خلاص . قل له يجيب اللى هو عايزه .

وأقبل عاطف يرتدى بنطلونا من القטיפه ، وقميصا تدلى فى أناقه فوق محيط البنطلون فأخفى جزءا منه ، وراح سوزى

يتقدمه وهو يصبص بذيله ، ثم يتوقف حتى يلحق به ويتركه ،
فيعود ليتقدمه ثم ينتظره •

وجاءت سوسن وقد قصت شعرها ، ووضعت الأحمر في
سفيتها وفي وجنتيها ، تخب في ثوب منفوخ عند طرفه ، ضيق
غاية الضيق عند خصرها •

وأسرع عاطف الى أبيه وقال له :
— مش أنا حلو ؟

فقال الأب دون أن ينظر اليه :
— حلو خالص •

فدنا من أميه حتى التصق به وقال :
— طب هات ترش بقى •

فقال له الأب :

— ح تعمل به ايه ؟ عندنا كل حاجه • الى عندهم فرح
ما ياخدوش فلوس •

وغمغم في صوت خافت :
— يدفعوا بس •

والتف أولاده حوله ، فقال لهم في ذعر :

— انتو ح تتكوموا في حته واحده ! ؟ ما تتفرقوا •
وانتهز عاطف هذه الفرصة فقال :

— مش ح أمشى الا لما آخذ القرش •

فقال الأب لمراد :

— خذ أخوك للطباخ يديه حقة هريسه •

ومر مراد يده وتناول يد عاطف ، فقالت سوسن :

— وأنا يا بابا ؟

— وانتى روحى معاهم •

والتفت سلمى وقال :

— يبقى المعازيم مش ح يلاقوا حاجه ياكلوها •

وخرج مراد وعاطف وسوسن والكلب فى أثرهم وأقبل
الفراش وقال :

— عايزين ناجر كمان كام لمبه حمره •

فقال الأب فى ضيق :

— كفايه اللى أجرناه •

فقال الفراش ليقتمعه :

— الزينه الى عملناها على واجهة البيت نورها فسفان •

بقى نصرف المصاريف دى كلها ، ونيجى ع الآخر نبوظ الطبخه
على بقرش ملح !

— خلاص مش ح اعمل حاجه زياده عن اللى اتعمل •

كفايه بقى •

وسار الفراش الى جواره وقال :

- والميكرفون ؟
- مالوش لزمه •
- وهز الفراش كتفيه وانصرف ، وأطل سامى من الشباك وهتف فى فرح :
- صحابى جم •
- وخف الأب الى الشباك ونظر ، فاذا بجمع كبير من تلاميذ المدارس مقبلين ، فقطب جبينه وقال :
- مظاهره دى !
- والتفت الى سامى وقال فى استنكار :
- انت عزمت المدرسه كلها • ؟
- ولم يرد سامى على استنكاره ، بل أسرع لاستقبال أصحابه •
- وغادر الأب الشباك وهو مذهول ، وسار حتى غادر الغرفة ، فلمحته زوجته ، فأسرعت اليه وقالت له :
- انت لسه ما غيرتش هدمك ! الناس جت •
- أنا تعبت خالص • ما بقاش فى روح •
- خلص الكثير ما بقى الا القليل • كلها كام ساعه ينفض ، ونستريح على طول •
- وهدومى فين ؟
- فى الأوده اللى كومنا فيها العفش •

وارتفع صوت ينادى :

— يا أم العروسة .. يا ست أم العروسة .

— جايه . جايه حالا .

وذهب الأب يستبدل ثيابه ، وانطلقت أم العروسة تلبي رغبات المدعوات .

وتوافد الناس ، وازدحم المكان بالرجال والنساء والأطفال وجاءت فتيات صغيرات ، واذا بنبيلة تسرع اليهن وترحب بهن وتبالغ فى الترحيب ، فقد كن زميلاتهما فى المدرسة . ونظرت الفتيات الى ثوبها الأبيض فى اعجاب ، وقالت احداهن :

— مش ناقصك الا الطرحه البيضاء وتبقى عروسة .

وقالت أخرى مستكبرة :

— بس ! لو كانت الحكايه كده كان كل شىء بقى سهل ..

الرك مش ع الطرحه .

فقالت الأولى :

— أمال الرك على ايه ؟

فقالت الثانية وهى تضحك :

— الرك ع العريس .

وماج المكان بالناس حتى لم يعد هناك موضع لقدم : وخرج الأب بعد أن ارتدى ثيابه الأنيقة ، وراح يجوس خلال الجموع

وهو مأخوذ ، وأخذت صديقات نبيلة يرقصن ويغنين ، فسرى
المرح وساد الفرح بهجة وحبور •

وقال قائل :

— العريس •

فسرت همهمة ، واشرايت الأعناق ، وصوبت العيون الى
الباب وتقدم حلال وأمه وأبوه وبعض فتیان وفتيات ، وكان
شفیق بین القادمين •

وطفق شفيق يتلفت ، حتى وقعت عيناه على نبيلة ، فشق
طريقه اليها . وصاغها في شوق ولم يكف بالسر الذي أخذت
عيناه تبوحان به ، بل زم شفتيه وفطنت نبيلة الى أنه يبعث اليها
بقبله ، فغضت من بصرها ، وان كانت ينابيع الغبطة تفجرت في
أعماقها •

وانطلق جلال وأبوه وأمه ومن كان في رفقتهم الى الكراسي
المذهبة ، واحتلوها • والتقى حسين بزوجته ، فقال لها همسا :

— غلب اللبس مش ح تكفى • مافيش الا اننا نقدم اللبس
على صوائف • با دوب كل معزوم ياخذ ملبسه •• أنا تعبت
خالص •• امتى المولد ده ينفض !

— بعد الكتاب ، يطلعوا البسوفيه ، وكل واحد يروح
احاله ، وبنفرض المولد ده •

وسحب رجل الأب من ذراعه ، وهو يقول له : المأذون
جه ، اتفضل •

وجلس الأب وجلال يتصافحان ، وأسدل على يديهما
منديل من الحرير ، وجلس المأذون بينهما يلقنهما صيغة الرباط
المقدس ، ووقف شفيق ينظر ونبيلة الى جواره •

والتقت عينا شفيق بعيني نبيلة ، فاذا بالحب يتحدث ، واذا
بكل خلجة من خواجهما تنم عن العاطفة الجياشة ، ومد شفيق
يده وقبض على يد نبيلة ، وراح يضغطها في رفق وحنان •

وأطلقت الزغاريد ، ايذاً بانتهاء العقد ، ودخل الفراشون
يحملون أكواب الشراب الوردى على صوانى من الفضة ،
وامتدت الأيدي واختفى الشراب فى الأجواف •

وقام جلال يصفح المدعوين ، واذا بشفيق يجذبه من
ذراعه ويقوده الى حيث كانت أحلام •

كانت أحلام فى ثياب العرس ، وقد أسدلت نقاباً شفافاً على
وجهها ، فمد جلال يده ورفع النقاب ، ومال اليها وقبلها قبلة
طويلة حارة ، واذا بشفيق يلتفت الى نبيلة ويهمس : عقبالنا •
والتقى حسين بزوجته ، فقالت له والدموع تترقرق فى
عينها :

— مبروك •

فقال لها :

- تعبان ، متعبألى أنى ح أقع •
- خلاص • طالعين ع البوفيه ، وبعدها ح ينزلوا على طول •
- ووضع جلال يده فى يد أحلام وسارا والزغاريد تدوى فى المكان •
- وتدفق المدعوون الى السطح ، حيث الطعام ، ولم يبق فى الشقة الا الآثار ، وحسين منهار على مقعد من المقاعد الذهبية وزوجته الى جواره تقول له :
- ياللا نطلع • الناس تقول ايه !
- مش قادر • تعبت خالص • عايز أنام •
- قوم •• قوم • كلها ساعة • وتنام بعدها زى ما انت عايز •
- اسبقينى • ح استريح دقيقتين وح حصلك •
- وقامت أم العروسة ، وانطلقت الى السطح ، وبقي الأب مضطجعا ، وحن جسمه الى الراحة ، فأغمض عينيه ، ومس أذنيه حفيف ثوب ، ووقع أقدام ، ففتح عينيه ونظر ، فاذا بشفيق مقبل وفى يده نبيلة •
- ورفع رأسه وراح ينقل بصره بينهما وهو مكدود ، وتقدم شفيق خطوة ، وراح يجمع أطراف شجاعته ، ثم قال :
- أنا جاى يا عمى أطلب منك نبيله •

فقال الأب دون تفكير :

— روح الله يبارك لك فيها •

والتفت شفيق الى نبيلة ، ومد يده وقبض على يدها • ثم انصرفا مهرولين ، وقد اتسمت حركاتهما بالخفة والسرور • وتمدد الأب فى المقعد الوثير ، وغفا قليلا ، ولكن سرعان ما استيقظ على دوى الزغاريد فهب من نومه ، وبدأ فكره يعمل ، فتذكر ما قاله شفيق : فصاح :

— شفيق •• نبيله • الله •• دا خطبها منى وأنا وافقت •

ايه العمل دلوقت • ح أجهز تانى ؟ ! ازاي ؟ ومنين ؟ !

وراح يهرول صوب باب الشقة وهو ينادى :

— يا زينب •• يا أم العروسه •• تعالى شوفى اللي جرى

•• مش ح نستريح •• الموند ده مش ح ينفض •• مش

ح ينفض أبدا •

وكان قد بلغ باب الشقة الخارجى ، فوقع بصره على أحلام وجلال وهما هابطان ، وشفيق ونبيلة خلفهما ، والرجال والنساء والأطفال يتدفقون خلفهما فى الدرج ، والزغاريد تجلجلج والأصوات تتداخل فوقف ينظر وقد فغر فاه فى دهش ، ثم سقط مغشيا عليه •

رقم الايداع ٢٥٥٧

الترقيم الدولى • ٢٢٣ — ٣١٦ — ٩٧٧

مكتبة مصير
٣ شارع كامل صدقي - النجيلة

Bibliotheca Alexandrina



0534410

دار مصر للطباعة
سعيد جودة السحار وشركاه